

Siunnersummut oqaaseqaatit

Oqaaseqaatit nalinginnaasut

1. Aallaqqasiat

Suliffissarsiortunut ikorsiissutinik aaqqissusseqqinnermut siunnersuut, Naalakkersuisut inummik tamakkiisumik isiginneriaasiata ilaatut, isumaqarlunilu isumaginninnermut tunngassuteqartut, peqqinnissamut tunngassuteqartut, suliffeqarnermut ilinniartitaanermullu tunngassuteqartut imminnut atassuteqassasut, anguniagaallunilu imminut pilersorsinnaanerup annertusarneqarnissaa.

Inuaqatigiit imminnut napatissinnaasut siunertarinerani pingaaruteqarpoq pisinnaatitaaffit aamma pisussaaffit erseqqissuunissaat, innuttaasullu tamarmik pisinnaasatik aallaavigalugit ataatsimoornermut tunniussaqartarnissaat. Tassani suliffissarsiornermi ikorsiissutinik aqqissusseqqinneaq nipilersoqataavoq, aaqqissusseqqinneaq aqutissiuusseqataassammat amerlanerusut suliffeqalertarnissaannut, taamalu ataatsimoornermut tunniusseqataasassallutik. Aqqissusseqqinneaq aamma peqataassaaq innuttaasut kaammattorneqarnerannut inuuniarnermi atukkanik nammineq pitsangorsaasinnaanermut periarfissanik atuinissaannut, taamalu inuaqatigiinni piitsuussutsip annikinnerulersinnissaanut.

Politikkikkut inuaqatigiinnilu pingartinneqarpoq kalaallit inuaat aningaasatigut imminnut napatittunngornissaat.

Suliffissarsiortunut ikorsiissutit maanna suliffeerunnermi ikorsiissutit atuuttut taarsissavaat.

2. Siunnersummi immikkoortut pingarnerit

Suliffissarsiornermi ikorsiissutinik aaqqissusseqqinnermi tunngaviulluinnartoq tassaavoq sulineq imminut akilersinnaassasoq. Aaqqissusseqqinnermik suliaqarneq innuttaasut tamarmik imminnut pilersornissaminnik akisussaaffeqarnissamik kissaateqarnerannik naatsorsuutigisaqarnermik tunngaveqarpoq.

Suliffissarsiortoq nammineq piumassuserinngisamik suliffeerunnermi suliffissarsiornermi ikorsiissutinik pisartagaqalissaq, kisiannili suliffeqarfinnit pissarsiarineqarsinnaassalluni: suliffissaq innersuunneqartoq, suliffeqalernissamut sungiusarnissamik neqeroorut piginnaannngorsarnissaq (assersuutigalugu PKU) akuerissallugu, atorfimmut naleqquttumut qinnuteqaateqassalluni kiisalu Majoriamit ataatsimiigiaqqusissut eqqortissallugu il.il. Suliffissarsiornermi ikorsiissutit suliffeqarfinnit pissarsiarineqarsinnaanermik nassuaasiinermut tunngaviupput.

Suliffissarsiornermi ikorsiissutit isumannaallisaatitut ikorsiissutaapput isumaginninnermilu ikorsiissutaanatik, tunngaviusorlu tassaavoq innuttaasup inissisimanini pitsanngortinniarlugu iliuuseqarnissamik pisussaaffeqarnera. Suliffissarsiornermi ikorsiissutinik pisartagalik pisartagaqarnermi pisussaaffini eqqortinngippagit pineqartoq suliffissarsiornermi ikorsiissutit pisartagai sapaatit akunnerini sisamani 50%-imik ikilineqassapput, tassunga ilangullugu atorfimminit nammieq soraarniuteqarsimappat imaluunniit suliunnaarsinnejarsimappat. Innuttaasup pisartagai sapaatit akunnerini sisamani appartinneqarpata inuk suliffeqarfinnit pissarsiarineqarsinnaasutut isigineqassanngilaq Isumaginnittooqarfimmillu pisortat ikorsiissutaannik pisartagaqalernissamik qinnuteqassalluni.

Suliffissaaleqisoq siullermeerluni saaffiginninnermi Majoriamut nammineerluni takkutissaq nalunaarsortillunilu, siusinnerpaamillu ullormi saaffiginniffimmilu suliffissarsiornermi ikorsiissutinik siullermik pisartagaqalersinnaalluni. Suliffissarsiornermi ikorsiissutinik pisartagallip CV-ni suli.gl-imik nutartersimassavaa, minnerpaamillu sapaatip akunneranut ataasiarluni suliffissarsiortutut nalunaarsortassalluni NemID atorlugu.

Suliffissarsiornermi ikorsiissutinik pisartagalimmut pisussaaffilisumik iliusissatut pilersaarusiortoqassaaq, aammalul suliffissarsiornermi ikorsiissutinik pisartagallip minnerpaamik suliniuteqarnini taassumalul suunera iliusissatut pilersaarummi allassimallugu. Ilusissatut pilersaarut sapaatit akunnerisa sisamat iluanni suliarineqassaaq ingerlaavartumillu nalilersorneqaqqittassalluni.

Inuit sulinermik sivikitsumik utaqqiisaasumik unitsitsilluni angerlartinneqartut unitsitsigallarnermut pissutaasoq aamma inuussutissarsiutip immikkoortua suunersoq apeqquaatinngagu suliffissarsiornermi ikorsiissutinik aamma pisartagaqarsinnaapput. Ilusissatut pilersaarusiortoqassanngilaq, angerlartinneqartulli sullifimmik innersuunneqartunik akuersisussaatitaapput. Angerlartinneqartut ullormit suliffissaaleqiffiulersumit siullermit suliffissaaleqisutut angerlarsimaffimmit elektroniskiusumik nalunaarsortinnissamik periarfissaqarput.

Suliffissarsiornermi ikorsiissutinik pisartagaqartut suliffissarsiornermi ilinniagaqarnermilu nunap iluani sumiiffinnut allanut nuussinnaanissamut kajumissuseqalersinnejarsapput, ukiullu ataatsip qaangiunnerani suliffissarsiornermi ikorsiissutit appartinneqassallutik pisortanit ikorsiissutit 18-init 29-nut ukiulinnut atuuttut nalinginut, ukiullu marluk qaangiunneranni 30-nik ukiulinnut utoqqaanerusunullu. Illoqarfinnut allanut suliffissamik innersuussinermi inissaaleqisoqarsinnaanera il.il. mianerineqassapput.

Suliffissarsiortunut ikorsiissutit tunngaviusumik annertussusiat SIK malillugu akissarsiat minnerpaaffigisaasa¹ sapaatit akunnerini 26-ni siullerni 90%-eraat, tamassumalul kingorna

¹ Sulinermik inuussutissarsiuteqartunut ilinniarsimanngitsunut 18-it sinnerlugit ukiulinnut akunnermusiat minnerpaaffiat SIK-p aamma Naalakkersuisut akornanni isumaqtigiiissutit malillugit 1. aprili 2021-mi akunnermut 100,47 kr-iupput.

akunnermusiat annertussusiat 80%-iulluni. Akunnermusiat sapaatit akunnerini kingullerni 13- ini sapaatit akunneranut akunnerit suliffiit agquaqtigisiinnerannut sanilliullugit naatsorsorneqassapput – annerpaamik akunnerit 40-ut minnerpaamillu akunnerit 22-t. Ilinniarnermik naammasseqqammersut kiisalu innuttaasut tamassuma siorna akissarsiornikuunngitsut piffissami sapaatit akunnerini marlunni katersereernerup kingorna ullormi saaffiginnifimmit siullermit akunnernut 22-inut suliffissarsiornermi ikorsiissutinik pisartaqalersinnaapput.

Suliffissarsiornermi ikorsiissutit A-mik akileraaruserneqassapput, suliffissarsiornermilu ikorsiissutinik pisartagallit inuttut sulisutut pisortat ikorsiissutaannik (assersuutigalugu meeraqarnermut tapiissutinik) inatsisini allani malittarisassiuunneqartut assinginik pisartaqarsinnaapput.

Suliffissarsiornermut ikorsiissutinik pisartagalik isumaqtigissutit il.il. naapertorlugit napparsimanermi akissarsianik pisartagaqarsinnaunngitsut napparsimanermi piffissami utaqqiisaasumi suliffissarsiornermut ikorsiissutinik pisartagaqarsinnaapput. Pinngortitami ajunaarnersuaqarnerani piffissami killilimmi aamma suliffissarsiornermi ikorsiissutinik pisartaqartoqarsinnaavoq.

Piffissami killilimmi qaammatini arfinilinni sapaatit akunneri sisamat tikillugit piffissap ilaani sulisoqarsinnaavoq suliffissarsiornermilu ikorsiissutinut ilassutinik pisartagaqartoqarsinnaalluni, taakkulu tiimini suliffiusumi innuttaasup suliffissarsiornermi ikorsiissutaasa annertussusianut (akunnerit 22-niit akunnerit 40-ut) sanilliullugu 1-mit 1-imut akilerneqartassapput. Piffissap ilaannaani suliffeqartunut suliffissarsiornermut ikorsiissutit piffissami suliffissarsiorfiusumi nalinginnaasumik naatsorsorneqartassapput piffissarlu sivitsorneqarsinnaanani.

Suliffissarsiornermut ikorsiissutit ineriartortinneqarput pisortanit ikorsiissutinik aaqqissusuusseqqinnej ilutigalugu, pinngitsoorumallugit ataatsimut ajornartorsiutaalersinnaasut, Naalakkersuisooqatigiit tamanut atuuttunik anguniagaat aallaavigalugit, inuillu nammineq aallaavigisaat tunngavigalugit kikkut tamarmik peqataasarnissaat periarfissaqartikkumallugu.

3. Pisortanut aningaasatigut allaffissornikkullu kingunissai

Suliffissarsiortunut ikorsiissutinik aaqqissusuusseqqinerup saniatigut pisortanit ikorsiissutinik aaqqissusuusseqqitoqarpoq, aaqqissusuusseqqinnerillu ataqtigisiillugit suliarineqarput. Nutaartaasoq tassaavoq inuit tulluarsaqatigiinni 1-imiittut tamarmik suliffissarsiornermi ikorsiissutinik pisartagaqassasut, taavalu tulluarsaqatigiit 2-miit aamma 3-miittut pisortanit ikorsiissutinik pisartagaqartassallutik. Naatsorsutigineqarpoq tulluarsaqatigiit 1-imiittut kisimik suliffissarsiornermi ikorsiissutinik pisartagaqassasut, tassa piumasaqaataammat

suliffissarsiortunut ikorsiissutinik pisartagaqartussat sulileriaannaasassasut pisartaqalinnginnermi. Tulluarsaqatigiinni 1-imiittut ilaat ullumikkut pisortat ikorsiissutaannik pisartagaqarput, ilaatigut suliffeerunnermi ikorsiissutinik taamaallaat sapaatit akunnerini 13-ini pisartagaqartoqarsinnaanera pissutigalugu.

Pisortat ikorsiissutaannik pisartagaqarnissamut apparisap isertitai apeqquaapput, tamannalu suliffissarsiortunut ikorsiissutini atuutinngilaq. Taamaammat ilimagineqarsinnaavoq ullumikkut pisortat ikorsiissutaannik imaluunniit suliffeerunnermi ikorsiissutinik pisartagaqanngitsunik nutaanik suliffissarsiortunut ikorsiissutinik pisartagaqartoqalissasoq.

Inuit 2018-imi imatut inissisimasut:

18-it 65-illu akornanni ukiullit

Siusinaartumik soraernerussutisiaqanngitsut

Qaammammi aalajangersimasumi pisortat

ikorsiissutaannik pisartagaqanngitsut

Ilinniagaqarnermi ikorsiissutinik

pisartagaqanngitsut

Suliffeerunnermi ikorsiissutinik

pisartagaqanngitsut

Ukiumut isertitaat

akileraarutaasussaatitaasut 50.000 kr.-t

ataakkaat

Aappallit

Inuit amerlassusaat	785
Qaammatit amerlassusaat	8.941

Ilimagineqartariaqarpoq inuit taakku amerlanerpaartaat tulluarsaqatigiinni siullerni inissisimannngitsut, naatsorsuutigisariaqarmat inuit taakku ilaat suliffeqannginnissamik nammineq piumassutsiminnik toqqaasimanissaat. Tamanna 2018-imi aningaasarsiornerup qaffasissuuneraniit aamma ersersinneqarpoq, tassa tulluarsaqatigiit 1-imi suliffissaaleqisut aningaasarsiornikkut qaffasissuunerani appasissuuneranut sanilliullugu ikinnerummata.

Naatsorsuutigineqarpoq sulilernissamut piareersimasussaaneq suliffissarsiortunut ikorsiissutinik pisartagaqartut inissisimaffigisassaat kinguneqassasoq inuit pineqartut 785-it tamarmiunngitsoq suliffissarsiortunut ikorsiissutinik pisartagaqannginnissaannut tunngaviussasoq. Kisitsisit paasissutissat siulianiittut erseqqissarpaat naammattunik paasissutissanik tunngavissaqanngimmatt nalilersuinissamut, inuit qassit pisortanit ikorsiissutini inissittasanersut, aammalu qassit suliffissarsiortunut ikorsiissutini inissittasanersut eqqarsaatigalugu. Tamatumani pissutaavoq aaqqissuussinerit malunnaatilimmik allannguuteqarnerat, atugassarititaasut tunngavigineqartut maanna aaqqissuussinermut sanilliullugit assiginagit, taamaattumillu sanilliussinissamut tunngaviusinnaasut killeqarlutik. Tamanna isumaqarpoq naatsorsuutigisani nalornissutit annertunerinik. Imaattunik missiliuuteqartoqarpoq:

Naatsorsuutigisat:
Pisortanit ikorsiissutinik pisartagallit 20 %-ii suliffissarsiornermi ikorsiissutinik pisartagaqalissapput
Inuit 100-t (inuit aappallit) suliffissarsiornermi ikorsiissutinik pisartagaqalissapput
Suliffeerunnermi ikorsiissutinik pisartagallit tamarmik suliffissarsiortunut ikorsiissutinik pisartagaqaannassapput

Tamanna ikorsiissutit assiginngitsut qaammatikkaartumik imatut agguarnerannik kinguneqassaaq.

Inuit pisartaqalersut nutaat	Amerlassusaat
Pisortanit ikorsiissutit	1.906
Suliffissarsiornermi ikorsiissutit	818

Naatsorsuutigineqarpoq suliffissarsiornermi ikorsiissutinik pisartagaqalersut nutaat tamarmik ikinnerpaanik pisartagaqalissasut, tassa akunnerit 22-t 90%-i atorlugu. Akunnermut akimik qaffasinnerusumik pisartaqalissappata tamatuma siorna sapaatit akunnerini 13-ini akunnernit 22-nit amerlanerusunik sulisimassagaluarput. Pisortanit ikorsiissutit inunnut meeraqannngitsunut qaammammut 4.200 kr.-nik annertussusilerneqarnikuupput. 4.200 kr.-inik taakkuninnga naatsorsuinerit VIVE-mit 2018-imi suliarineqartunik ilanngaasiinani naatsorsuinerupput.² Taanna 2021-imi akiusunut naatsorsoraanni aningaasanut inatsimmi pl-imik³ aaqqiissutaasoq tunngavigalugu qaammammut 4.500 kr.-it anguneqassapput hunnorujumut qaninnermut iluarsiissusiinermi.

Suliffissarsiornermi ikorsiissutinik pisartalinnut nutaanut akit

	Amerlassusaat	Akit	Qaammammut akit	Ukiumut akit	Akileraarutit kingorna akit
Pisortat ikorsiissutaannik pisartagaqarnermit	477	3.542	1.688.285	20.259.419	11.750.463
Pisartagaqannginnermit	100	8.042	804.235	9.650.822	5.597.477

²Pisortat ikorsiissutaannik misissueqqissaarneq, VIVE 2018

³ Pl- aaqqiissutaasoq = akinut akissarsianullu naleqqussaaneq 2019-mi 2,22%-iuvoq, 2020-imi 1,86% aamma 2021-imi 1,8%.

Katillugit	577	2.492.520	29.910.242	17.347.940
------------	-----	-----------	------------	------------

Suliffissarsiortunut ikorsiissutit meeraqanngitsunut pisortat ikorsiissutaasa marloriaatingajaraat, taamalillunilu aningaasartuutit ilaat annertuut atorneqassapput inuit suliffissarsiornermi ikorsiissutisiaqartitsilernermut. Suliffissarsiornermi ikorsiissutit akileraarusigassaatitaammata taakku ilaat akileraarutitigut utertinneqassapput.

Aaqqissusseqqinnerli nunap karsianut naatsorsuutigineqarpoq ukiumut 17 mio. kr.-it missaanni akeqassaaq. Ilimaginartut ilaat, assersuutigalugu pisartagaqalersut nutaat tamarmik qaammat tamaat suliffissarsiornermi ikorsiissutinik pisagaqalernissaannik ilimagisaqarneq oqallisigineqarsinnaapput. Tamatuma aningaasartuutissaq qaffasinnerulersissavaa, taakku ilaat qaammatip ingerlanerani suliffittaartussaammata. Taamaattoq qanoq amerlatigisut pineqassanerannik ilmagisagut tunngavilersorsinnaajumallugit paasissutissaateqanngilagut.

Piareersimasussaanermik pisussaaffeqarneq

Suliffissarsiornermi ikorsiissutinik atuutilersinsinermi piareersimasussaanermik pisussaaffeqarneq sukateriffigineqassaaq. Suliffissarsiornermi ikorsiissutinik pisartagaqalissagaanni suliffissaaleqisoq suliffeqarfinnit pissarsiarineqarsinnaassaaq, tassa suliffik innersunneqartoq naleqquttoq, suliffeqalernissamut sungiusarnissamut neqeroorut, piginnaannngorsarneq (assersuutigalugu PKU) akuerissavaa kiisalu Majoriamut ataatsimiigiaqqusinerni tamani takkuttassalluni.

Andersen-ip aamma Arendt-ip (2015) Europami nunani assigiinngitsuni misissuinerit qulit allaaseraat, ataatsimullu isigalu isumaqarlutik kinguneqartitsisarnerit suliffissaaleqisut procentinngorlugu amerlanerusut suliffeqalertarnerinut aqqutissiuussisartut. Suliffissaaleqisut kinguneqartitsinermik aqqusaaagaqaraangamik misissuinerni amerlanerni taamatut pisoqartarnera atuuppoq. Andersen aamma Arendt (2015) kingunerititaqarfiunngitsumik piareersimasussaanermik pisussaaffeqarnerup sunniutai misissunngilaat, kisiannili kinguneqartitsisoqarsinnaanera annilaangagineqarnera pissutigalugu pissusilersonermik suli allannguisarput. Taamaammat piareersimasussaanermik pisussaaffeqarnerup erseqqissumik sunniutai aalajangeruminaapput. Naatsorsuutigineqarpoq pisartagaqartut 5%-inik ikilissasut, taakkulu SIK malillugu "akissarsiat minnerpaaffissaat" maannakkut 100,47 kr.-iusoq (2021-mi qaffasissuseq) 90%-ia atorlugu agguaqatigiisillugu akunnerni 30-ni suliffissarsiornermi ikorsiissutinik pisartagaqatuussasut. Pisortat ikorsiissutaanik pisartagaqartut 20%-iisa suliffissarsiornermi ikorsiissutinik pisartagaqalernissaat periarfissami aallaaviuvoq.

Suliffissarsiornermi ikorsiissutinik pisartagallit ikinnerulissutaat	Qaammammut aki	Ukiumut sipaarutit
Piareersimasussaanermik pisussaaffeqarneq	41	10.967 5.379.895

Taamaalilluni nalilerneqarpoq piareersimasussaanermik pisussaaffeqarneq piffissaq tamaat suliffissaaleqisut 40-nik ikinnerunerannik kinguneqassasoq, ukiumullu aningaasartuutinut 5 mio. kr.-nik sipaarutaassalluni.

Tamanna ataatsimut aningaasaqarnikkut naatsorsuutigineqarpoq kinguneqartussatut nunatta karsianut 12 mio. kr.-it missaannik.

Suliniutit	Aningaasat mio. kr.
Suliffissarsiornermi ikorsiissutinik pisartagaqartartut amerlanerusut	17
Piareersimasussaanermik pisussaaffeqarneq	-5
Katillugit	12

Nalilerneqarpoq Inatsisartut inatsisissaannut siunnersuut tamatuma saniatigut kinguneqartussaassasoq IT-mik atortulersuutit malinnaatinnerinut ineriartortinneqarnerannullu aningaasartuutinik. Tamatumunnga aningaasartuutit missiliunneqarput ataasiartamik aningaasartuutaasussatut 500.000 kr.-it missaannut. Aningaasat IT-mik atortulersuutit ullutsinnut malinnaatinneqarnissaannut ineriartortinneqarnissaannullu atorneqartussat Isumaginninnermut, Suliffeqarnermut Nunamullu Namminermut Naalakkersuisoqarfimmut aningaasaasaliissutit iluanni akilerneqassapput.

4. Inuussutissarsiortunut aningaasatigut allaffissornikkullu kingunissai

Kalaallit Nunaanni suliffeqarfiit ilinniarsimasunik ilinniarsimanngitsunillu sulisussaaleqipput. Suliffeqarfiit 157-it 31%-iisa 2018-imni oqaatigaat ilinniarsimanngitsunik sulisussarsiniartarnermik ajornartorsiuteqarlutik.⁴ Suliffissarsiornermi ikorsiissutinik aaqqissusseqqinnejn inuussutissarsiortunut sulisussat amerlinissaannut tapersiissaqq, taamaalilluni suliffeqarfiit najukkani nunalu tamakkerlugu sulisussarsiniartarnerat ajornannginnerulissalluni. Aaqqissusseqqinnejn pineqarpoq innuttaasut imminnut pilersornissamik akisussaaffeqassasut, taamaammallu ilimagineqarpoq aaqqissusseqqinnejn inuussutissarsiortunut pitsaasumik sunniuteqassasoq, tassa aaqqissusseqqinnejn innuttaasut suliffissarsinissaannut suliffeqaaannarnissamallu, piginnaanngorsarnissaannut

⁴ "Sulisitsisuni suliffeqarfiit sulisussaaleqinerat", HS Analyse (Sulisitsisut suliakkiinerisigut), 2018, qupperneq 3.

ilinniagaqarnissaannullu aamma najukkanut suliffissaqarfiusunut nuunnissaannut kajumissuseqalersinneqassammata.

5. Avatangiisinut, pinngortitamut innuttaasullu peqqissusiannut kingunissai

Ilimagineqarpoq suliffissarsiornermi ikorsiissutinik aaqqissusseqqinnerup innuttaasut peqqissusiat pitsaasumik toqqaannartumik toqqaannanngitsumillu sunnissagaa. Imminut pilersornerup suliffeqarnerullu inuit ummaarinneqarnerullu inuit, ulluinnarni patajaannerulersissaavaat, inuunermermi sapiissuseqarnerulersissaavaat, annertunerusumik pisisinnaassuseqalersissaavaat (taamaalillunilu kiffaanngissuseqarnerulersillugit) il.il. Peqatigitillugu pinngitsoorani, piviusorsiorumik pisussaaffiliisumillu iliuusissatut pilersaarut ingerlaavartumik suliarineqaqqittartussaq, suliffissaaleqisut suliffeqarfinit pissarsiarineqarsinnaasut Majoriap suliniuteqarnerata isumaqarneranik pitsaasumik misigisimatiressavai namminerlu pilersornissap qaninnerulernissaanut ikiorlugit.

Taamaammat ilimagineqarpoq, suliffissarsiornermi ikorsiissutinik aaqqissusseqqinnejnq inuit ataasiakkaat suliffissaaleqisut, taakku ilaquaasa avatangiisaasalu pitsaannerusumik inooriaaseqalererannik peqqinnerunerannillu siunissami kinguneqassasoq – innuttaasut nalinginnaasumik peqqissusiannut iluaqutaasumik. Peqatigitillugu sulliffissarsiornermi ikorsiissutinik atuutilersitsineq napparsimallutik nalunaartut napparsimanermi akissarsiaqarsinnaatitaanngitsut napparsimaneranni maannakkut malittarisassat naapertorlugit pisortat ikorsiissutaannik pisartagaqalersinnagit suliffissarsiornermi ikorsiissutinik pisartagaqarsinnaatitaalissapput.

Ilimagineqarpoq suliffissarsiornermi ikorsiissutinik aaqqissusseqqinerup innuttaasut namminnejnq inuunerminnik paarinnilersinnerisa kinguneranik inuummarinnerulersinnerisigut innuttaasut peqqissusiat toqqaannanngitsumik sunnissagaa.

Inuuusuttut aaqqissusseqqinnermi immikkut anguniagaapput, taamaalillunilu siusissukkut suliniuteqartarneq pingaartinneqarluni. Ilimagisaq tassaavoq suliffissarsiornermi ikorsiissutinik aaqqissusseqqineq inuuusuttut ilinniarfimmuinngitsut suliffeqannngitsullu peqqinnerulererannut tapersiissasoq. Inuuusuttunut tungatitamik suliniuteqarnerup annertusineratigut inuuusuttut amerlanerusut ilinniagaqarnissaat suliffeqarnissaallu anguniagaavoq.

Ilimagineqanngilaq suliffissarsiornermi ikorsiissutinik aaqqissusseqqinnejnq pinngortitamut avatangiisinullu kinguneqassasoq.

6. Innuttaasunut kingunissai

Aaqqissusseqqinnermi imminut pilersornerunissaq pineqarpoq, taamaalillunilu imminut pilersorsinnaanermik nammineq akisussaaffeqarneq ilaalluni. Innuttaasup kommunip suliassanik suliarinnitarnerani ineriantornera siuarsarniarlugu innuttaasullu inuunermermi

inissisimanerat pitsanngorsarniarlugu anguniagaqarnerulluni sulisutut misigissavaat, innuttaasorlu taamaalilluni suliffeqarnissamut qaninnerulissalluni.

Taaguutaata ‘suliffeerunnermi ikorsiissutit’ -nit ‘suliffissarsiortunut ikorsiissutit’ -nut allanngortinneranut pissutaavoq, suliffissaaleqisut suliffeqarfinnit pissarsiarineqarsinnaasut suliffissarsiornermi ikorsiissutinik pisartagaqarsinnaatitaalerniarlutik suliffissarsiussasut, taamaalillutillu imminut pilersornissaq nammineq akisussaaffigissallugu. Tamassuma kinguneraa suliffissaaleqisoq suliffeqarfinnit pissarsiarineqarsinnaasoq imminut pilersornissamut imminut akisussaaffilinngitsoq (assersuutigalugu Majoriamit neqeroorummi peqataajumanani suliffissatulluunniit innersunneqartoq akuerumanagu) suliffissarsiornermut tapiissutimi 50%-iinik sapaatit akunneri sisamani ilanngaaffigineqassasoq. Suliffissarsiornermi ikorsiissutinik pisartagaqartoq ukiumut sisamararluni ilanngaaffigineqaruni pineqartoq sulileriaannaanngitsutut nalilerneqassaaq, aammalu suliffissarsiornermi ikorsiissuteqarsinnaatitaaneq annaassallugu.

Ikorsiissutit maannakkut aaqqissuussinnejnneq taamatuttaaq iliuusissatut pilersaarutit suliarineqarnerannut kiisalu ingerlaavartumik nalilersornerannut taakkulu aaqqinnejnqartarnerannut atatillugu isumassarsitinniarlugit piffissap ingerlanerani ikiliartussagaluartut. Ilimagineqarpoq suliffissarsiortunut ikorsiissutinik pisartagaqartut nukissaqarluassasut imminnullu akisussaaffeqarnissamik pisussaaffilerneqassasut.

Aaqqissuusseqjinneq taamatuttaaq iliuusissatut pilersaarutit suliarineqarnerannut kiisalu ingerlaavartumik nalilersornerannut taakkulu aaqqinnejnqartarnerannut atatillugu pisinnaatitaaffeqarnermit pisussaaffeqarnermut nuuttoqarneranik aamma kinguneqarpoq. Iliuusissatut pilersaarutit innuttaasoq suleqatigalugu suliarineqartassapput, suliniutinullu inunnut ataasiakkaanut naleqqussakkanut atassuteqartinnejnqassallutik. Iliuusissatut pilersaarutit pisussaaffiliissapput.

Iliuusissatut pilersaarutini pissutsit tamaasa isigineqartassapput inunnnullu naleqqussakkanik suliniuteqartoqassalluni. Kommunalbestyrelse iliussissatut pilersaarutit suliarineqarneranni innuttaasup suliffeqarfinnit pissarsiarineqarsinnaaneranut tunngatillugu innuttaasup inissisimanera isiginiaassavaa.

7. Kingunissai pingaaruteqartut allat

Ilimagineqarpoq siunnersuut allanik pingaaruteqartunik kinguneqassanngitsoq.

8. Oqartussanut kattuffinnullu il.il. tusarniaaneq

Siunnersuut pisortat tusarniaasarnermut quppersagaanni www.naalakkersuisut.gl tamanut takusassiarineqarpoq 27. august 2021, tusarniaaneq killilerlugu 24. september 2021-imut, tusarniaassutigineqarlunilu tusarniaavigineqartartunut tulliuttunut: Avannaata Kommunia,

Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, Atuisartoqarnermut Unammilleqatigiinnermullu Aqutsisoqarfik, Isumaginninnermut Aqutsisoqarfik, Sulinerlik Inuussutissarsiuteqartut Kattuffiat, Sulisitsisut, KNAPK, NUSUKA, AK, NPK, IMAK, Sorlak, MIO, Peqatigiiffik Kalaallit Meerartaat, Tilioq aamma Kalaallit Nunaanni Pinerluttaalisitsinermut Aqutsisoqarfik.

Tusarniaanermit akissutit tusarniaanermut atatillugu allakkiami sammineqarput.

Innersunneqassaaq ilanngussaq 1.

Siunnersuummi aalajangersakkanut ataasiakkaanut oqaaseqaatit

§ 1-imut

Imm. 1-2-mut

Suliffissarsiortunut ikorsiissutinik pisartagaqarsinnaassagaanni suliffissaaleqisuuusariaqarpoq, tassa imaappoq, tamakkiisumik imaluunniit ilaannakuusumik suliffeqarani. Tamatumani apeqquaanngilaq suliffigisaq akissarsiaqarfiunersoq akissarsiaqarfiunnginnersorluunniit.

Kiisalu aamma piumasaqaataavoq suliffissaaleqisup sulilernissamut piareersimasuunissa. Sulilernissamut piareersimasutut isagineqassaaq inuk suliffeqalernissamut suliartoqquneqaruni suliartoriaannaasoq, siumoortumillu immikkut suliniuteqarfingineqanngikkaluarluni atorfimmik tigusilluni ingerlatsisinjaasoq, atugassarititaasut nalinginnaasut iluanni, sap. ak. minnerpaamik akunnerni 20-ini. Atorfittut atugassarititaasut nalinginnaasut iluanni isagineqassaaq suliffissaq, inuup qassinik ukioqarnini apeqquaatinngagu, misilittakkanik qanoq ittunik misilittagaqarnini apeqquaatinngagu nalinginnaasumik suliarisinnaasaa. Tamatumani aamma ilaapput atorfiiit imaluunniit suliffissat inuup ingerlassinnaasai, naak inuup pineqartup ilinniagaanut, sungiusarsimaneranut imaluunniit inuussutissarsiutigisimasaanut assingunngikkaluartut.

Pineqartumi namminermi naliliinernik tunngaveqassaaq inuup sulisinnaassusia sap. akunneranut akunnerit 20-it inorlugit imaluunniit sinnerlugit sivisussuseqarsinnaanersoq. Naliliineq communalbestyrelsimit isumagineqassaaq nalinginnaasumik tulluarsaqatigiinnut inisseereernikkut suliassanut immikkoortitserinermi, suliffissarsiortunut ikorsiissutisinissamut imalunniit pisortanit ikorsiissutisinissamut.

Inuup sulileriaannaanerata kingunerissavaa inuup inatsisit iluanni suliassamik innersunneqartumik tiguseriaannaanera. Nunamit allameersoq inuk, nunanit allamiunut inatsimmik allamilluunniit assigisaanik tunngaveqartumik Kalaallit Nunaanni suliassamik tigusisinnaanngitsoq, taamaasilluni sulileriaannaasutut isagineqarsinnaanngilaq.

Isiginiarneqassaaq naatsorsuinermi tunngaviusussat § 22 naapertorlugu ingerlanneqassammata, akunnermusiamilu apeqquaassanani pineqartup sap. akunneranut akunnerni 20-ini sulisinnaasutut nalinerneqarnera. Siusinnerusukkulli suliffigisimasat kommunimit nalilersuinermi ilaatinneqartussaassapput ataatsimut qinnuteqartup sulisinnaassusianik nalilersuinermi.

Nalilersuinermi tunngavigineqassapput inuup ataatsimut qanoq inissisimanera, tamatumani inuup pineqartup suliffeqarnermut qanoq ittumik attaveqartooreersimanera, ilinniakkatigut

tunuliaqutarisai, ilaqtariinnikkut qanoq inissisimanera, ineqarnermigut qanoq inissisimanera, nappaatit, atornerluisuusinnaaneq, inooqataasutut piginnaaneri il.il.

Sulisinnaassutsimik nalilersuineq tunngaviusumik ilaatinneqassaaq §§ 10-11 naapertorlugit iliuusissanut pilersaarummik suliaqarnermi.

Imm. 3-mut

Aalajangersakkap erseqqissaatit ataasiakkaannguit eqqaassanngikkaanni maannamut Inatsisartut suliffissarsiornermut ikorsiissutinut inatsisaanni atuuttuusoq § 5 assigaa.

Suliffissarsior tunut ikorsiissutit sulinermik inuuussutissarsiuteqartutut suliffeqarluni aningaasarsiaqannginnermut taartisiatut akilerneqartarpuit, nammineq piumassuserinngisamik suliffissaaruteqqaneremi, tamatumani aamma angerlartitaagallarnermi, napparsimaner mi aamma pingortitami ajunaarnersuaqarnerani.

Nammineq pisuussutigisamik suliffissaaruteqqaneq pineqaatissiissutaasarpoq ikorsiissutinik pisartagaqarsinnaajunnaarallarnertut sap. akunnerini 4-ani, § 17 naapertorlugu.

Suliffissarsior tunut ikorsiissutit siunertaqanngillat suliffeqarnermik ingerlatsiviusuni ajornartorsiutinik allanik nassaassaasunik atorunnaarsitsiniarnernik. Assersuutigalugu inuk ajornartorsiuteqarpat oqimaatsunik kivitsisarnermigut imaluunniit sapigaqarnermigut, taava piissusissamisoornerussaaq tamakkua sullivinni avatangiisnik illersuuniarnikkut suliniutit aqutigalugit aaqqiissutissarsiniarneqarpata. Imaluunniit inuit sulisitsisuminnit suliffimmii t qimagutsinneqarpata soraarsinnagit, taamaattut aaqqiissutissarsisassaapput suliffeqarnermi illuatungeriit aqutigalugit eqqartuussivitsigulluunniit. Suliffissarsior tunut ikorsiissutit taamaattumik atorneqarsinnaanngillat ikorsiissutit sulisitsisup “kukkusumik” tunngavilimmik suliffimmii t qimagutitsineranut.

Imm. 4-mut.

Naalakkersuit piginnaatinneqarsinnaapput ersarinnerusunik malittarisassiornissanut, suliffissaaleqisunik tulluarsaqatigiinnut immikkoortitserisarnerni, siunnerfigalugu pisariaqartunik assigiaartunillu kommunini suliassaqarfimmi tassani suleriaaseqartoqarnissaata aaqqissuunnissaa. Maannamut kommunini periaasisusut assigiinngitsorujussuusimapput, tamannalu eqqortumik ingerlatsisoqarnersoq pillugu nalorninernik pilersitsisarsimalluni.

Tulluarsaqatigiinnut immikkoortitserinarneq eqqarsaatigalugu inatsit una siunertaqarpoq inuit kikkut tulluarsaqatigiinni siullerni – sulileriaannartut - inissisimanissaannik aalajangiisarnissamik.

Naalakkersuisut taamaattumik killiligaapput aalajangersaasarnissanut atorneqarsinnaasunik tulluarsaqatigiinni 1 -imi inissisimasut kikkuunerinut, inatsisini allani aalajangersakkanik qanoq paasinninnermik tunngavilinnik.

§ 2-mut

Imm. 1-imut

Suliffissarsiornermi ikorsiissutit suliffeqarnermi akissarsiaqartup akissarsianik isertitaqannginneranut taarsiutaapput. Inuit namminersorlutik suliffiuteqartut akissarsiaqartuunngillat, suliffinni suliffeqarfinnit pissarsiarineqarsinnaanngillat taamaammallu suliffissarsiornermi ikorsiissutinik pisartaqarsinnaatitaanatik.

Namminersorluni suliffiuteqarnermut nalinginnaasumik ilisarnaataavoq aningaasatigut pissarsiaqarnissaq siunertaralugu nammeneq akilikkamik ajutooruteqarfiusinnaasumillu aningaasatigut suliffimmik ingerlatsineq. Aamma piumasaqaataavoq suliffeqarfik akuttunngitsumik piffissamilu sivikitsuaraanngitsumi ingerlanneqartassasoq, suliffeqarfillu mikisuararsuussanngitsoq.

Inuit sunngiffimmi sammisaqarnermit namminneq tunisassiaminnik sullississutiminnillu tuniniaasut, assersuutigalugu namminersorlutik inuussutissarsiortutut isigineqarsinnaanngillat. Sunngiffimi ingerlatsinertut isigineqarput ingerlatsinerit piffissami aningaasatigullu killeqartut, piffissap suliffiup nalinginnaasup avataani ingerlanneqartartut.

Inuit namminersorlutik suliffiuteqartut suliffissarsiornermi ikorsiissutinik pisartagaqalerniarlutik suliffeqarfik unitsissavaat. Piffissap ilaani namminersorluni suliffiuteqarnermi suliffissarsiornermi saniatigut ikorsiissutinik pisartagaqartoqarsinnaanngilaq. Inuit namminersorlutik suliffiuteqartut pissutsit malillugit pisortat ikorsiissutaannik pisartagaqarsinnaatitaapput.

Namminersorlutik inuussutissarsiortutut isigineqarajupput piniartut, namminersorlutik aalisartut, savaatillit assigisaallu. Namminersorlutik inuussutissarsiortutut aamma isigineqarput sinniisut ilaat namminneq sulinermik ataatsimut isigalugu aaqqissuisartut, assersuutigalugu isiginnartaitsisartut, nipilersortartut il.il., taakku pisuni ataasiakkaani isiginnartaitsinermut kiisalu freelacetut oqaluttaanertut, siunnersortitut il.il. namminneq atertik atorlugu akissarsiaqartinneqarpata.

Inuit pisortani oqartussanit akuersissut tunngavigalugu namminersorlutik suliffiuteqartut namminersorlutik suliffimminnik taamaatisisutut isigineqarsinnaajumallutik akuersissut utertissavaat suliffeqarfinnillu pissarsiarineqarsinnaassallutik.

Imm. 2-mut

Aalajangersakkap Suliffeerunnermi ikorsiissutit pillugit Inatsisartut inatsisaanni § 7 -imi oqaaseqatigiit aappaat assigaa.

Inuit isertitsivimmi, napparsimavimmi paaqqinnittarfimiluunniit allami inissinneqartussatut eqqartuussaanikut imaluunniit paarineqartussatut eqqartuussaanikut suliffissarsiornermit ikorsiissutinik pisartaqarsinnaatitaanngillat. Inuit pisortani oqartussat aalajangiinerat tunngavigalugu paaqqinnittarfimmi inissinneqarnikut suliffissarsiornermi ikorsiissutinik pisartaqarsinnaatitaanngillat.

Inuit pineqartut isertitsivimmi paaqqinnittarfimmiluunniit ineqarnerminni pilersorneqarnissamik qulakkeeriniffigineqarnikuupput. Peqatigitillugu inuit pineqartut suliffeqarfinni piareersimasussaanermik pisussaaffeqanngillat, tak. kapitali 4.

§ 3-mut

Nammineq pisuussutiginngisamik suliffissaaleqilernermi akissarsiaqartutut suliffimmi isertitaqannginneq assersuutigalugu sillimmasiinerit, angerlartinneqannginnermi pikkorissarnermi peqataanermut pikkorissarnermut akiliutit atorlugit matussuserneqarpat imaluunniit inuk allamik tunngaveqartumik akissarsianit isertitanut taarsiutaasumik akissarsianit isertitaqarpat allatulluunniit ikorserneqarpat, suliffissarsiornermi ikorsiissutinit pisartagaqarsinnaatitaaneq atorunnaassaaq.

§ 4-mut

Imm. 1-imut

Angerlartitaaneq imatut paasineqassaaq, sulisitsisup qaammatisiutit malillugit sivisunerpaamik ulluni 14-ini sulianik unitsitsigallarnera. Angerlartitsineq Inatsisartut inatsisaat malillugu pissaaq nioqquqtiissiornerup nammineq pisuussutiginngisamik uninnerani.

Sulisunik nioqquqtiissiornerup uninneranik peqquteqartumik angerlartitsineq nioqquqtiissiassanik amigaateqarnernik imaluunniit silap pissutaanik peqquteqanngitsoq pissusiusut tunngavigalugit Inatsisartut inatsisaat naapertorlugu angerlartitsinertut isigineqarsinnaanngilaq. Nioqquqtiissiornermk inititsineq assersuutigalugu eqqiaanermik, pilersaarutaareersunik aserfallatsaaliinikkut suliassanik peqquteqartoq imaluunniit sulisussanik amigaateqarnernik peqquteqartoq Inatsisartut inatsisaat naapertorlugu angerlartitsinertut isigineqassanngilaq.

Nr. 1-imut

Aalajangersagaq taanna sapinggisamik atoqqiineruvoq Inatsisartut suliffeerunnermi ikorsiissutit pillugit inatsisaanni § 4-mik. Piumasaqaat “nunami nioqquqtiissiorermik” taamaattoq Inatsisartut inatsisaanni uani ingerlateqqinnejngilaq.

Nr. 2-mut

Maanna piffissami nappaassuaq atuuttoq Covid-19, pilersitsisimavoq isumaliutersuutinik nappaarit matusigallartarnernut angerlartitsisarnernullu sunniutigisartagaannik. Qinnuteqartoq /pisartagaqartoq tunillanneqarsimappat § 15-imik pineqartunut ilaassaaq.

Suliassanik amigaateqarneq alla aamma isertitassanik annaasaqarneq aalajangersakkamut matumunnga ilaassapput, suliffissarsiornermut ikorsiissutisisinnaajumalluni. Taamaattumik sulisitsisuusussaavoq angerlartitsinissamik aalajangiisussaq, taamaattumillu angerlartitsineq malittarisassanut tamanut atuuttunut ilaasoq pineqassaaq, sulisitsisup aamma sulinermik inuussutissarsiuteqartup angerlartitsinerup saniatigut allanik periarfissaqarfinginngisaa kisimi ilaassaaq.

Taamaattumik maliliisoqartariaqassaaq angerlartitsineq pisariaqarsimanersoq, pinngitsoorneqarsinnaannginnersoq pilersaarusiornikkut / suliassanik aaqqissuussinikkut, angerlartitsisarnertulli allatut. Angerlartitsinerup piumasaqaatit pineqartut naammassisimappagit, tamanna isumaqassaaq suliffissarsiornermi ikorsiissutit ullormut siullermiit tunniunneqarsinnaanerat, napparsimanertut tak. § 15-imik pineqartutut pinnani.

Imm. 2-mut

Sulisitsisup pisussaaffigaa kommunalbestyrelsimit nalunaaruteqarnermigut ilisimatitsissutigissallugu nioqquqtiissiornerup uninneranut suut pissutaaneri.

Imm. 2-mut

Sulisitsisup ingerlaannartumik kommunalbestyrelsimit ilisimatitsissutigissavaa angerlartitsisoqarpat, sulisullu kikkut angerlartitsinermut ilaaneri, aammalu angerlartitsinermut pissutaasut uppermarsaaserneqassallutik.

Imm. 3.

Naalakkersuisut piginnaatinneqarput malittarisassiornissamut sulisitsisup angerlartitsisarnerit pillugit nalunaarusiortarnissai imm. 1 aamma 2-mi pineqartut pillugit. Tamatumalu saniatigut malittarisassiortoqarsinnaavoq digitaliusunik nalunaarusiortarnissanut, kiisalu nalunaaruteqartarnissanut uppermarsaasiisarnissanullu nioqquqtiissiornerup uninnera pissutaasullu pillugit.

§ 5-imut

Imm. 1-imut

Suliffissarsiornermi ikorsiissutit taamaallaat inunnut 18-inik ukioqalereersimasut atuupput. Inuit 18-it inorlugit ukiullit pilersuinermi pisussaaffeqartut pisortat ikorsiissutaat pillugu Inatsisartut inatsisaat malillugu ikiorneqarsinnaatitaapput.

Suliffissarsiornermi ikorsiissutinik pisartagaqarniarluni inuk Kalaallit Nunaanni aalajangersimasumik najugaqassaaq inuillu allattorsimaffianni najugaa nalunaarsorsimassalluni. Ineqarneq imatut paasineqassaaq sulinngiffeqanngikkaanni, niuernermut atatillugu angalanngikkaanni, napparsimanngikkaanni assigisaallu pissutigalugit najuutinngikkallaraanni sumiiffik akuttunngitsumik siniffisartagaq pigisallu tessaniillutik.

Taamaasilluni inuk inatsisinik tunngavilimmik Kalaallit Nunaanni najugaqartariaqarpoq suliffissarsiortunut ikorsiissutinik pisinnaatitaassaguni.

Imm. 2-mut

Aalajangersakkami ilaapput inuit Kalaallit Nunaanni CPR-imik nalunaarsuiffimmik inunnik nalunaarsuivimiittut angerlarsimaffeqanngitsut. Angerlarsimaffeqanngitsut Kalaallit Nunaanni inuaqatigiinnut aalajangersimasumik atassuteqarunik suliffissarsiornermi ikorsiissutinik pisartagaqarsinnaatitaapput. Inuk nammineq Kalaallit Nunaanni inuaqatigiinnut annertuumik atassuteqarpat Kalaallit Nunaanni inuaqatigiinnut aalajangersimasumik atassuteqassaaq.

Inuk Kalaallit Nunaanni inuaqatigiinnut aalajangersimasumik atassuteqarnersoq pisuni ataasiakkaani nalilersuivinneq apeqquaassaaq. Tassani assersuutigalugu ilaapput inuit Kalaallit Nunaanni inunngortut peroriartortullu aamma inuit Kalaallit Nunaanni aalajangersimasumik najugaqartunik qanimat qanigisaqtut.

Inuup Kalaallit Nunaata avataani najugaqarsimanera piffissami killimmi inuullu Kalaallit Nunaanni najugaqalinnginnermini inuaqatigiinnut inuup najugaqarfigisaanut annertuumik atassuteqalersimannnginnera nalilersuinermi ilaasinnaapput.

Aamma inuk Kalaallit Nunaanni najugaqalernermini nunamut inuup najugaqarfigisimasaminut peqatigitillugu atassuteqarunnaarsimanera nalilersuinermi ilaasinnaavoq.

Inuit inuusunnerit Kalaallit Nunaanni inunngortut peroriartortullu Kalaallit Nunaata avataani inuuneq misilinniarlugu Danmarkimi piffissap ilaani najugaqarnissamik toqqaasimasut Kalaallit Nunaannut angerlarnermi inissamik aalajangersimasumik nassaarniarnissaq

ajornartorsiutigisinnavaat. Taamatut pisoqarnerani inuk Kalaallit Nunaanni inuiaqatigiinnut aalajangersimasumik atassuteqarnermigut suliffissarsiornermi ikorsiissutinik pisartaqarsinnaavoq.

§ 6-imut

Imm. 1-imut

Taaguut ‘piareersimasussaaneq’ imatut paasineqassaaq suliffissarsiornermi ikorsiissutinik pisartagaqartoq suliffeqarfinit pissarsiarineqarsinnaassasoq. Taaguut piareersimasussaaneq aamma kinguneqarpoq suliffissarsiornermi ikorsiissutinik pisartagaqartoq kommunalbestyrelsimit pissarsiarineqarsinnaassasoq kommunalbestyrelsimmillu suleqateqarnermi peqataassasoq sulisinnaassutsinilu atussallugu imaluunniit sulisinnaassutsimi ineriertortinnissaannut pitsanngortinnissaanullu peqataassalluni.

Piareersimasussaanermut ilaavoq suliffissarsiornermi ikorsiissutinik pisartagaqartoq ullumik ataatsimik siumut nalunaarfigineqarluni atorfimmi neqeroorutigineqartumi innersunneqartumiluunniit inuup sulisinnaassusianut naleqquttumi sulilersinnaassasoq. Piareersimasussaanermut aamma ilaavoq suliffissarsiornermi ikorsiissutinik pisartagaqartoq ataatsimiinnerni ingerlatsinerniluunniit kommunalbestyrelsimit aallartinneqartuni peqataassasoq.

Suliffissarsiornermi ikorsiissutinik pisartagaqartoq sulisinnaassutsiminut naleqquttumik tamassumalu kinguneranik suliffimmi innersunneqartumi sulisinnaanersoq kommunalbestyrelsi naliliisuussaaq. Nalilersuineq taanna suliffissarsiornermi ikorsiissutinik pisartagallip sumik suliaqarsinnaaneranik missingersuineq aallaavigalugu pissaaq.

Inuup suliffissarsiornermi ikorsiissutinik pisartagaqartup taamaalilluni assersuutigalugu siusinerusukkut qanoq isertitaqarsimanermut tunngavilersuilluni, sulisitsisup isumaqatigiissusiorsimannginneranik imaluunniit neqeroorutigineqartoq siusinnerusukkut suliffigisimasamut, ilinniagaqarnermut assigisaannulluunniit naleqqutinnginneranik tunngavilersuilluni atorfimmi neqeroorutigineqartumi innersunneqartumiluunniit sulilernissaq kinguneqanngitsumik itigartissinnaanngila.

Suliffissarsiornermi ikorsiissutinik pisartagaqartup atorfik suliffigisinnappa, suliffissarsiornermi ikorsiissutinik pisartagaqartoq atorfimmi sulilissaaq. Taamaattoqanngippat suliffissarsiornermi ikorsiissutinik pisartagaqartoq suliffeqarfinit kommunalbestyrelsimmilluunniit pissarsiarineqarsinnaanngilaq killilersuiffigineqarsinnaallunilu, tak. §§ 17-18.

Suliffissarsiornermi ikorsiissutinik pisartagaqartoq illoqarfimmiinngikkuni nunaqarfimmiinngikkuniluunniit inuk piffissami peqanngiffimmini pissarsiarineqarsinnaanngilaq, kisiannili napparsimanerup kinguneranik peqannginneq pinnagu.

Peqannginneq assersuutigalugu tassaasinnaavoq sunngiffimmi piniariarnermut aallaaniarnermullu imaluunnit inuup nammineq illoqarfigisaata nunaqarfifisaataaluunniit avataani tikeraarnermut atatillugu. Suliffissarsiorup taamaasilluni sulilernissamut piareersimasuunissa oqaatigineqarpoq § 6, imm. 1-imi, erseqqissaataasumik oqaasertalerlugu “sukkulluunniit suliartoqquneqarnissamut piareersimasussaavoq”.

Suliffissarsiornermi ikorsiissutit ikorsiissutaasut akissarsiaqartup suliffeqarnermini akissarsianit isertitaqannginneranut taarsiutaanerat uani aamma pingartinneqarpoq.

Suliffissamik innersuunneqartumik tigisisussaanermut atatillugu tamanna paasineqassaaq ullukkut piffissami nalinginnaasumi suliffissaq, unnuarsiornerunngitsoq.

Imm. 2-mut

Suliffissarsiornermi ikorsiissutinik pisartaqartut najukkami Majorami suliffissarsiorputut kommunalbestyrelsimit nalunaarsorneqarsimassapput.

Suliffissarsiornermi ikorsiissutinik pisartagaqartut piareersimasussaanermut pisussaaffii ilaautut pineqartup suliffeqalersinnaanera siunertalarlugu kommunalbestyrelsip ingerlatsinerani ataatsimiisitsineranilu peqataasassasut aalajangersakkami erseqqissarneqarpoq.

§ 7-imut

Imm. 1-imut

Suli.gl tassaavoq nuna tamakkerlugu suliffeqarnermut nittartagaq Namminersorlutik Oqartussanit pilersinneqartoq. Suliffeqarnermut nittartagaq innuttaasunut suliffeqarfinnullu tamanut ammavoq. Suliffissarsiornermi ikorsiissutinik pisartagaqartut suli.gl-imi suliffissarsiorputut aamma CV-ertik nutarterlugu nalunaartussaatitaapput.

Suliffeqarfiit aalajangersimasunik misilittagalinnik piginnaasalinnillu suli.gl-imi ujarlernissamut suliffissaaleqisunullu suli.gl aqqutigalugu mailikkut/nalunaaruteqarnikkut attaveqarnissamut periarfissaqassapput. Suliffissaaleqisut taamatuttaaq atorfinnik inuttaqanngitsunik qinnuteqaateqarsinnaapput.

Imm. 2-mut

Suliffissarsiornermi ikorsiissutinik pisartagaqartoq sapaatip akunneranut ataasiarluni suliffissarsiornermik suli.gl-imi nalunaarsuinermik nutarterisussaatitaavoq. Suliffissarsiornermi ikorsiissutinik pisartaqartup suliffissarsiornermik nalunaarsuineq nutartinngippagu pineqartup piareersimasussaanermik pisussaaffeqarneq eqqortissanngilaa killilersuiffigineqassallunilu, tak. kapitali 7.

§ 8-mut

Imm. 1-imut

Suliffissarsiornermi ikorsiissutinik pisartagaqartut sulisinnaassutsiminut naleqquttumik ingerlaavartumik qinnuteqartassaaq. Suliffissarsiornermi ikorsiissutinik pisartagaqartup assersuutigalugu suli.gl-imi, Facebook-imi aamma inuit internetimi attaveqaqatigiittarfianni allani imaluunniit nuna tamakkerlugu najukkanilu aviisini, tassunga ilanngullu www.sermitsiaq.ag -mi sulisussarsiornermi immikkoortumi atorfinnik qinnuteqarnermigut sulisinnaassutsini atorniarsarissavaa. Suliffissarsiortunut ikorsiissutinik pisartagaqartoq atorfinnik inuttaqanngitsunik sulisinnaassutsiminut naleqquttunik qinnuteqanngikkuni pineqartup suliffeqarfinnut piareersimasussaanermik pisussaaffik eqqortissanngilaa.

Pisussaaffik akunnerit amerlassusaat sivisussuserluunniit apeqqutaatinnagit atuuppoq. Suliffissarsiornermi ikorsiissutinik pisartagaqartoq suliffissarsiornermi ikorsiissutinit akunnerni ikerusuni sulisarluni suliffeqalerpat pineqartoq akunnerit amerlassusaat akissarsianit isertitat katersorneqartut ilanngaatigalugit suliffissarsiornermi ikorsiissutinik pisartaqassaaq, tak. § 24.

Imm. 2-mut

Suliffissarsiornermi ikorsiissutinik pisartagaqartut suliffissaarusimasuupput suliffeqalernissamullu piareersimallutik. Taamaammat ullumik ataatsimik siumut nalunaarfigineqarlutik suliffik inuttaqanngitsoq suliffigilersinnaavaat suliffigelisallugulu. Aalajangersakkami oqaaseqatigiinni siullermi ilaavoq atorfik najukkami Majoriaq aqutigalugu suliffissaaleqisumut innersunneqartoq. Aalajangersakkami oqaaseqatigiit aappaanni ilaapput atorfik sulisitsisup suliffissaaleqisup atorfingilersinnaasaatut neqeroorutigisaa.

Suliffissarsiornermi ikorsiissutinik pisartagaqartup atorfik pineqartup sulisinnaassusianut naleqquttoq innersunneqartoq neqeroorutigineqartorluunniit suliffigelinngippagu pineqartup piareersimasussaanermik pisussaaffini eqqortissanngilaa.

§ 9-mut

Suliffissarsiornermi ikorsiissutinik pisartaqarnissamut piumasaqaataavoq suliffissaaleqisup siumut suliniuteqarani sapaatip akunneranut sivikinnerpaamik akunnerni 20-ni nalinginnaasumik suliffeqarsinnaanissaa, tak. § 1, imm. 2.

Atugassaritinneqartut nalinginnaasut atorlugit atorfittut isigineqarpoq atorfik inuup qinnuteqartup ukiui, sulinermik misilittagaqarfia, ilinniarsimanermilu tunuliaquteqartup suliffigisinnaasatut nalinginnaasumik ilimagineqartoq.

Inuup sulisinnaassusia sapaatit akunneranut akunnerit 20 qaangerneraat ataanneraaluunniit nalilersuinermi apeqqutaavoq. Kommunalbestyrelsi suliffissarsiornermi ikorsiissutinut, suliffeqalernissamut piukkunnarsarnermut imaluunniit pisortat ikorsiissutaannut nalinginnaasumik innersuussinerup ilaatut nalilersuissaaq.

Inuup inissisimanera tamarmiusoq nalilersuinermi apeqqutaavoq, tassunga ilanngullugit inuup maannamut suliffeqarsimanera, ilinniagaqarnermi tunuliaquataa, ilaqtariinnermi pissutsit, ineqarnermi pissutsit, napparsimaneq, atornerluineq, inuit attaveqaqatigiittarneranni piginnaasat il.il.

§ 9 malillugu nalilersuineq § 10 malillugu iliuusissatut pilersaarusiornissamik aallarnisaataasumik suliaqarnerup ilagissavaa.

§ 10-mut

Imm. 1 -imut

Kommunalbestyrelsi inunnut suliffissarsiornermi ikorsiissutinik pisartagaqartunut tamanut iliuusissatut pilersaarusiornissamik inatsisit malillugit pisussaaffeqarpoq.

Iliuusissatut pilersaarut innuttaasup tunuliaquataa nukissaalu tunngavigalugit suliarineqassaaq. Kommunalbestyrelsi inuup taassumalu nukissaasa iliuusissatut pilersaarummik suliaqarnermi ilanngunneqarnissaannik qulakkeerinnittumik aalajangersimasumik suleriaasiliorsinnaavoq. Tamanna suliniutissap eqqortup toqqarnissaanut tapersiisinnaavoq. Iliuusissatut pilersaarut tamassuma saniatigut suliffissaaleqinermi naammattunik paassisutissaateqarluni tamanillu isiginnilluni erseqqarissumik suleriaatsitut innuttaasup isiginninnissaanut tapersiisaaq.

Iliuusissatut pilersaarut innuttaasunut ataasiakkaanut anguniakkanik anguniakkallu anguneqarnissaanut suliniutissanik aallartinneqartussanik allaaserinninnermik imaqassaaq. Iliuusissatut pilersaarut pineqartoq suleqatigalugu aamma pissutsinik tamanik isiginninneaq aallaavigalugu suliarineqassaaq.

Suliffissarsiornermi ikorsiissutinik pisartagaqartut suliniutissanik aalajangersimasunik sunik neqerofigineqassanersut malinneqartussanik inatsisitigut piumasaqaateqartoqanngilaq. Kommunalbestyrelsip tamanik isiginilluni suliniutissanik neqerooruteqarnissaa inatsisitigut pisussaaffiussaaq.

Iliusissatut pilersaarummi siunertaq tassaavoq suliniutinut suliffissarsiornermi ikorsiissutinik pisartaqartumut suliffeqarfinnut qaninnerulersitsisussanut tunngatillugu innuttaasut ataasiakkaat qitiutinnissaat. Tamassumani suliniutit innuttaasunut ataasiakkaanut naleqqussarsinnaanissaat pisariaqarpoq, communalbestyrelsi taamaammat suliniutit suut inunnut ataasiaakkaanut neqeroorutigineqarnerannut tunngatillugu tamatigoortuussaaq. Aamma siunissami suliniutissat ineriartortinnissaanut, suliniutit nutaalphiusut nutaat atornissaannut periarfissaqassaaq.

Kommunalbestyrelsi iliussatut pilersaarummi anguniakkanik suliniutissanillu inaarutaasumik aalajangiissaaq.

Imm. 2-mut

Suliffissarsiornermi ikorsiissutinik pisartaqartoq sumi najugaqarnersoq apeqquataalluni suliniutit suut iliussatut pilersaarummut ilanngunneqassanersut nalilerneqartussaavoq. Tassani najugaqarfiup angissusia aamma najukkami suliffeqarnissamut ilinniaqarnissamullu periarfissat immikkut apeqquataassapput. Suliffissarsiornermi ikorsiissutinik pisartagalik aappaqarpat angerlarsimasunillu meeraqarpat suliffeqarnissamik neqeroorutip atorneqarsinnaaneranut imaluunniit najugaqarfiup avataani suliamik ingerlatsinermi piginnaasaqalerfiusumik ingerlatsinissap naammassinissaanut periarfissanik nalilersuinermi ilanngunneqassapput.

Iliusissatut pilersaarut piviusorsiortuussaaq, aamma suliffissarsiortunut ikorsiissutinik pisartagaqartup isaanit isigalugu. Iliusissatut pilersaarut communalbestyrelsip suliffissarsiornermi ikorsiissutinik pisartaqartumut nalinginnaasumik piumasaqaateqarneranik takutitsissangilaq. Tamassuma iliussatut pilersaarut pappilissatigut pilersaarutaapput aammalu allannguisussamik pilersaarutaanngippat iliussatut pilersaarutip tatiginartuunera ajoquersinnaavaa.

Siullermik annikinnerusunik piviusorsiortunillu suliffissarsiornermi ikorsiissutinik pisartagaqartup naammassisinnaasaanik suliniuteqarnissaq tunngaviusumik pitsaunerussaaq, taamaalillunilu iluatsitsinermik misigissalluni. Suliniutit iliussatut pilersaarummi allaaserineqartut naammassineqarpata iliussatut pilersaarut nutaaq ingerlatassanik anguniagassanillu nutaanik imaqartoq isummerfigineqassaaq. Taamaammat suliffissarsiornermi ikorsiissutinik pisartagaqartup suliniutinik naammassinnissaanera nalorninarpal suliniutinik piumasaqaateqarnissaq pisariaqartinneqassangilaq.

Pisortanit ikorsiissutit pillugit inatsimmi aamma aalajangersarneqarpoq iliuusissanut pilersaarusiornissamut piumasaqaat. Taamaattoq inatsimmi matumani piareersimasussaanermut piumasaqaat annertuneruvoq, soorluttaaq inuit sulileriaannaasut suliassamik nutaamik tigusinissamut piareersimanerusutut pikkorissarumanerusutullu naatsorsuunneqartut il.il. taamaattumillu erseqqissarneqarluni inunnut sulileriaannaasunut iliuusissanut pilersaarussiaq piviusorsiortuussasoq.

Imm. 3-mut

Suliniutini tamani pissutsinik tamanik isiginnittoqassaaq. Kommunalbestyrelsip suliffissarsiornermi ikorsiissutinik pisartagaqartumut iliuusissatut pilersaarummik suliaqarnermini pineqartup inisisimaneranik tamarmiusumik isiginninniarnissaa inatsimmi pituttuutaasumik piumasaqaataavoq: ilaqtariinnermi pissutsit, napparsimaneq, inuit attaveqaqatigiittarneranni piginnaasat, ineqarnermi pissutsit il.il, taakku pineqartup suliffeqalernissamut piareersimaneranut pingaaruteqarpata. Kommunalbestyrelsip suliffissarsiornermi ikorsiissutinik pisartaqartup ajornartorsiutaanik nalilersuissaq tamassumalu kingorna iliuusissatut pilersaarummi suliniutissat anguniagassallu suliarissallugit.

Imm. 4-mut

Kommunalbestyrelsi ilinniagaqarneq isigniarlugu inuuusuttunut 18-it 29-illu akornanni ukioqartunut iliuusissatut pilersaarummi anguniagassat suliniutissallu suliniutiginissaannik inatsisitigut pisussaaffeqarpoq. Taamaaliortoqarsinnaappat suliffissarsiornermi ikorsiissutinik pisartagaqartup imminut isumagilersinnissaa suliffissarsiornermi ikorsiissutini immikkut anguniagaavoq. Ilinniagaqarneq pissutsit taamaaginnartillugit suliffissarsiornermi ikorsiissutinik pisartagaqartup sulisinnaassutsimik pitsaanerusumik atuisinnaaneranut ineriartortitsisinnaaneranullu taamaalillunilu imminut pilersornissaanut tapersiissaq. Peqatigitillugu suliffeqarnermi aalajaatsuuneq ilinniagaqarnerullu qaffasissusia imminnut atapput. Taamaammat inuuusuttunut 18-it 29-llu akornanni ukiulinnut iliuusissatut pilersaarutini ilinniagaqarneq isigniarneqassaaq.

§ 11-imut

Imm. 1-imut

Iluusissatut pilersaarut § 10 malillugu suliffissarsiornermi ikorsiissutinik pisartagaqartoq suleqatigalugu suliarineqassaaq. Kommunalbestyrelsip suliffissarsiornermi ikorsiissutinik pisartagaqartup pisussaaffii aamma ikorsiinermi atugassaritinneqartut naggataatigut inaarutaasumik aalajangissavai.

Suliffissarsiornermi ikorsiissutinik pisartaqartup qinnuteqartup piujuartumik suliffeqalernissamut periarfissaanik pitsannguinissamik aamma qinnuteqartup suliffeqarnissaanut pitsannguinissaq taamaalillunilu imminut pilersornissaa siunertaralugit ingerlatsinerni peqataanissaannik pisussaaffiliinissamut communalbestyrelsi aalajangersakkami piginnaatinneqarpoq.

Kommunalbestyrelsip suliffissarsiornermi ikorsiissutinik pisartaqartumut ingerlatsinernik sunik pisussaaffiliisinjaanerannik aalajangersagaq tamakkiisumik allaaserinninnerunngilaq. Ingerlatsinernik toqqaaneq piviusorsiorumik siunertanut ilaquaassaaq. § 11-p kinguneranik anguniakkat ingerlatsinerillu piviusorsiorut iliuusissatut pilersaarummi allanneqassapput.

Suliffissarsiornermi ikorsiissutinik pisartagaqartup assersuutigalugu atornerluinermik katsorsaanermi peqataanissaannik communalbestyrelsip peqqusinnaavaa. Periarfissarli taanna mianersorluni atorneqartariaqarpoq. Suliffissarsiornermi ikorsiissutinik pisartagaqartoq aanngajaarniutinik pinngitsuisinjaanermik katsorsartinnissamut akerliuppat, anguniagaq piviusorsioruunersoq tamannalu pillugu iliuusissatut pilersaarummi piumasaqaataassanersoq communalbestyrelsip nalilersortariaqarpaa. Inuit aanngajaarniutinik pinngitsuisinjaavinngitsut tulluarsaqatigiinni 1-im iilaanersut ataatsimut isigalugu apeqquserneqarsinjaavoq.

Imm. 2-mut

Aallaavittut ajornarpoq pisartagaqartup iliuusissanut pilersaarusiamik naammagittaalliuteqarsinjaanera, taanna illugiilluni isumaqatigiissutaasussaammat aallaavittut, communalbestyrelsip pisartagaqartullu akornanni. Kommunalbestyrelsiilu taamaattoq iliuusissani pilersaarummi pisartagaqartumut piumasarisinnaavai iliuusissat ingerlanneqartussat, pisartagaqartup tamakkiisumik isumaqatiginngisai. Pisussaaffiliussinerit taamaattut pisortanit aalajangiinerussapput, Pisortat ingerlatsineranni suliassat suliarineqartarerat pillugu inatsit naapertorlugu. Taamaattoq tak. imm. 3, illuatungiusunik tusarniaasussaaneq pillugu.

Imm. 3-mut

Pisortat ingerlatsiviini aalajangiisarnernut atatillugu piumasaqaatit atortinneqassanngillat, isiginiarlugu tamanna killiliisuussammat ullormiit ullormut suliffissamik innersuussisarnermut, pikkorissartitsisarnernut il.il.

Kommunalbestyrelsimit periarfissaassaaq innuttaasumut ingerlatsinernik pilersitsisinjaaneq, tassanngaannaq periarfissangortunik. Matuman aamma suliffissamik naleqquttumik peqaleriasaartarnera, pikkorissartitsivissani inissaqaleriasaarsinjaanera, imaluunniit nalileqqinnikkut aalajangiinneqarpat pineqartup ingerlatassani aalajangersimasuni peqataanissa aaleqquttuussasoq.

Taamaattoq aalajangiineq pisartagaqartup angerlarsimaffigisani qimallugu sumiiffimmut allamut suliartoqqusaasinnaaneranik pineqartumut akulerunnerussaaq annertooq, taamaattunillu illuatungeriinnik tusarniaasussaaneq saneqqtiiinnarneqarsinnaannngilaq.

§ 12-imut

Imm. 1-imut

Oqaaseqatigiinni siullerni aalajangiunneqarpoq suliffissarsiortunut ikorsiissutinik pisartagaqartup Inatsisartut inatsisaat naapertorlugu iliuusissanut pilersaarusiaq malittussaagaa.

Iliuusissatut pilersaarut ingerlaavartumik nalilersorneqartassaaq, nalilersoqqinnejartassaaq aaqqinneqartarlunilu. Suliffissarsiornermi ikorsiissutinik pisartagaqartup suliffeqartiinnarnissaata ukkatarineqartuartarnissaa qulakkeerniarlugu pineqartumut iliuusissatut pilersaarut minnerpaamik qaammatit pingasukkaarlugit nalilersorneqartassaaq, nalilersoqqinnejartassaaq aaqqinneqartassallunilu. Iliuusissatut pilersaarummik nalilersuinermi, nalilersueqqinnermi aaqqiinermilu suliffissarsiornermi ikorsiissutinik pisartagaqartup sulisinnaassusiata annertusarnissaa isigniarneqassaaq, taamaalilluni pineqartoq siunissami suliffissarsiornermi ikorsiissutinik pisartagaqarani imminut pilersorsinnaaniassammat.

Imm. 2-mut

Ilimagineqarpoq inuit § 4 naapertorlugu angerlartinneqartut piffissap sivikitsup ingerlanerani suliffeqalissasut. Taamaammat pisortat suliffissaaleqisumut iliuusissatut pilersaarusiornermut atuinerat piffissaajaataassaaq.

Inuit § 4 naapertorlugu angerlartinneqartut soraarsinneqanngillat sulilu suliffeqarlutik, kisiannili piffissami angerlartitsiviusumi akissarsiaqartinneqanngikkunik suliffeqarfinnut piareersimasussaanermik pisussaaffeqarput. Taamaammat angerlartinneqartut suliffissamik innersunneqarsinnaapput, taakkuli piujuartumik suliffissamik innersunneqarunik angerlartinneqarfigisaminni soraarniuteqarnissaq eqqumaffigissavaat.

Inuit suliffissarsiortunut ikorsiissutinik pisartagaqartut § 4 naapertorlugu angerlartinneqartut suliffeqarfinnut allanut piareersimasussaanermik pisussaaffeqarput.

Imm. 3-mut

Naalakkersuisut kapitali 3-mut tungasunik malittarisassiornissamut piginnaatinneqarput.

Naalakkersuisut iliuusissatut pilersaarutit suliarineqarnerat piviusunngortinnejnarnerallu pillugit malittarisassiornissamut piginnaatinneqarput. Naalakkersuisut ingerlatat iliuusissatut pilersaarutini ilaasut pillugit malittarisassiussapput, tassunga ilanngullugit malittarisassat suliffissarsiornermi ikorsiissutinik pisartagaqartup napparsimanermi katsorsartinnissaannik pisussaaffiliisut. Napparsimanermi katsorsartinnissamik pisussaffiliinermi qinnuteqartup taamaallaat piujuartumik suliffeqarnissamut periarfissaata pitsanngortinnissaanik aamma qinnuteqartup suliffeqarnissaata pitsanngortinnissaanik taamaalillunilu imminut pilersornissaanik siunertarineqassaaq.

§ 13-imut

Imm. 1 -imut

Suliffissarsiornermi ikorsiissutinik pisartagaqartut ukiuni arlalinni pisartagaqaannarsinnaanerat pinngitsoorniarlugu piareersimasussaanermik pisussaaffeqarneq suliffissaaleqisunut 18-it 29-llu akornanni ukiulinnut ukiup ataatsip qaangiunnerani aamma 30-t sinnerlugillu ukiulinnut sukateriffigineqarpoq. Nunami sumiiffinnut allanut nuussinnaaneq pillugu piumasaqaateqartoqarsinnaavoq, suliffissarsiorlorlu suliffissat malersorlugit nuussinnaassalluni.

Angerlarsimaffittut isigineqassaaq inuup pineqartup aalajangersimasumik najugaqarfigisaa, imaluunniit najugaa. Angerlarsimaffigisap avataa, illoqarfik imaluunniit nunaqarfik qimallugu, pineqartup najugarisaa. Suliffissaq innersuunneqartoq aamma sulinermik sungiusarneq il.il. illoqarfifisami imaluunniit nunaqarfifisami itigartinneqarsinnaanngilaq.

Sulileriaannaanissaq sukateriffigineqartumi aamma pineqarpoq suliffissarsiornermi ikorsiissutinik pisartagaqartoq imminut pilersornissaminut piumassuseqarnermik takutitsissasoq. Suliffissarsiornermi ikorsiissutinik pisartagaqartup angerlarsimaffiup avataani suliffittaarnissamik periarfissaqartillugu pisortanit pilersorneqarlungi angerlarsimaffimmiginnarnissani ilimagisinnaanngila. Kalaallit Nunaata peqatigitillugu inuiaqatigiittut inuit pisortanit ikorsiissutinik pisartagaqarlutik piffissami sivisuumi suliffissaarusimanissaat peqatigitillugulu allani atorfennik inuttassaaleqisoqartillugu akissaqartinngila.

Suliffissarsiornermi ikorsiissutinik pisartagaqartoq 18-it 29-llu akornanni ukioqartoq qaammatini aqqaneq-marlunni suliffissarsiornermi ikorsiissutinik pisartagaqartoq angerlarsimaffiup avataani suliffimmik piffissaq tamaat neqeroorutigineqartoq innersuunneqartorluunniit akuerissallugu pisussaaffeqarpoq. Piffissaq tamaat suliffimmi ilaanngillat ukiup ilaannaani suliffissat, ullup ilaannaani suliffissat, paarlatsitut suliffissat, sivikitsumi suliffissat il.il.

Suliffissarsiortup qanoq sivisutigisumik suliffeqarsimaneranik aalajangiisarneq pillugu § 26-imut innersuussisoqassaaq.

Imm. 2-mut

Inuk 30-it sinnerlugillu ukioqartoq suliffissarsiortunut ikorsiissutinik katillugit qaammatini 24-ini pisartagaqareeraangat malittarisassat inunnut 18-29-inut ukiulinnut atuuttut atuutilertassapput, tak. imm. 1.

Imm. 3-mut

Assigisaanik communalbestyrelsi suliffissarsiortunut ikorsiissutinik pisartagaqartumik pisussaaffiliisinnaavoq illoqarfiup angerlarsimaffigisaata avataani aaqqissuussinernut peqataanissamik.

Illoqarfiup /nunaqarfiup angerlarsimaffigisap avataani peqataanissaq piffissami killimmi pisussaasinnaavoq, kisiannili tamatigut siunnerfeqassalluni suliffissarsiornermut ikorsiissutinik pisartagaqartup suliffeqalernissamut periarfissaasa nukitorsarneqarnissaannik, taamalu imminut pilersortunngornissaanut.

Imm. 4-mut

Suliffissarsiornermi ikorsiissutinik pisartagaqartoq suliffimmi inissiamik naleqquttumik innersuussisoqarsinnaanngippat angerlarsimaffiup avataani atorfip neqeroorutigineqartup innersuunneqartulluunniit akuerinissaanut pisussaaffeqanngilaq. Inissiatut naleqquttutut assersuutigalugu isigineqarpoq inissiaq attartortagaq taamatut angissuseqartoq pitsaassuseqartorlu nalinginnaasoq A/S Inissiaatileqatigiiffik INI imaluunniit Iserit A/S imaluunniit namminersortut aqqutigalugit inissiaq innersuunneqartoq.

Nalinginnaasumik qinnuteqarnermi najukkami inissianik attartortitsisartoq aqqutigalugu atorfimmi sulilinnginnermi innersuussisoqarsinnaappat, suliffissarsiornermi ikorsiissutinik pisartagaqartup ilaqutaasalu inissiamik pissarsisinnaanerattut isigineqassaaq.

Suliffissarsiornermi ikorsiissutinik pisartagaqartoq taassumaluunniit aappaa angerlarsimaffimmi attartortitamik inissiaqarpat, andelsboligeqarpat imaluunniit inissiamik attartortitamik ineqarpat inissiamik tunisisariaqarsinnaapput attartortitsisariaqarpulluunniit. Suliffissarsiornermi ikorsiissutinik pisartagaqartup pineqartup angerlarsimaffimmi pigisamik inissiaateqarnini andelsboliguteqarniniluunniit pissutigalugu angerlarsimaffiup avataani atorfik neqeroorutigineqartup innersuunneqartulluunniit akueriumanngissinnaanngilaa. Pineqartup taamaattoqassappat piareersimasussaanermik pisussaaffeqarnini eqqortissanngilaa.

Kommunalbestyrelsip suliffissarsiornermi ikorsiissutinik pisartaqartoq angerlarsimaffiup avataani imm. 3 malillugu ingerlatsinerni peqataanissaanik peqquppagu, communalbestyrelsi piffissami ingerlatsisoqarnerani illusimavissamik innersuussissaq.

Suliffissarsiornermut ikorsiissutinik pisartagaqartoq illusimavissamik innersunneqarpat angerlarsimaffiup avataani ingerlatsinerni peqataajumanngissinnaanngilaq.

§ 14-imut

Imm. 1-imut

Aalajangersakkami suliffissarsiornermi ikorsiissutinik pisartagaqartoq qaammatini arfinilinni imminnut atasuni suliffissarsiornermi ikorsiissutinik pisartagaqarsimaguni suliffissarsiornermi ikorsiissutinik pisartagaqarluni ulluni 14-ini isumaqatigiissutaasumik sulinngiffeqarnissamik periarfissinneqarpoq.

Sulinngiffeqarneq sulinngiffeqarnerup aallartinnginnerani sivikinnerpaamik sapaatit akunnerinik sisamanik sioqqutilluni communalbestyrelsimeut isumaqatigiissutigineqassaaq aammalu suliffissarsiornermi ikorsiissutinik pisartagaqartup kissaatigisaatut ullumi ataatsimi ataatsikkulluuniit sulinngiffeqarnerusinnaalluni.

Suliffissarsiornermi ikorsiissutinik pisartaqartoq sulinngiffeqarnermini suliffissarsiornermi ikorsiissutinik pisartagaqarnermut piumasaqaatit nalinginnaasut eqqortissavai.

Suliffissarsiornermi ikorsiissutinik pisartagaqartup sulinngiffeqarnermini soorunami piareersimasussaanermut pisussaaffik atussanngilaa.

Imm. 2-mut

Suliffissarsiornermi ikorsiissutinik pisartagaqartoq siusinnerusukkut suliffimminit sulinngiffeqarnersiuteqarluni sulinngiffeqarsinnaatitaanermut katersisimappat, pineqartoq suliffissarsiornermi ikorsiissutinik pisartagaqarsinnaatitaannginnermini taamatut sulinngiffeqarnissamik pisussaaffeqarpoq. Aalajangersakkap § 3 tunngaviusumik assigaa, taannalu malillugu isertitaqannginneq akissarsianit isertitanut taarsiutaasumik allatut ikorsiissutinit matussuseqarsinnaappat suliffissarsiornermi ikorsiissutinik pisartaqarsinnaatitaasoqanngilaq. Inuk suliffissarsiornermi ikorsiissutinik pisartaqartillugu sulinngiffeqarneq tamarmiusup sapaatit akunneri marluk qaangersinnaanngillat. Inuup sulinngiffeqarnersiutinik pissaqarluni sivisunerusumik sulinngiffeqarnissaq kissaatigippagu inuup suliffissaaleqisuuneq Majoriami taamaatissavaa.

Imm. 3-mut

Inuk sulinngiffeqarnermini suliffissarsiornermi ikorsiissutinik pisartagaqarumalluni suli suliffissaaleqisuussaaq. Suliffissarsiornermi ikorsiissutinik pisartagaqartoq sulinngiffeqarnermini suliffissarsiornermi ikorsiissutinik pisartaqartilluni sulifeqarsinnaanngilaq.

Taamaammat aalajangersarneqarpoq suliffissarsiornermi ikorsiissutinik pisartagaqartoq, isumaqatigiissutigisamik sulinngiffeqarnermi suliffissarsiortutut suli.gl-imi nalunaarsussanngitsoq. Taamaattoqanngippat inuk suliffissaaleqisutut suliffissiortutullu isigineqassanngilaq aammalu suliffissarsiornermi ikorsiissutinik pisartaqarsinnaatitaaneq atorunnaassaaq. § 7 § 14, imm. 3 malillugu allannguutit ilanngullugit atutissaaq. Sulinngiffeqarneq naammassineqariarpal suliffissarsiornermi ikorsiissutinik pisartagaqartoq suli.gl-imi suliffissaaleqisutut nalunaaqqissaad.

§ 15-imut

Imm. 1-imut

§ 3-ip kinguneraa suliffissarsiortunut ikorsiissutinik napparsimanerup nalaani taamaallaat pisartagaqartoqarsinnaasoq inuk pineqartoq atorfqarnerminut atatillugu napparsimanerup nalaani akissarsiaqartinneqanngippat.

Aalajangersikkami taamaallaat napparsimaneq pineqarpoq, tassani suliffissarsiornermi ikorsiissutinik pisartagaqartoq tamakkiisumik ilaannakortumilluunniit sulisinnaassuseqarani. Suliffissarsiornermi ikorsiissutinik pisartagaqartoq ataavartumik sulisinnaassuseqarunnaarluni napparsimappat tamanna kinguneqassaaq inuk suliffissaqalernissamut piareersimanersoq pineqartorluunniit pisortat pilersuinerannut, tassunga ilanngullugu piujuartumik pisortat pilersuinerannut, nuussanersoq kommunalbestyrelsip nalilersoqqittariaqarpaa.

Ullut pisartagaqarfiunngitsut Suliffissaarunnermut ikorsiissutit pillugu Inatsisartut inatsisaanni § 10, imm. 2, oqaaseqatigiit siullit aaqqissusseqqinnermi allanngortinnejarnissaa kissaatigineqanngilaq, taamaattumillu suli aallaaviuvoq sulinermik inuussutissarsiuteqartup nammineq imaluunniit sulifeqarnermut isumaqatigiissut aqutigalugu ullut napparsimaffiusut siullit marluk akilertassagai.

Sulitilluni ajoqusernerit sulinnginnermik kinguneqartartut napparsimasumik oqaatsimut ilaapput, nalinginnaasumillu sulinermik inuussutissarsiuteqartoq pisuni taamaattuni Sulitilluni Ajoquserneq pillugu Kalaallit Nunaanni inatsimmi aalajangersakkat naapertorlugit pineqartussaalluni, taamaammallu akissarsiatigut isertitaqannginneq sulitilluni

ajoqusernermik pissuteqartoq sillimmasiinikkut imaluunniit akissarsiassaraluanut taartisiaqarnikkut matussuserneqartarlutik, taamaattumillu suliffissarsioruntunut ikorsiissutinik pisartagaqarsinnaaneq atorunnaartarluni, tak. § 3.

Napparsimanerni mattussaagallarnermik piffissami aalajangersimasumi kinguneqartuni piffissaq taanna napparsimanermik taagukkanut ilaassaaq. Taamaattoq suli taamaallaat inuup pineqartup napparsimanera kapitalimi matumani pineqarpoq.

Imm. 2-mut

Suliffissorsiornermi ikorsiissutinik pisartagaqartup napparsimanermi suliffissorsiornermi ikorsiissutinik pisartagaqarnermut piumasaqaatit nalinginnaasut eqqortissavai.

Suliffissorsiornermi ikorsiissutinik pisartaqartumut napparsimanermi pissarsiarineqarsinnaatitaaneq atuutissanngilaq.

Napparsimanermi sulisinnaassutsip apparnerani suliffissorsiornermi ikorsiissutinik ilassutaasumik ikorsiissuteqartoqarsinnaavoq. Inuk suliffissorsiornermi ikorsiissutinik ilassutaasumik pisartagaqartoq napparsimanerup kinguneranik sulisinnaassusia apparat, napparsimanermut atatillugu suliffissorsiornermi ikorsiissutinik ilassutaasumik pisartagaqartoq napparsimanermi piareersimasussaanermut pisussaaffeqarnermut ilanersoq kommunalbestyrelsip isummerfigissavaa.

Imm. 3-mut

Aalajangersagaq imm. 1, oqaaseqatigiit aappaanni pineqartumik saneqqutsisinnaanermut atuutuuvoq, inullu pineqartoq piffissami sivisunerusumi napparsimasimappat piffissaq pisartagaqarfiusangitsoq atorunnaartarluni. Napparsimanerup aallartinnerani ersarissippat napparsimaneq sap. ak. 2-t sinnerlugit sivisussuseqassasoq, taava sap. ak. marluk naanissaat utaqgisariaqanngilaq.

Imm. 4-mut

Suliffissorsiornermi ikorsiissutinik pisartagaqarsinnaatitaaneq qaammatini imminnut atasuni arfinilinni napparsimanermi atorunnaassaaq. Piffissami sivisuumi napparsimaneq aallaaviusumik kinguneqassaaq suliffissorsiornermi ikorsiissutinik pisartagaqartoq suliffeqarfinnit pissarsiarineqarsinnaangitsoq aamma/imaluunniit suliffeqalernissamut piareersimanngitsoq.

Suliffissorsiornermi ikorsiissutinik pisartagaqartoq qaammatit pisat iluanni ajorunnaarnissaata nalunaarutigineqarnissaa pissutissaqartumik ilimagineqarsinnaappat, suliffissorsiornermi ikorsiissutinik pisartagaqarsinnaatitaaneq qaammatit arfinillit

qaangiunnerani pigiinnarneqassaaq. Suliffissarsiornermi ikorsiissutinik pisartagaqarsinnaatitaaneq pigiinnarneqassanersoq kommunalbestyrelsi aalajangiissaq. Kommunalbestyrelsi suliami paasissutissat tunngavigalugit aalajangiissaq aamma ajorunnaartoqarsinnaanersoq pillugu oqaloqatigiinnissamut suliffissarsiornermi ikorsiissutinik pisartagaqartoq aggersarneqassalluni. Pisariaqarpat nakorsamit napparsimanermut allagartaq pissarsiarineqarsinnaavoq, kommunalbestyrelsip akiligassaanik. Suliffissarsiornermi ikorsiissutinik pisartagaqartoq qaammatit pingasut iluanni ajorunnaassanersoq, suliffissarsiornermi ikorsiissutinik pisartagaqarsinnaassutsini piginassaneraa tamanna tunngavigalugu nalilersorneqassaaq.

Suliffissarsiornermi ikorsiissutinik pisartaqarsinnaatitaaneq annaaneqassanersoq piginneqarsinnaanersorluunniit siusinnerpaamik piffissap qaammatit arfinillit naaneranni aalajangerneqarsinnaavoq.

§ 16-imut

Suliffissarsiornermi ikorsiissutinik pisartagalik napparsimaguni kinguarsaanani kommunalbestyrelsimit nalunaaruteqassaaq. Kommunalbestyrelsip pisartagaqartup nappaataa suliamut nalunaassavaa, taannalu taamaattumik iliusissamut pilersaarummiissaq, pineqartullu sulisinnaassusianik naliliinermi ilaassalluni.

Aallaavittut napparsimanerit nalinginnaasut ajoqusernerilluunniit annikitsut nakorsamiit allagartamik pisariaqartitsiviussanngillat, taamaattumillu pineqarput nappaatit qassiiliutaasut, eqqunngitsuliortoqarsinnaaneranik pasisat, atornerluinerit imaluunniit nalornissutaasut pisartagaqartup nakorsamiit allagartamik pisariaqartitsineranik.

Kommunalbestyrelsip naliliinerani aammattaaq isiginiarneqassaaq nakorsamiit allagartaq paasissutissanik nutaanik tunniussaqassanersoq, allatut pineqarsinnaanngitsunik, aamma angerlarsimaffiusumi nakorsamiit misissorneqarnissamut periarfissaqarnersoq. Nakorsamiit allagartamik pisariaqartitsinermut ilanggullugu isiginiarneqassaaq pineqartup nakorsamiit /peqqinnissaqarfimmi sulisuniit misissorneqarsinnaanera, tamatumalu allaffissornikkut aningaasatigullu peqqinnissaqarfimmut kingunerisinnaasai.

Nalilerneqarpat nakorsamiit allagartaq pisariaqartoq, tassani ersittariaqarpoq qaqugu pineqartoq peqqisisutut nalunaarutigineqarsinnaasoq naatsorsuutaanersoq, nalinginnaasumillu sulilersinnaassanersoq.

Paasissutissat pingaartinneqarput, taamaalilluni tamanna pillugu paasissutissat iliuusissatut pilersaarummi suliffissarsiornermilu ikorsiissutinik pisartagaqartup suliffeqarnissamut piareersimanersoq suliffeqarfinnullu piareersimasussaanermik pisussaaffeqarnersoq kommunalbestyrelsip naliliineranut ilanngunneqarniassammata. Naggasiullugu paasissutissat qaammatini arfinilinni imminnut atasuni napparsimanermik nalunaaruteqarnermi suliffissarsiornermi ikorsiissutinik pisartaqarsinnaatitaaneq taamaatinneqassanersoq piginnarneqassanersorluunniit communalbestyrelsip naliliinerani ilaassapput, tak. § 15, imm. 4.

§ 17-imut

Imm. 1-imut

Majoriaq piareersimasussaanermut pisussaaffeqarneq tamassumalu eqqortinneqannginnerani kingunissaanik suliffissarsiornermi ikorsiissutinik pisartagaqartumut sukumiisumik ilitsersuissaq. Tamassumani ilaavoq suliffissarsiornermi ikorsiissutinik pisartagaqartup piareersimasussaanermut pisussaaffeqarnermik eqqortinnissaanik akisussaaffeqarneranik erseqqissaaneq.

Suliffissarsiornermi ikorsiissutinik pisartagaqartoq suliffeqarfinittissarneqarsinnaanngikkuni, atorfimminit soraarniuteqaruni imaluunniit atorfimminit peersitaaguni killilersuiffigineqassaaq. Soraarniuteqarnerup sulinngitsoorneq peersinneqarnerlu assigai.

Piareersimasussaanermut pisussaaffeqarneq pillugu kapitali 4-mi aalajangersakkat tassungalu oqaaseqaatit innersuussutigineqarput.

Suliffissarsiornermi ikorsiissutinik pisartagaqartup suliffimminit soraarniuteqarneranut, sulinngitsoorneranut atorfimminilluunniit qimatsineranut pissutaasut pingaartinneqanngillat. Nammineerluni soraarniuteqarneq tassunga ilanngullugit sulinngitsoorneq peersitaanerlu nammineq soraarniuteqarnermut tassunga ilanngullugit sulinngitsoornermut peersitaanermullu tunngaviusut apeqquatainnagitt killilersuisoqalissaq.

Peersitaanermi sulisup sulinermik annertuumik eqqortitsinnginnerata kinguneranik sulisitsisup ingerlaannartumik nalunaaruteqarluni atorfefqarnermik taamaatitsinera ilaavoq. Aalajangersagaq taanna malillugu atorfefqarnerup taamaatinneqarneranut sulisitsisup tunngavilersuutaa kisimi pingaartinneqarpoq. Kommunalbestyrelsi peersitsineq tunngavissaqarnersoq tunngavissaqannginorsorluunniit misissuissanngilaq.

Imm. 2-mut

Aalajangersagaq taanna ilanngunneqarpoq pisuni pitsaanngitsuni immikkut tuttuni peqataaqqaajaunnaarnissamik atuinngitsoqarsinnaaqquullugu imm. 1-imi. Pisut immikkut ittu paasineqassapput assersuutigalugu sulisitsisup uteqqiasumik piumaffigineqartalaruarluni akissarsisitsisannginnerani, § 12 naapertorlugu, Kalaallit Nunaanni sullivinni isumannaallisaanermut inatsimmik tunngavilimmik, ulorianartut pinngitsoorneqannginnerini imaluunniit sulinermik inuussutissarsiuteqartut atugassarisaannik sumiginnaanerisigut.

Qinnuteqartumiit uppernarsaaserneqarsinnaassaaq taassuma atugarissaarnissaa ingasattumik sanioqqunneqarsimasoq.

Inuk peersitaasoq tamassuma kingorna eqqartuussinikkut imaluunniit sulisut kattuffiata pineqartup sulisitsisullu akornanni isumaqtigiainniarnerup kingorna peersitsineq tunngavissaqanngitsoq taperserneqarpat, suliffissarsiornermi ikorsiissutit kingumut atuuttimik tamakkiisumik akilerneqassapput. Killilersuiffiginnineq atorunnaartutut isigineqassaaq.

Pisumilu taamaattumi aammattaaq ilanngaassisooqassaaq § 3 naapertorlugu, piffissanut qinnuteqartup taartisiffigisimasaanut, soraarsitsinissamut ilisimatitsisimannginnermut assigisaanulluunniit akissarsianut taarsiullugit akilerneqartunut.

Imm. 3-mut

Suliffissarsiornermi ikorsiissutit piffissami killilersuiffiusumi 50%-imik apparinnejassapput. Suliffissarsiornermi ikorsiissutit Inatsisartut inatsisaanni malittarisassat nalinginnaasut malillugit naatsorsorneqassapput.

Suliffissarsiornermi ikorsiissutinik pisartagaqartoq Inatsisartut inatsisaanni aalajangersakkani allannguiteqanngitsumik ilaassaaq, tassunga ilanngullugit suliffeqarfinnit pissarsiarineqartussaatitaaneq suliffissarsiornerlu il.il. Piffissaq killilersuiffik suliffissarsiornerup sivisussusianik naatsorsuinermi sulinngiffeqarsinnaanerlu aamma ilanngunneqassapput.

§ 18-imut

Suliffissarsiornermi ikorsiissutinik pisartagaqartoq qaammatit aqqaneq-marluk iluanni sisamariarluni killilersuiffigineqarsimaguni ikorsiissutinik pisinnaajunnaassaaq.

Suliffissarsiornermi ikorsiissutinik pisartagaqartup piffissami qaammatit aqqaneq-marluk iluanni killilersuiffigitissimaneranik aalajangiinermi piffissap killilersuiffiusup kingulliup aallartinnera qaammatit aqqaneq-marluk iluanni naasimassaaq.

Oqaaseqatigiit aappaanni aalajangersarneqarpoq oqaaseqatigiit siullit naapertorlugit ikorsiissutinik annikillisitsineq atutissasoq qaammatini 3-ni, pisarsagaqarsinnaajunnaarnermiit kingullermit § 17, imm. 1 naapertorlugu.

§ 19-imut

Inuit aallaavittut aatsaat suliffissarsiortunut ikorsiissutinik pisartagaqarsinnaalersarput qitiusumik ingerlatsivimmut Majoriamut saaffiginnereeraangamik.

Ullormit saaffiginniffiusumiit misissorneqassapput tamanna sioqqullugu sap. ak. 13-it kingullerni akissarsiaqarluni sulinerusimasinnaasut, tak. § 22, imm. 1.

Imm. 2-mut

Aallaaviusoq ersarissoq tassaavoq inuit akissarsiaqarlutik sulinerminnik annaasaqartut sapinngisamik sukanerpaamik qitiusumik ingerlatsivimmut Majoriamut saaffiginnittussaasut, nammineerlutik suliffissarsisinnaanngikkunik.

Qitiusumik ingerlatsivimmi Majoriami siunnersorneqarlutillu ilitsersorneqarsinnaapput, nutaamik suliffissarsiniarnerminnut il.il. Taamaattumik kissaatiginassaaq kaammattuisoqartassasoq sapinngisamik sukkasuumik Majoriamut saaffiginnittooqarnissaanik.

Naapertuilluartumik periaaseqarnissamiit isigalugu qinnuteqartumut akornutaasariaqanngilaq ingerlaannartumik Majoriamut saaffiginninnginneq. Soorluttaaq inuk ilimagisatut nammineq ingerlaannaq suliffissarsisinnaanngippat, suliffissarsioraluareernikkullu aatsaat Majoriamut suliffissarsiorluni saaffiginnippat.

Imm. 3-mut

Inuit ilinniagaqarnermi naammasseqqammersut inuillu siusinnerusukut akissarsianit isertitaqarnikuunngitsut piffissap katersuiffiusup sapaatit akunnerisa marluk kingorna suliffissarsiornermi ikorsiissutinik pisartagaqarsinnaatitaapput. Pineqartoq piffissap katersuiffiusup sapaatit akunnerisa marluk kingorna sapaatit akunnerini 22-ni akunnermut akissarsiaq § 22-mi aalajangerneqartoq atorlugu suliffissarsiornermi ikorsiissutinik akilerneqarsinnaatitaavoq.

§ 20-mut

Imm. 1-imut

Suliffissarsiornermi ikorsiissutit SIK-p aamma Naalakkersuisut akunnermusiallit pillugit isumaqatigiissutaanni ilinniarsimanngitsunut 18-it sinnerlugit ukiulinnut aki (§ 4, imm. 2, qaffasissuseq 1) appasinnerpaaq aallaavigalugu naatsorsorneqassapput, 01/04-2020-mi akunnermut 100,47 kr.-p assinga – massuma kingorna taaneqartoq SIK-mi akissarsiat minnerpaaffissaat.

Imm. 2-mut

Suliffissarsiornermi ikorsiissutit sapaatit akunnerini 26-ni siullerni SIK-mi akissarsiat minnerpaaffissaat procentinngorlugu 90%-iinik annertussuseqassapput, maannakkut assigalugu akunnermut 90,42 kr. Tamassuma kingorna SIK-mi akissarsiat minnerpaaffissaat procentinngorlugu 80%-iinik annertussuseqassapput, maannakkut assigalugu akunnermut 80,38 kr.

Imm. 3-mut

Inuuusuttunut 18-it 29-llu akornanni ukiulinnut katillugit qaamatini aqqaneq-marlunni suliffissarsiornermi ikorsiissutinik pisartagaqarsimasunut SIK-mi akissarsiat minnerpaaffissaat procentinngorlugu 65%-iinik annertussuseqassapput, maannakkut assigalugu akunnermut 65,31 kr.

Aalajangersagaq § 13-imut atatillugu isigineqassaaq aammalu suliffissarsiornermi ikorsiissutinik pisartagaqartut ukiuni arlalinni piffissami sivisuumi suliffissaaleqinissaasa pinngitsoornissaanut tapersiissalluni.

Qaamatini 12-ini ataannartuni suliffissarsiornermut ikorsiissutinik pisartagaqartoqarsimanissa isumaqarpoq, pisartagaqartoq qaamatit 12-it iluanni akissarsiaqluni suliffeqarsimassanngitsoq.

Imm. 4-mut

Inuuusuttunut 30-nik sinnerlugillu ukiulinnut katillugit qaamatini 24-ni suliffissarsiornermi ikorsiissutinik pisartagaqarsimasunut SIK-mi akissarsiat minnerpaaffissaat procentinngorlugu 65%-iinik annertussuseqarput, maannakkut assigalugu akunnermut 65,31 kr. Piffissap qaamatit 24-t naatsorsorneranni aamma suliffissarsiornermi ikorsiissutit inuup 30-nik ukioqalinnginnerani pisartagarineqarsimasut ilanngunneqassapput.

Aalajangersagaq § 13-imut atatillugu isigineqassaaq aammalu suliffissarsiornermi ikorsiissutinik pisartagaqartut ukiuni arlalinni piffissami sivisuumi suliffissaaleqinissaasa pinngitsoornissaanut tapersiissalluni.

Qaammatini 24-ini imminnut ataannartuni suliffissarsiortunut ikorsiissutinik pisartagaqarsimaneq isumaqarpoq piffissami qaammatinik 24-inik sivisussusilimmi akunneqanngitsumik ikorsiissutinik pisartagaqarsimanissaq.

§ 21-mut

Naalakkersuisut akit atuuttut naatsorsussavaat. Akit ilaatigut isumaqatigiissutit nutaamik isumaqatigiissutiginiarneqarneranni ilaatigullu ukiumut aaqqiissutit isumaqatigiissutini isumaqatigiissutigineqartut kingunerisaannik allannngortinneqartassapput. Akit www.naalakkersuisut.gl -mi avammut saqqummiunneqartassapput aammalu Inatsisartut inatsisaannik allaffissornikkut aqutsinermi atugassatut IT-mi ataatsimut aaqqiissutini nalunaarutigineqartassallutik.

§ 22-mut

Imm. 1-imut

Suliffissarsiornermi ikorsiissutinik qinnuteqarnermi qinnuteqartumut akunnermut aki aalajangerneqassaaq. Akunnermut akip sapaatit akunneranut akunnerit amerlassusaat takutippai, taannalu suliffissarsiornermi ikorsiissutinik naatsorsuinerme tunngaviussaaq. Akunnermut aki qinnuteqartup sapaatit akunnerini 13-ini siuliini agguaqatigiissillugu akunnerit akissarsiaqarfigalugit suliffigisimasai tunngavigalugit naatsorsorneqassaaq.

Inuk pineqartoq ilaappat § 19, imm. 2-mi sanioqqutsisinnaanermut, ulloq taanna atorneqassaaq aningaasarsianik annasaqarnerup naatsorsorneqartup aallartiffiatut. Taamaattumillu ullormiit tassanngaaniit piffissaq siuleqassaaq sap. ak. 13-inik.

Imm. 2-mut

Piffissat inuup pineqartup angerlartitaaffigisimasai, tak. § 4, kiisalu piffissat sulinngiffeqarfiusut, akissarsiaqarluni napparsimaffiusut il.il. imm. 1 naapertorlugu naatsorsuinerme ilaassapput.

Qinnuteqartoq aalajangersimasunik akissarsiaqarsimappat, assersuutigalugu qaammamusiaqarluni, taava kommunalbestyrelsip naatsorsuutigisinnaavaa qinnuteqartoq

akissarsisarsimassasoq, immikkut sap. ak. 13-it peqanngiffigisimasai il.il.
uppernarsartinngikkaluarlugit.

Pikkorissarnerni peqataanerit ilaatigut tassaasarput AMA aamma PKU, pikkorissarnerit tamarmik sulisinnaassutsimik siuarsaaviusut. Sunngiffimmi sammisassanut atatillugu pikkorissarnerit sulinermut namminermut isumaqanngitsut ilaanngillat. Assersuutigalugu nerisassiornermut pikkorissarnerit igasuunngitsunut.

”Imaluunniit assigisaat” tassani ilaatigut ilaasinjaapput piffissat inuup pineqartup meerartaarnermut atatillugu sulinngiffeqarfigisimasai, tassanili meerartaarnermut atatillugu sulinngiffeqarnermi akunnermusiaq pineqassaaq, taamaattoq sap. ak. minnerpaamik 22 tiiminut.

Imm. 3-mut

Inuit ilinniagaqarnerminnik naammasseqqammersut inuillu siornatigut akissarsianit isertitaqarsimanngitsut allat sapaatip akunneranut akunnerit 22-t amerlaqataannik akunnermut akip minnerpaaffissaanik qulakteerinniffigineqarput.

§ 23-mut

Piffissami qaammatini arfinilinni piffissami killilikkami sapaatit akunneri sisamat tikillugit piffissap ilaani sulisoqarsinnaavoq pineqartumullu akunnermut aki tikillugu suliffissarsiornermi ikorsiissutinik ilassutaasunik pisartagaqartoqarsinnaalluni. Piffissap ilaani sulinermi siunertaq tassaassaaq suliffissarsiortup 100%-imik imminut pilersornissaminut qanillisinneqarnissaa. Pineqartup piareersimasussaanermik pisussaaffeqarneq suli eqqortissavaa. Inuup piffissap ilaani sulinissaq kissaatigippagu piareersimasussaanermik pisussaaffeqarnerlu inatsimmi paasinninneq naapertorlugu kissaatiginagu, pineqartoq suliffissarsiornermi ikorsiissutinik ilassutaasumik pisartagaqarsinnaanngilaq.

Taamaammat piffissap ilaani sulinissamik periarfissaqarneq iliuusissatut pilersaarutip ilaatut ilanngunneqassaaq aammalu inuk pisortanit pilersorneqarani 100%-imik imminut pilersorsinnaanerata qanillisinneqarsinnaaneranut qanoq tapersiisinnaanersoq allaaserineqassalluni.

§ 23 malillugu suliffissarsiornermi ikorsiissutinut tapiliussat § 22 malillugu akunnermut akip naatsorsorneranut pingaaruteqanngillat.

§ 24-mut

Aalajangersagaq atorfiup suulluunniit suliffissarsiornermi ikorsiissutinik pisartagaqartup suliffigisassatut piginnaasaqarfigisaanik qinnuteqartussaatitaaneq pillugu § 8-mut atatillugu isigineqassaaq. Suliffissarsiornermi ikorsiissutinik pisartagaqartoq piffissami sivikitsumi suliffeqarnermigut imaluunniit piffissami sivikillisami suliffeqarnermigut ajorerusumik inissinneqassanngilaq.

Pisussaaffeqarneq akunnerit amerlassusaat sivisussusialuunniit apeqqutaatinnagit atuuppoq. Suliffissarsiornermi ikorsiissutinik pisartagaqartoq suliffissarsiornermi ikorsiissutini akunnermut akimit appasinnerusunik akunnerni ikinnerusuni suliffeqalerpat suliffissarsiornermi ikorsiissutinik pisartagaqartumut § 22 naapertorlugu akunnerit akissarsianik isertaqarfiusut ilanngaatigalugit pineqartoq suliffissarsiornermi ikorsiissutinik pisartaqassaaq.

§ 23 malillugu suliffissarsiornermi ikorsiissutinut tapiliussat § 22 malillugu akunnermut akip naatsorsorneranut pingaaruteqanngillat.

§ 25-imut

Suliffissarsiornermi ikorsiissutit nammineq pisuussutiginngisamik pissuteqartumik akissarsianit isertaqannginnermut taartisiitatut ikorsiissutaapput, tassunga ilanngullugit, angerlartitaaneq, napparsimaneq imaluunniit pinngortitami ajunaarnersuaqarneq. Taamaammat suliffissarsiornermi ikorsiissutit ullunut 14- ikkaarlugit akissarsialinnut akissarsianit isertitatut nalinginnaasutut akilerneqartariaqarput.

Inunnut suliffigimasaminni qaammamusiaqarsimasunut ulla 14-ikkaartunik pisartagaqarneq annertuumik ajoqutaanavianngilaq, soorluttaaq ulla 14-ikkaartunik akiliisarnermi qularnaarneqassasoq kommunalbestyrelsip ataatsikkoortissinnaassagai akissarsisitsisarnermut aaqqissuussinernut, taamalu Inatsisartut inatsisaat naapertorlugu allaffisorneq oqilisaanneqarluni.

Suliffissarsiornermi ikorsiissutit pisartagallip NemKonto -anut akilerneqartassapput, tak. pisortat akilissaneraat il.il. Inatsisartut inatsisaat. Akiliineq aamma akiliisarfik Ilanngaassivik aqqtigalugu pisinnaavoq, tak. Akiliisarfik Ilanngaassivik pillugit Inatsisartut inatsisaat.

§ 26-mut

Imm. 1-imut

Suliffissarsiornerup sivisussusia inuup suliffissarsiornermi ikorsiissutinik qanoq sivisutigisumik pisartagaqarsimaneranik takutitsivoq.

Suliffissarsiornerup sivisussusia ullormit siullermiit qinnuteqartup suliffissaaleqisutut Majoriamut saaffiginninneranit naatsorsorneqassaaq.

Inuit ilinniaqarnerminnik naammasseqqammersut inuillu siornatigut akissarsianit isertitaqarsimanngitsut allat piffissami sapaatit akunnerini marlunni katersereernerup kingorna suliffissarsiornermi ikorsiissutinik pisartagaqarsinnaatitaapput. Pineqartoq sapaatit akunneri marluk qaangiuteqqinnerini sapaatit akunnerinut marlunnut taakkununnga suliffissarsiornermi ikorsiissutinik akilerneqarsinnaatitaavoq. Piffissaq katersuiffiusoq piffissap sapaatit akunneri marluk ullormi siullermi suliffissarsiornermi ikorsiissutinik akiliisarnermi ilaasumi aallartissaq.

Ulloq assersuutigalugu oktoberip aallaqqaataani nalunaarnermi piffissaq katersuiffiusoq ulloq 15. oktobari naassaaq. Tamassuma kingorna piffissami 16. oktobarimit akiliiffissallu tulliuttup tungaanut suliffissarsiornermi ikorsiissutinik akiliisoqarsinnaavoq.

Suliffissarsiornerup sivisussusia ullormit oktoberip aallaqqaataanit atuuttumik naatsorsorneqassaaq.

Suliffissaaleqisup akissarsiaqaataasumik sulilernera pissutigalugu suliffissarsiornermi ikorsiissutinik pisartagaqarunnaarpal, suliffissarsiornerup sivisussusia pingarnertut taamaatissaq.

Suliffissarsiornermi ilassutaasunik ikorsiissutinik pisartagaqarani ataavartumik suliffeqareernerup kingorna kingusinnerusukkut nalunaaqqinnermi inuk pingarnertut malitassatut suliffissarsiorneq sivisussuseqarani nutaamik nalunaartutut isigineqassaaq.

Imm. 2-mut

Suliffissarsiornerup sivisussusianik naatsorsuinermi piffissat suliffissarsiornermi ikorsiissutinik ilassutaasumik tapiissuteqarsimaneri ilanngunneqassapput. Taamaammat ullut pissalluunniit suliffissarsiornermi ikorsiissutinik pisartagalimmut piffissami tassani suliffissarsiornermi ikorsiissutinik ilassutaasumik akiliisoqarpat, sivikillisamik sulineranik ilanngaasoqassanngilaq.

Imm. 3-mut

Inuit suliffissarsiornermi ikorsiissutinik pisartagaqartut suliffissarsiortullu sivisussusianut qaammatinut aqqaneq-marlunnut (18-init 29-nut ukiullit) imaluuniit qaammatinut 24-nut (30-t sinnerlugit ukiullit) qanilliartortut suliffissarsiorunnaarnermik nalunaaruteqarnissamik kingusinnerusukkullu suliffissarsiortutut nalunaarnissamik taamaalillutik suliffissaaleqisut nutaamik nalunaaruteqarnissamik soqtigisaqarsinnaapput.

Inuit suliffissarsiorunnaartutut nalunaaruteqarnissaat sapaatillu aqqaneq-marluk iluanni suliffissarsiortut nalunaaruteqaqqinnissaat pinngitsoorniarlugu nutaamik nalunaartutut isigineqassangillat. Maannamut suliffissarsiornerup sivisussusia atoqqilissavaat.

§ 27-mut

Aalajangersakkap suliffeerunnermi ikorsiissutit pillugit Inatsisartut inatsisaanni § 15, imm. 1 atuuttoq assigaa. Inuk suliffissarsiornermi ikorsiissutinik pisartagaqartoq aningaasaqarnermi, inuttut inuttullu atukkatigut pissutsinik inuup suliffissarsiornermi ikorsiissutinik suli pisartagaqarsinnaataaneranik pingaerateqartunik kommunalbestyrelsimit paasissutissiisussaatitaavoq. Paasissutissiisussaatitaanermi taamaallaat paasissutissanut kommunalbestyrelsip pigeriigaanut tunngatillugu allannguutit pineqarput.

Paasissutissat suliamut attuumassuteqartut assersuutigalugu tassaasinnaapput suliffissarsisimaneq, napparsimalerneq, attaveqarfissatut paasissutissat, najugaq imaluunnit piareersimasussaanermik pisussaaffeqarunnaarneq.

§ 28-mut

Imm. 1-4-mut

Qularnaarumallugu kommunalbestyrelsip inummut tunngasunik paasissutissanik atuisinnaanera, kiisalu sapinngisamik aalajangersakkat assigiissut tunngavigineqarnissaat, tamatumungalu akuersisoqarnissaa, Pisortanit ikorsiissutit pillugit Inatsisartut inatsisaanni aalajangersakkat nuunneqarput, atortuulersinneqarlutilu Inatsisartut inatsisaanni uani.

Taamaattoq suliffissarsiortunut ikorsiissutinik suliaqarnerni pisariaqartussaanngilaq apparisap aningaasaqarneranut paasissutissanik piniartarneq.

Tamatumalu saniatigut innersuussisoqassaaq Pisortanit ikorsiissutit pillugit Inatsisartut inatsisaanni § 43-mut, tassungalu oqaaseqaatinut.

§ 29-mut

Aalajangersakkap suliffeerunnermi ikorsiissutit pillugit Inatsisartut inatsisaanni § 17 atuuttoq pingaarnertigut assigaa. Aalajangersagarli imatut sukaterneqarpoq kommunalbestyrelsip pisuni taaneqartuni utertitsilluni akiliisoqarnissa piumasarissaga.

Aalajangersakkami suliffissarsiornermi ikorsiissutit utertillugit akilerneqarnissaat pillugu aalajangiisussaatillugu tamakkiisumik allaqqasoqarpoq. Tamassuma kinguneraa kommunalbestyrelsi pisuni taaneqartuni suliffissarsiornermi ikorsiissutit utertillugit akilerneqarnissaannik piumasaqarnissamut pisussaaffeqartoq. Tamannalu ilaatigut isumaqarpoq communalbestyrelsip aningaasanik utertitsisoqarnissa piumasarisinnaanngikkaa, uani aalajangersakkami pineqartoq eqqaassanngikkaanni.

Nr. 1-imut

Kommunalbestyrelsip suliffissarsiornermi ikorsiissutinik pisartagaqartup § 27 naapertorlugu paasissutissiisussaatitaaneq eqqortinngippagu imaluunniit pisortat ikorsiissutaannik pissarsiaqarsimappat pineqartullu tamatuminnga pisinnaatitaaffeqannginnini ilisimasimappagu suliffissarsiornermi ikorsiissutit utertillugit akilernissaat piumasarissavaa.

Suliffissarsiornermi ikorsiissutinik pisartaqartup aningaasatigut, inuttut inuttullu atukkatigut pissutsit inuup suliffissarsiornermi ikorsiissutinik suli pisartagaqarsinnaatitaaneranut pingaaruteqartut pillugit communalbestyrelsimum paasissutissiisussaatitaavoq. Paasissutissiisussaatitaanermi taamaallaat paasissutissanut communalbestyrelsip pigeriigaanut tunngatillugu allannguutit pineqarput.

Paasissutissiisussaatitaanermi aamma taarsiissutit assigisaalluunnit akilerneqartut suliffissarsiornermi ikorsiissutinik pisartagaqartup § 27 malillugu communalbestyrelsimum paasissutissiissutissai ilaapput.

Nr. 2-mut

Oqaatsimi nalunngikkaluarlugu pineqarpoq, pineqartup suliffissarsiornermi ikorsiissutinik pisartagaqarsinnaatitaannginnerminik ilisimanninera. Suliffissarsiornermi ikorsiissutinik pisartagaqartup pissutsit pineqartup suliffissarsiornermi ikorsiissutinik pisartaqarsinnaatitaanngitsut aamma pissutsit pineqartumik suliffissarsiornermi ikorsiissutinik pisartagaqarsinnaannginneranik kinguneqartut communalbestyrelsip nalilersussavai.

Nr. 3-mut

Suliffissasiornermi ikorsiissutit akilerneqartut pineqartoq piffissami tassani aamma suliffissasiornermi ikorsiissutinik akiliinermi siunertat pillugit akissarsianit isertitaqannginnermut taarsiissutit ikuutinik akiliiffigineqarpat utertillugit akilerneqarnissaat aamma piumasarineqassaaq.

§ 30-mut

Imm. 1-2-mut

Kommuni Inatsisartut inatsisaanik allaffissornikkut aqutsissaaq.

Suliffissasiornermi ikorsiissutinik kommunimi qinnuteqartup aalajangersimasumik ineqarfigisaani imaluunnit aalajangersimasumik najugaqarfigisaani communalbestyrelsimit qinnuteqartoqassaaq. Namminersorlutik Oqartussat inuit kommunit agguernerisa avataanni aalajangersimasumik ineqartut imaluunniit aalajangersimasumik najugaqartut qinnuteqaataat suliarisassavaat.

Imm. 3-mut

Suliffissaarunnermut ikorsiissutit maanna atuuttut naapertorlugit qinnuteqaatinik suliaqartarneq innuttaasut siulersuisuinit assigisaannilluunniit suliarineqartarput, aningaasartuutilu Namminersorlutik Oqartussaniit taarserneqartarlutik, taamaattumillu Naalakkersuisut oqartussaasunik allanik piginnaatitsisinnallutik sulianiik ingerlatsisuunissaannut.

§ 31-mut

Imm. 1-imut

Kalaallit Nunaanni kommunit suliffissasiornermi ikorsiissutinut aningaasartuutit akilissavaat. Aningaasartuutit Kommunit akunnerminni akileeqatigiiffigeqatigiittarnissamut pisussaaffii pillugit Inatsisartut peqqussutaanni malittarisassat malillugit kommunit akornanni aguaanneqassapput.

Namminersorlutik Oqartussat Kommunit akunnerminni akileeqatigiiffigeqatigiittarnissamut pisussaaffii pillugit Inatsisartut peqqussutaanni malittarisassat malillugit kommunit akiliisussatut isigineqarpata Naalakkersuisut suliffissasiornermi ikorsiissutinut aningaasartut akilissavaat.

Imm. 2-mut

Suliffissarsiornermi ikorsiissutinik pisartaqartumut namminermut tunngasumik iliuusissatut pilersaarummik kommunimi ataatsimi suliaqartoqarsimappat, pineqartorlu kommunimut allamut nuuppat, kommunip nuuffigineqartup kommunimit nuuffigisamit pineqartumut iliuusissatut pilersaarut pissarsiarissavaa pisariaqassappallu naleqqussarlugu.

Tamanna inunnut ataasiakkaanut iliuusissatut pilersaarutit sulineqarnerannut aningaasartuutit ikilisinniarlugit aamma suliffissarsiornermi ikorsiissutinik pisartagaqartup kommunimut nutaamut nuunnermini imminut tunngasumik iliuusissatut pilersaarutip aallaqqaataanit suliarineqannginniassammat pissaaq.

Ilimagineqarpoq suliffissarsiornermi ikorsiissutit pillugit Inatsisartut inatsisaannik allaffissornikkut aqtsinermut IT-mi ataatsimut aaqqissuussinerit ineriertortinneqarneranni assersuutigalugu Piginnaanngorsaqqinnissamut ikorsiisarneq pillugu Inatsisartut inatsisaat, Suliffissarsiornermi ikorsiissutit pillugit Inatsisartut inatsisaat aamma pisortat ikorsiissutaat pillugit Inatsisartut inatsisaat naapertorlugit iliuusissatut pilersaarutit suliarineqarnerannut atorneqartussanik iliuusissatut pilersaarutinut elektroniskinngorlugu ataqatigiissitsisussanik suliaqartoqassaaq. Ataqatigiissitsisussat paasissutissanik tamanut tunngasunik immersuiffimmi inatsisit akornanni atorneqarsinnaasunik immersuiffissatut aamma inatsimmik pineqartumik allaffissornikkut aqtsinermut atugassatut immersuiffissatut suliarineqassapput.

Taamaaliornikkut inuk pisortanit ikorsiissutinik pisartaqarpat ataatsimut ilisimasat pigineqarnissaat qulakkeerneqassaaq. IT-mi ataatsimut aaqqiissutinik suliaqarnermi aqtsiviup sullissanillu suliarinnittut ataasiakkat paasissutissanik inatsimmik pineqartumik allaffisornermut aqtsinermut tunngassuteqartunik kisimik pissarsisinnaanissaat qulakkeerneqassaaq.

Qanoq sivisutigisumik suliffissarsiortuusimanerup § 26 naapertorlugu naatsorsorneqartarnera siullermeersumik kommunimut saaffiginninnermiit pisarpoq, apeqqutaatinnagu kommunimut sorlermut saaffiginnittoqarnera.

§ 32-mut

Kommunit aamma Namminersorlutik Oqartussat suliffissasiорnermi ikorsiissutit pillugit Inatsisartut inatsisaannik allaffissornikkut aqtsinermut atorneqartussanik pisortat IT-mi ataatsimut aaqqiissutaannik atuisussaataitaapput. Elektroniskinngorlugu iliuusissatut pilersaarutit pillugit § 31-mut oqaaseqaatit takukkit.

Pisortat IT-mi ataatsimut aaqqiissutaat pillugit aalajangiineq Kommunit aamma Namminersorlutik Oqartussat missingersuutaat naatsorsuutaallu pillugit Inatsisartut

inatsisaanni § 46 a-mi malittarisassiuunneqarput. Ilimageqarpoq pisortat IT-mi ataatsimut aaqqiissutaat Namminersorlutik Oqartussani kommuninilu IT-mi pisortat ataatsimut nalunaarsuiviinut atuuttunut ilassutitul suliarineqassasut.

§ 33-mut

Imm. 1-imut

Suliffissarsiornermi ikorsiissutit pillugit Inatsisartut inatsisaat naapertorlugu kommunit aalajangiineri tamarmik Isumaginninnermi Maalaartarfimmum maalaarutigineqarsinnaapput. Isumaginninnermi Maalaartarfimmum Isumaginnitoqarfiup aqunneqarnera aaqqissugaaneralu pillugit Inatsisartut peqqussutaat naapertorlugu naammagittaalliorqartassaaq.

Isumaginnitoqarfiup aqunneqarnera aaqqissugaaneralu pillugit Inatsisartut peqqussutaanni malittarisassat maannakkut atuuttut naapertorlugit aalajangiinermit sapaatit akunneri arfinillit iluanni Isumaginninnermi Maalaartarfimmum naammagittaalliorqassaaq.

Imm. 2-mut

Naalakkersuisut imaluunniit pisortatut oqartussaasut piginnaatinneqartut, tak. § 30, imm. 3, aalajangiigaangata, aalajangiineq taanna aamma Isumaginninnermut Maalaaruteqartarfimmum maalaarutigineqarsinnaavoq.

§ 34-mut

Imm. 1-imut

Siunnersuutigineqarpoq Inatsisartut inatsisaat ulloq 1. Januar 2023 atuutilersinneqassasoq.

Imm. 2-mut

Inatsisartut inatsisaata atuutilersinneqarneratigut Suliffeerunnermi ikorsiissutit pillugit Inatsisartut inatsisaat atorunnaarsinneqassaaq.

§ 35-mut

Imm. 1- imut

Suliffeerunnermi ikorsiissutinit suliffissarsiornermi ikorsiissutinut allaffissornikut ikaarsaariarneq ajornannginnerulersinniarlugu suliffeerunnermi ikorsiissutinik maannakkut pisartaqartut suliffissarsiornermi ikorsiissutinik pisartagaqartutut ingerlaannassapput.

Suliffissarsiornermi ikorsiissutinut ikaarsaariarnermi suliffeerunnermi ikorsiissutini tiimimut akit katarsorneqartut ingerlatiinnarneqassapput.

Imm. 2-mut

Suliffeerunnermi ikorsiissutinit suliffissarsiornermi ikorsiissutinut allaffissornikkut ikaarsaariarneq ajornannginnerulersinniarlugu iliuusissatut pilersaarutit atuuttut pisariaqartumik aaqqiissutit ilanngullugit ingerlatiinnarneqassapput. Kommunalbestyrelsip atuutilersitsinerup kingorna ukioq ataaseq qaangiutsinnagu iliuusissatut pilersaarutit nutarterneqartut suliarissavai.

Suliffissarsiornermi ikorsiissutit pillugit Inatsisartut inatsisaanut atatillugu tusarniaanermi akissuteqaatit pillugit allakkiaq.

Siunnersuut piffissami 27. august – 24. september 2021-imi tusarniaassutigineqarpoq. Tamautuma saniatigut piffissami tassani siunnersuut www.naalakkersuisut.gl aqqutigalugu saqqumitinneqarpoq.

Aallarniut:

Tusarniaanermi akissutit nalinginnaasumik oqaaseqaatinik imaqartut aammalu qisuarialit ilanngunneqanngillat. Tusarniaanermi akissuteqaatit tiguneqartut siunnersuutip imarisaanut ataasiakkaanut oqaaseqaatitaqartut tamakkiisumik issuarneqarput, aammalu pisortaqaifiup oqaaseqaatai naqinnernik orlingasunik allanneqarput.

Siunnersuut ukununnga tusarniaassutigineqarpoq:

Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, Atuisartunut Unammilleqatigiinnermullu Aqutsisoqarfik, Isumaginninnermut Aqutsisoqarfik, SIK (Sulinermik Inuussutissarsiuteqartut Kattuffiat), Sulisitsisut, KNAPK (Kalaallit Nunaanni Aalisartut Piniartullu Kattuffiat), NUSUKA (Nunaqavissut Suliffiutillit Kattuffiat), AK (Atorfillit Kattuffiat), NPK (Nunatsinni Perorsaasut Kattuffiat), IMAK (Ilinniartitsisut Meeqqat Atuarfianneersut Kattuffiat), Sorlak (Kalaallit Nunaanni Meeqqat Inuuusuttullu Siunnersuisoqatigiiffiat), MIO (Meeqqat Illersuisuat), Foreningen Grønlandske Børn, Tilioq (Innarluutillit Illersuisuat) aamma Kalaallit Nunaanni Pinerluuteqarsimasunik Isumaginnittoqarfik

Uku tusarniaanermi akissuteqarput:

Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, Atuisartunut Unammilleqatigiinnermullu Aqutsisoqarfik, SIK, Sulisitsisut, Tilioq aamma Inussuk IT.

Tusarniaanermi akissuteqaat:

1. Avannaata Kommunia

"§ 1, imm. 3-mi:

Nappaatini nutaani angerlarsimaannarnissamut piumasaqaatitalinni. Tassani Covid-19 assersuutigineqarluni."

Akissuteqaat: Ilaannakutortumik ilanngunneqarpoq. COVID-19-mut killifimmuit tunngatillugu aallarniutigalugu oqaatigineqassaaq, inuk nappaammik tunillanneqarsimasoq, napparsimasutut isigineqassamat, taamaattumik inuup taassuma mattusimatinneqarnerani

imaluun-niit inunnut akulerusimaqquaannginnerani, tamanna napparsimanertut aamma isigineqartussaammat. Nappaat taassumalu kingorna mattusimatinneqarneq sivikinnerusimappat, taava ulla pingajuanni inuk suliffissarsiornermi ikorsiissutinik tunineqarsinnaalissaq.

Inuit tunillatsissimanermik ersiuteqanngitsut, napparsimasutut nalilerneqarnavianngillat, kisiannili pissutsit ersarinnerusut aallaavigalugit angerlartinneqarsinnaallutik. Pisorli apeqqutaassaaq, tamatumanissaq peqqinnissamut oqartussat tamatigoortumik imaluunniit aalajangersimasumik sulisitsisup sulisuminik angerlartitsinissaanik inassuteqartoqarsimappat.

Aatsaat suliffeqarfik/sulisitsisoq eqqortumik oqartussaniit piumaffigineqarsimappat sulisuminik angerlartitsinissaminik peqquneqarsimappat. Tassunga atatillugu oqaatigineqassaaq, sulisitsisoq § 4 naapertorlugu angerlartitsinerminik nalunaaruteqartussaammat.

Siunertaanngilaq suliffissarsiornermi ikorsiissutit inunnik suliffimmut ornigullutik takkukkusunngitsunut tunniunneqartarnissaat, taamaattumik angerlartitsinermut peqqutissaqavissimanoersoq pillugu paasissutissaqassaaq, aammalu angerlarsimaffimmait imaluunniit assingusumik sulisoqarsinnaanera periarfissaqanngitsoq ilanngullugu.

Tassunga atatillugu naqissuserneqassaaq sulisoq nammineerluni angerlartitaasimalluni nalunaaruteqarsinnaanngimmat. Tamanna § 4-mi oqaaseqaatini erseqqissarneqassaaq.

”§ 12, imm. 4-imi, oqaatsip allanngornissaanut siunnersuut. Qallunaatut matchgruppering, inatsit nr. 28, 2015-imeereersumi, § 2 qulequtaq nr. 8-imi atorneqartoq atorneqarnissaa inassutigineqarpoq:

Innuttaasunik suliffeqanngitsunik tulluarsaqatigiaanut immikkoortitserisassallutik.

”Innuttaasut suliffeqanngitsut assigiissuteqarnermut atatillugu immikkoortiterinermut....” tulluanngimmat.”

Akissut: Oqaasertat allanngortinneqassapput, taamaasilluni suliffisanut, ilitsersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni oqaasertaliussat malinnejqassapput.

2. Kommune Qeqortalik

§ 10 pillugu:

imm. 2:

Aalajangersakkami ersippoq *piviusorsiorumik* anguniakkanik ingerlatanillu suliaqartoqassasoq. Pisortat ikorsiissuteqartarerat pillugu Inatsisartut inatsisaanni § 17, imm. 2-mut siunnersummi aalajangersagaq assinguvoq. Tassani oqaaseq ”*piviusorsiorumik*” ilaangilaq. Aalajangersakkat taakku marluk imarisaaanni piumasaqaatit assigiittariaqarput, aamma oqaaseq ”*piviusorsiorumik*” aalajangersakkani tamani ilaasariaqarpoq imaluunniit

peerneqartariaqarpoq, taamaattumik iliuuseqarnissamut pilersaarutini piumasaqaatinut assigiinngisitsisoqassanngilaq.

Akissut: Ilanngunneqanngilaq. Suliffissarsiornermi ikorsiissutinut atatillugu sulilernissamut piumasaqaat annertunerusoq atuutilissaq, taamatullu inuk sulilernissaminut piareeqqanerussaaq, sulinissamut piareersimalerluni. Taamaattumik iliuuseqarnissamut pilersaarutini pingaaruteqarpoq, suliffissaaleqinermi ikorsiissutinik tigusisussap neqeroorutinik tigusinissamut pisussaaffeqarnera, taamaasilluni tigusisoq suliffeqarnermut utertittussanngorlugu. Taamaattumik assigiinngitsuunissaat pisariaqarpoq.

§ 11 pillugu:

Aalajangersakkami ersippoq kommunalbestyrelsi iliuusissamut pilersaarusrornermut atatillugu ingerlatanut qinnuteqartumut *piumasaqarsinnaasoq* tassungalu ilaapput oqaloqatigiinnerit, iliuuseqarnerit, suliffimmi sungiusarnerit, inuttut ineriarornermut pikkorissarnerit, sulianut pikkorissarnerit aammalu suliffimmik innersuussutigineqartumik tigusinissamut.

Pisortat ikorsiisarnerat pillugu Inatsisartut inatsisaannut siunnersummi § 18-mi aalajanger-sagaq assingusoq ersippoq. Tassani ersippoq kommunalbestyrelsi iliuuseqarnissamut pilersaarummut atatillugu *aalajangersaasinnaasoq* qinnuteqartup ingerlatanut peqataanissaanut, tassunga ilaallutik oqaloqatigiinnerit, iliuuseqarnerit, suliffimmi sungiusarnerit, inuttut ineriarornermut pikkorissarnerit, suliamut pikkorissarnerit aammalu sulilernissamut neqeroorutip innersuussutigineqartup tigunissaa.

Aalajangersakkat taakku marluk ima iluarsineqartariaqarput, taamaasillutik assigliersillugit oqaatsinut "pisussaaffilerneqarnissaat"-nut imaluunniit "aalajangiisoqarsinnaavoq"-mut naleqqiullugit.

Akissut: Ilanngunneqanngilaq. Suliffissarsiornermut ikorsiissutinut atatillugu pingartinneqarpoq, qinnuteqartup suliffissarsiorneranut, piginnaanngorsarneranut il.il. eqeersimaarluni akuunissaanut annertunerumik naatsorsuuteqartoqalernissaa piumasaqartoqalernissaalu. Taamaattumik Inatsisartut inatsisaanni uani oqaaseqatigiit allaanerusut atorneqarput.

§ 13 pillugu:

Imm. 1:

Aalajangersakkami ersarissarneqartariaqarpoq kommunip kommunimi allami suliffimmik innersuussilinnginnerani kommunimit nuufiginiarneqartumit akuersisoqqaartoqartassanersoq, kiisalu kommuni sorleq kingorna akiliisussaanersoq.

Imm. 4:

Uniffimmi siullermi oqaaseq "inissamik naleqquttumik" aammalu "taassuma aappaanut aamma meeraanut 18-it inorlugit ukiulinnut"

Uniffiup tulliani "aamma taassuma appaanut aammalu meeraanut 18-it inorlugit ukiulinnut angerlarsimaannartunut" ilangunneqarsimanngilaq. Taarsiullugu "inissamik naleqquttumik" annertusiallatsinneqarsimavoq "inissamik imaluunniit najugaqarfimmik naleqquttumik" Imm. 1-mi 2-milu inuit pineqartut taakku marluk immikkoortikkusunnagit imm. 4 imatukan-neq allanngortinneqartariaqarluarpoq:

Imm. 1 aamma imm. 2 atorneqassanngilaq, suliffissarsiortunut ikorsiissummik pisartagaqartoq taassumalu aappaa aammalu meeraat 18-it inorlugit ukiullit angerlarsimaannartut najukkami pineqartumi naammaginartumik inissamik imaluunniit najugaqarfimmik pissarsisin-naanngippat.

Akissut: Ilangunneqassaaq. Imm. 1-mi oqaaseqatigiit pingajuanni iliuutsit, utaqqiisaagallartumik inissiigallartarnermi najugaqarfinnut nuukkallarsinnaaneq pineqarpoq, tassani siunertaanngilaq inuit 30-it ataallugit ukioqartut aammalu utoqqaanerusut, inissiat eqqarsaatigalugit, immikkoortinneqarnissaat. Taamaattumik aalajangersakkap paasineqarnissaa qulakeerniarlugu oqaaseqatigiit paasiuminarsarneqarput.

§ 15 pillugu

Suliffeerunnermi ikorsiissutit pillugit Inatsisartut inatsisaanni nr. 2, 15. maj 2014-imeersumi § 10-mi erserpoq, ikorsiissutit ullut pingajuanni napparsimanermi imaluunniit ulloq siullermi napparsimanermi akiliutigineqartassasut nappaatip qanoq sivisutiginera apeqquaatillugu. Inatsimmut siunnersuummi erseqqarilluartariaqarpoq qaqugukkut napparsimaneq naatsorsuutigineqalertarnersoq. Ullormi saaffiginninnermi, ulloq siulleq napparsimalernermi imaluunniit ullut pingajuanni?

Akissut: Ilangunneqassaaq. Inatsisisatut siunnersuummi siunertaanngilaq napparsimanermut atatillugu inatsisitigut pisinnaatitaaffiup allanngortinneqarnissaa, aamma aatsaat ullut pingajuanni napparsimanermi suliffissarsiortutut ikorsiissutinik pisartagaqalersinnaanermut naatsorsuineq atuutilertarpoq.

§ 17 pillugu

Aalajangersakkamut oqaaseqaatini ersippoq inuk, eqqartuussaanermi kingorna peersitaasimasoq imaluunniit sulisartut kattuffiisa akornanni isumaqatigiinniarnerit kingorna sulisitsisoq ilalerneqarsimappat peersitsinermut tunngavissaqanngitsoq, taava suliffissarsiortutut ikorsiis-sutit tamakkiisut kingumoortumik akiliutigineqassapput.

Tunniussinngikkallarnissamik aalajangerneq atorunnaartutut isigineqalissaaq.

Siuliani taaneqartut aalajangersakkani ersittariaqarput oqaaseqaatininnaanngitsoq, taa-maasilluni erseqqarissumik ersersinneqartariaqarpoq suliffissarsiortutut ikorsiissutit aatsaat tamakkiisut kingumoortumik akiliutigineqarsinnaanerat kingorna erserpat, peersitsinermut tunngavissaqarsimanngitsoq.

Akissut: Ilangunneqassaaq. Kingumoortumik suliffissarsiortunut ikorsiissutinik pisartagaqarsinnaaneq inatsimmiitinneqarnissaa pisariaqarpoq aammalu oqaaseqaatini kisimi

ilanngunnagu. Inuup soraarsitaanissamut ilimasaarfigineqarsimannginnerani taarsiissuteqarnerup aamma kingunerisussaavaa inuup piffissami tassani suliffissarsiortunut ikorsiissutinik pisartagaqarsinnaannginnera, takuuk § 3.

§ 20 pillugu

Aalajangersakkami ersittariaqarpoq qaqugumiit suliffissarsiortunut ikorsiissutinik pisartaga-qartarnissamut tunngaviusut naatsorsorneqartarnissaat. (Taamatut aamma inatsisisstatut siun-nersuummi § 19, imm. 2-ani erserpoq inuit akissarsiaqarlutik suliffeqareersimanngitsut suliffissarsiortut pineqartut.)

Akissut: Ilanngunneqassaaq. Taamaattoq § 19-ip allannguutaa aalajangiusimaneqassaaq.

§ 22 pillugu

Aalajangersakkami erseqqarissumik allassimanngilaq namminersortuuusimasoq, suliffissarsiortunut ikorsiissutinik pisartagaqalernissaminut qinnuteqaat sioqqullugu suliffeqarfimminik unitsitsisimasumut, qanoq naatsorsuisoqartassanersoq. Qinnuteqartoq namminersortutut suliffeqarfiuteqarsimaguni (soorlu assersuutigalugu aalisartutut/piniartutut) taava suliffissarsiortutut ikorsiissutinik pisartagaqalernissamut qinnuteqaat sioqqullugu sapaatip akunneri 13-it kingullit aammalu qinnuteqarneq pisimappat suliffeqarfutiminik matusinissaq ullormik sioqqullugu, taava qinnuteqartoq akissarsiaqarluni suliffeqareersimanngitsutut naatsorsuutigineqalissaaq siunnersuutip § 19-ia naapertorlugu, imaluunniit namminersortutut isertitarisimasat aallaavigalugit akunnerit naatsorsorneqartussaappat?

Akissut: Inatsisartut inatsisaanni § 1, imm. 3, § 2, imm. 1 aamma § 22, imm. 3 innersuussutigineqarpoq. Suliffissarsiortutut ikorsiissutit inunnut nammineq pisuussutiginngisaminnik akissarsiaminnik annaasaqartunut aallaaviattut naatsorsuutigineqartarput, namminersorlilik inuussutissarsiortut akissarsiaqarluni suliffeqarneq ajorput, taakkumi § 22, imm. 3-mi inunnut pineqartunut ilaammata.

§ 25 pillugu

Aalajangersakkap imm. 2-anut oqaaseqaatit ilaanngillat.

Akissut: Ilanngunneqassanngilaq. § 25, imm. 2-p oqaaseqarfiginissaa pisariaqartutut isigine-qanngilaq.

§ 28 pillugu

Aalajangersakkamut oqaaseqaatit naapertuutinngitsumik inissinneqarsimappasipput, tassami imm. 1-2-mut oqaaseqaatit aammalu kingorna imm. 2-mut kisimi tunngasut pineqarpasimmata. Ilanngullugu akuersissuteqartarnermut tunngatillugu oqaaseqaatit aalajangersakkap oqaasertaanut sanilliullugu paasinanngimmata, tassani akuersisarnermut periutsit marluk assigiinngilluinnartut pineqarmata. Imm. 1-2-mi oqaaseqaatini erserpoq

akuersineq allakkatigut pisartoq aammalu aalajangersakkap imm. 2-ani ersilluni nipaatsumik akuersissuteqarneq pisassasoq. Inunnut paassisutissanik noqqaanermi akuersineq nipaatsumik pisartussaanngikkaluarpoq.

Akissut: Ilanngunneqassaaq. Inatsisissatut siunnersuut aammalu oqaaseqaatit imminnut naapertuutinngillat. Taamatuttaaq pissusissamisoornerusutut isikkoqarpoq akuersissummik qulakkeerisoqaqqartarnissaa, aammalu pineqartoq akuersissummik tunniusserusunngippat tamanna suliap ingerlanneqarneranut ajoqsiisinnaasariaqarpoq.

§ 32 pillugu

Naalakkersuisut ataatsimoorussamik IT-mi aaqqissuussineranni kommunit akulerutsinnagit maleruagassanik aalajangersaasinnaanerat pissusissamisoortutut isigineqanngilaq.

Taamaattumik Naalakkersuisut aalajangersagaq malillugu maleruagassanik suliaqarneranni kommuninik akulerutsitsisussaatitaanerat ilanngunneqartariaqarpoq.

Inatsisissatut siunnersuut kommuninut ineriartortitsinermut, piviusunngortitsinermut systemillu ingerlanneqarneranut aningaasartuuteqarnerulernermik kinguneqassappat, taava tamanna inatsisissatut siunnersuummi ilanngunneqartariaqarpoq aningaasartuutit tamakkiisut oqimaaqtigiinnissaanik najoqqtassaaq (DUT) naapertorlugu taarsiissuteqartoqartarniassammat.

Akissut: Ilanngunneqanngilaq. Aalajangersakkap oqaasertai innersuussutigineqarput aammalu Inatsisartut inatsisaat nr. 6, 3. juni 2015-imeersoq (suliffinnut nittartakkap atorneqarnera) aamma suliffisanut, ilitsersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaat nr. 28, 9. december 2015-imeersumi § 8. Naalakkersuisut Majoriami sullissiviit aammalu kommunit qanoq nalunaaruteqartarnissaat pillugu maleruagassanik aalajangersaasareerput, aammalu suut qarasaasiatigut aqtsinermi systemit suut atorneqassanersut, taamaattumik allannguut nutajunngilaq, kommuninut nutaamik aningaasartuutinik malitseqartoq.

§ 33 pillugu

Imm. 2-mi aalajangersakkanut oqaaseqataatit amigaataapput.

Akissut: Ilanngunneqassaaq. Namminerisamik oqaaseqaammik suliaqartoqarpoq § 33, imm. 2-mut.

3. Qeqqata Kommunia

Kommunip inatsisissatut siunnersuutip kapitali 7-a itinerusumik nassuaqqua, taamaasilluni suliffissarsiortunut erseqqarinnerulerniassammat, suliffissarsiortoq suliffeqarnermi piareersimanngikkuni tamanna sunik kinguneqarsinnaanersoq paasineqarsinnaaniassammat. Pingaaruteqarpoq inatsimmi erseqqarissumik allassimasoqassasoq suliffissarsiortoq, iliuuseqarnissamut pilersaarummi tassunga tunngasumi, oqaloqatigiinnernut imaluunniit iliuutsinut peqataanngippat, tamanna sunik malitseqassanersoq.

Akissut: Ilanngunneqanngilaq. § 17-imut taamaattoq annikitsumik allannguisoqarpoq.

Pingajuattut kaammattuutigerusupparput maannakkut kommunip ullut 14-ikkaarlugit akis-sarsianik akiliuteqareernerisa kingorna suliffissarsiornermi ikorsiissutinik akiliuteqartoqartarnissa. Tassami suliffissarsiortunut ikorsiissutit amerlasuutigut allaffissornikkut suliassanik amerlaneruseunik malitseqartarmata, assersuutigalugu pineqartoq piffissap ilaani suliffeqarsimappat il.il. naatsorsuisoqartussaammat. Sulisutta suliassaasa sapinngisamik oqilisarnissaat soqutigisaraarput, taamaattumik maannakkut kommunip akissarsialerisarnerata kingorna aatsaat ikorsiissutit akiliutigineqartarnissaat kaammattuutigaarput.

Akissut: Ilanngunneqarpoq. Kommunip akissarsitsisarneratut, ullut 14-ikkaarlugit pisalis-saaq.

4. Kommuneqarfik Sermersooq

§ 4. Angerlartitsineq imatut paasineqassaaq:

1) Angerlartitsinertut isigineqassaaq sulisitsisup atorfeqartitsinermik atorunnaarsitsigallarnerat ullut 14-it angullugit sivisussusilimmik, nioqquṭissiornerup uninnerani, nioqquṭissiassaarunnermik imaluunniit silamik peqquteqartumik.

§ 4-mut atatillugu Kommuneqarfik Sermersuup angerlartitsinermut tunngatillugu erseqqissaatigissavaa nioqquṭissiassaaleqinerup imaluunniit silamik peqquteqarnerup saniatigut pissutsinik allanik siumut oqaatigineqareersinnaanngitsunik pisoqarsinnaammat, nioqquṭissiornermut unitsitsisinnaasunik. Assersuutigalugu Kuummiuni aalisakkerivik 2021-mi aasaanerani nioqquṭissiornerminik unitsitsivoq fabrikkip inallaagissamik pilersorneqarnera naatsorsuutigineqanngitsumik ajutoormat. Kommuneqarfik Sermersuup taamaattumik siunnersuutigaa § 4 imatut oqaasertalerneqassasoq nioqquṭissiorneq pissutsit allat ilanngullugit unitsinneqarsinnaasoq, sulisitsisup sulisullu sunniuteqarfigisinnaasaasa avataatigut soorlu nioqquṭissiassanik amigaateqarneq aammalu silamik peqquteqarneq, taamatullu pilersuinerup unittoorneranik.

Akissut: Ilanngunneqarpoq. Siunertaanngilaq suliffissarsiornermi ikorsiissutinik pisartaga-qartut qaqugukkut angerlartinneqarneranni maleruagassanik allannguisoqarnissa. Siunner-suut allatut oqaasertalerneqarpoq, taamaasilluni erseqqissarneqarluni angerlartitsinerup qaqugukkut pisarnissaanik paasinnittarneq allanngortinniarneqanngimmat. Taamaattoq COVID-19-mut killiffik allallu angerlartitsinermi peqqutaasinnaasut eqqarsaatigalugit peri-arfissaqalerpoq nutaamik oqaasertaliinissaq.

§ 7, imm. 2. Suliffissarsiortunut ikorsiissutinik pisartagaqartut minnerpaamik sapaatip akuneranut ataasiarlutik nalunaarsortittassapput suliffissarsiortutut www.suli.gl-imi NemID atorlugu, imaluunniit qitiusumik ingerlatsivimmi Majoriami nalunaarsortinnermikkut.

§ 14, imm. 3. Inuk suliffissarsiortutut sulinngiffeqartutut nalunaarsortissaq www.suli.gl-imi NemID atorlugu, imaluunniit qitiusumik ingerlatsivimmi Majoriami nalunaarsortissalluni. Inuk pineqartoq suliffissarsiortutut sulinngiffeqartutut nalunaarsorsimanngikkuni sulilernissamut piareersimasutut isigineqassangilaq.

§ 7, imm. 2-mi oqaaseq "nalunaarsortittassapput", taarserneqassasoq oqaatsimit "nalunaarsortissapput"-mik taarserneqassasoq.

Kommuneqarfik Sermersuup siunnersuutigerusuppa qarasaasiatigut systemi NemID aalajingersimasorujussuaq inatsisip oqaasertaaniit peerneqassasoq, qarasaasiatigut systemi siunis-sami allanngortinneqarsinnaammatt. Assersuutigalugu NemID atorunnaarsikkiartorneqarpoq. Kommuneqarfik Sermersuup taamaattumik siunnersuutigerusuppa oqaaseqatigiit aalajangersimarpalaannginnerusut, assersuutigalugu "...digitalimik nalunaarsuinikkut imaluunniit inuttut ornigunnikkut" atorneqassasut.

Akissut: Ilanngunneqassaaq. Oqaaseqatigiit allanngortinneqassapput tamanut ammasumik digitaliusumik atsiorninngorlugu.

§ 8. Suliffissarsiortunut ikorsiissutinik pisartagaqartut suliffisanut inuttaqanngitsunut suliffigissallugu periarfissaqarfigisaminut qinnuteqartarnissamut pisussaaffeqarput.

Imm. 2. Suliffissarsiortunut ikorsiissutinik pisartagaqartut pisussaapput suliffissami inner-suunneqartumi sulilernissamut, ullormit ataatsimik siumut nalunaarfigineqarnermikkut.

Imm. 1 aamma atuuppoq suliffissarsiortunut ikorsiissutinik pisartagaqartunut sulisitsisumiit suliffissamik inuttaqanngitsumik neqeroorfigneqartunut.

Kommuneqarfik Sermersuumiit tupigusuutigineqarpoq § 8, imm. 2-mi "imm. 1" innersuussutigineqarmat, tassami oqaaseqatigiit oqaaaseqatigiinnut imm. 1-miittunut innersuussutigineqanngimmat, kisiannili oqaaseqatigiit siulii pineqarlutik. Taamaattumik "imm. 1" taarsertariaqarpoq "Tamanna"-mik.

Akissut: Ilanngunneqarpoq. Oqaasertaa allanngortinneqassaaq.

§ 10, imm. 2, suliatigut/suliamut tunngasutigut

Kommuneqarfik Sermersuumiit naapertuutinngitsutut isigineqarpoq iliuusissatut pilersaarut aalajangiisuutinneqassappat, soorlu § 10, imm. 5-mi tamanna ersertoq. Iliuusissatut pilersaarut innuttaasup kommunillu akornanni suleqatigiinnissamut isumaqatigiissutaavooq, nukissat, iliuusissat piumasaqaatillu qulaajarlugit.

Iliuusissatut pilersaarut suliarineqartarpoq ikorsiissutinik pisartagaqartoq atsioqatigalugu aammalu atsiortillugu, taamaattumik tunngavilersuutitut maleruagassat aammalu § 10, imm. 6-mi maalaaruteqarnissamut ilitsersuut pisariaarupput. Ilanngullugu iliuusissanut

pilersaarutip aaqqittaqattaartuarnissaanut § 12-mi ikkussaqarpoq, tassanilu ingerlaavartumik naammagittaalliutit naammagittaalliutaasinnaasullu ilanngunneqarsinnaallutik.

Kommuneqarfik Sermersumiit aamma ernumassutigineqarpoq sulisunut nukiit kommunimiit atorneqartariaqartussat, soorlu ikorsiissutinik pisartagaqartoq Isumaginninnermut Maalaartarfimmut iliuusissatut pilersaarutit assigiinngitsut sisamat maalaarutigisinnaalissammagit. Tamanna aamma suliffissaaleqisup sulilersinniarneranut kinguarsaataassaaq.

Kommuneqarfik Sermersumiit sakkortunerpaamik kaammattutigineqarpoq inatsisissatut siunnersummi § 10, imm. 5 aamma 6 peerneqassasoq.

Akissut: Ilanngunneqarpoq. Allatut oqaasertalerneqassaaq kommunip tikkuagaatut aalajangiinerunngimmat, susassaqartup tusarniarnissaa pisariaqanngimmat qinnuteqartoq iliuusissatut pilersaarutip naammassillugu suliarinissaanut peqataasussaammat. Taamatuttaaq tunngavilersuut qangalu tamakkiisumik ilaliisoqarsimanera ajornakusuussasoq erseqqissassallugu. Taamaattumik toqqaannanngitsumik iliuusissatut pilersaarutip misilinnissaa periarfissaqassaaq iliuusissatut pilersaarummut toqqammavigineqartut iliuusissat pillugit maalaaruteqarnikkut.

§ 12, imm. 4. Innuttaasut suliffeqanngitsut assigiissuteqarnermut atatillugu ataatsimoortunut inissititerinermut atatillugu Naalakkersuisut aalajangersagaliorsinnaapput. Kommuneqarfik Sermersumiit tikkuarneqarpoq § 12, imm. 4 atorfissaqanngimmat siunertaqaranilu, tassami § 1-mi aalajangersarneqareeropoq inatsisissatut siunnersummi pineqarmata innuttaasut assigiissuteqarlutik immikkoortitikkami 1-miittut.

Assigiissuteqartunut atatillugu ataatsimoortunut inissititerinermut atatillugu aalajangersaasinnaanermut piginnaatitsissut suliffissanut, ilitsersuisarnermut-pikkorissaqqinnernullu qitiusumik ingerlatsiviit pillugit Inatsisartut inatsisaat nr. 28 ulloq 9. december 2015-imeersumut inissinneqartariaqarpoq.

Akissut: Ilanngunneqarpoq. Aalajangersagaq nuunneqarpoq, taamaasilluni aallarniutigalugu oqaatigineqassaaq § 1, imm. 2-mi kikkut sulilernissamut piareersimanersut. Aalajangersagaq § 1-mut imm. 4-tut nuutinneqarpoq.

Suliffeqarnermi innersuussisarneq il.il. pillugit Inatsisartut inatsisaanni nr. 5, 8. juni 2014-imeersumi § 2, imm. 2-mi aamma suliffissanut, ilitsersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni nr. 28, 9. december 2015-imeersumi § 8, imm. 2-mi Naalakkersuisut nalunaaruteqartarnermut il.il. pillugit aalajangersaanissamut piginnaatinneqarput.

§ 23. Siumoortumik qinnuteqarnikkut ilassutitut suliffissarsiornermi ikorsiissutinik tunnusisoqarsinnaavoq, piffissap ilaannaani suliffeqarnermi annerpaamik sapaatip akunnerinik

sisamanik sivisussuseqartuni, piffissap qaammatinik tulleriinnik arfinilinnik sivisussuseqartup iluani.

Kommunip erseqqissarpaa § 23-i naapertuutinngitsoq, innuttaasut amerlanerit ulluinnarni inuuniarnermi ineqarnermut akiliutinut aammalu aalajangersimasumik akiliutinut akissaqarusullutik ilassutitut suliffissarsiornermi ikorsiissutinik pisariaqartitsarnerat, ilutigisaanillu naammaginartumik ataavartumik pilersuinissamut peqartunik. § 23-mi maleruagassat taamaasillutik innuttaasut piffissap ilaannaani atorfeqartut/suliffeqarneraniit ajattorsinnaavai, piffissaq tamaat atorfiusinnaasumik innersuussutitaqartinnagu.

Akissut: Ilanngunneqanngilaq. § 1 innersuussutigineqarpoq, inatsisartut inatsisaanni siunertaavoq innuttaasut tamarmik minnerpaaffianik isertitaqarnissamik qulakkeerneqassangitsut, kisiannili inuit sulinermanni isertitaasa annaaneqarneranni, pisortanit ikorsiissutituut ikorneqartariaqalerneq pinnagu, ikorsiissutinik pisartagaqalernissaat qulakkeerniarneqartoq. § 23 atorneqassaaq sulileriaannaat suliffeqarnermut uternissaannut ikiorniarlugit, ilaatigut piffissap ilaani atorfeqartitsinermi, tamanna suliffissarsiornermi ikorsiissutinik tamakkiisumik pisartagaqarnissamut annaasaqaataanngitsumik.

Taamaattumik suliffissarsiornermi ikorsiissutinik pisartaqarnermi tamanna siunertaanngilaq aamma § 23-ip qulakkeertussaavaa piffissap ilaani atorfeqartut arlaatigut minnerpaamik isertitaqarsinnaanerat.

Kommuneqarfik Sermersuup tupigusuutigaa § 25-mi qaammammi ullormik aalajangersimasumik taasaqarluni aalajangersaasoqarnera, tassanimi ullormi aningaaseriviit matoqqatitsisinnaammata, aamma taarsiullugu siunnersuutigineqarpoq oqaasertaliunneqassasoq kommunip akunnermusialinnut akissarsititsinerani ullaat akiliuteqarfiusartut malinnejqassasut.

Akissut: Ilanngunneqassaaq. Kommunip akissarsititsarerani ullaat 14-ikkaarlugit akiliuteqartarnissaq pisartussanngorlugu allanngortinneqassaaq.

§ 28, imm. 1 aalajangersaasinnaanermik imaqarpoq kommunip, qinnuteqaatinik suliaqarnissaminut aammalu nakkutilliinissaminut atatillugu, inunnut paasissutissanik aallersinnaaneranik pisariaqartunillu ingerlatitseqqissinnaaneranik. Taamaattumik imminut assortuuppoq oqaasertani allanneqarmat suliffissarsiornermi ikorsiissutinik pisartagaqartup atsiorlugu piginnaatitsisummik tunniussissasoq communalbestyrelsimeut, pisariaqartutut nalilerneqaraangat, inunnut ataasiakkaanut tunngasunik aammalu inummut tunngasunik paasissutissanik pissarsiniarnissaanut ingerlatitseqqissinnaaneranullu.

Kommuneqarfik Sermersuup siunnersuutigaa § 28, imm. 2 ima allatut oqaasertalerneqassasoq ersarissarlugu qinnuteqarnermut atatillugu oqaasiinnakkut imaluunniit allakkatigut piginnaatitsisummik tunniussisoqareersimaneranik. Ilanngullugu

aamma aalajangersakkami ersarissarneqartariaqarpoq oqaasertaqanngitsumik piginnaatitsineq sumik imaqarnersoq.

Akissut: Ilanngunneqarpoq. Taamaasilluni aalajangersakkap pisortat ikorsiissuteqartarnerat pillugu Inatsisartut inatsisaat assigilerpaa.

§ 33, imm. 2. Kommunit agguataarnerisa avataanni inuit aalajangersimasumik najugallit imaluunniit inisisimasut kommunalbestyrelsip Naalakkersuisullu aalajangersaaffigisimasai, Isumaginninnikkut Maalaaruteqartarfimmut suliassangortinneqarsinnaapput. Kommuneqarfik Sermersuup siunnersuutigerusuppa § 33, imm. 2 erseqqarinninngorlugu oqaasertalerneqassasoq.

Akissut: Ilanngunneqassaaq. "ni" allanngortissaq "nni"-mut § 30, imm. 2, pkt.2.-mut innersuussisoqarpoq.

5. Kommune Kujalleq

§ 1, imm. 1 pillugu: Inatsimmi.... inuit sulilernissamut piareersimasut, pineqartut allaaserineqarpoq. Kapitali 4-mi qulequattami oqaaseq taanna sulilernissamut piareersimaneq atorneqarpoq, taamaattoq oqaaseq taanna kapitalit ilaanni aalajangersakkani atorneqanngilaq. Taamaattumik siunnersuutigineqarpoq oqaatsip taassuma (minnerpaamik) § 9-mi atorneqarnissaa/ilanngunneqarnissaa. Inuit assigiissuteqarlutik immikkoortiterneqartarnerat pillugu aalajangersagaliorneq immaqa ataatsimoortinneqalersinnaavoq, takuuk § 12, imm. 4-mut oqaaseqaatit.

Akissut: Ilanngunneqassaaq. § 1-mi ilanngunneqassaaq Naalakkersuisut sulilernissamut piareersimasut pillugit malittarisassiorsinnaanerat, § 12, imm. 4-miit nuutinneqassaaq.

Suliffeerunnermi ikorsiissutit pillugit Inatsisartut inatsisaanni nr. 2, 15. maj 2014-imeerumi § 4-mi allassimavoq "Angerlartitsisarneq pillugu malittarisassat taamaallaat nunami tunisiorfinnik atuinermi atorneqarput". Aalajangersagaq taanna inatsisissatut siunnersuummi saqqummiunneqartumi atoqqinnejqanngilaq, aamma oqaaseqaatini erserpoq tamanna allannguuteqartitsinarnermi siunertaasoq. Taamaattumik siunnersuutigineqarpoq inatsisissatut oqaasertami tamanna nalorninartuerunneqassasoq.

Akissut: Ilanngunneqarpoq. § 4-mut oqaaseqaatit allannguutaanniippoq. Oqaaseq "nunami tunisassiorfinnik" pissusissamisuunngitsutut isigineqarpoq tamanna inatsimmi atorneqarnera nalornisigineqarmat qularutigineqarlunilu, taamaattumik peerneqarpoq. Nunami tunisiorfiunersoq ilumut naqissusissallugu taamaattumik soqtiginaataaruppoq.

§ 1, imm. 3 pillugu: Allanneqarpoq suliffissarsiortunut ikorsiissutit aningaasarsiatigut namineq pisuussutiginngisamik isertitaqannginnermut taartisiatut akilerneqassapput ajunaarnersuaqarnerani. Taamaattoq inatsisip aalajangersagaasa sinnerini ajunaarnersuit pillugit allassimasoqanngilaq. Taamaattumik siunnersuutigineqarpoq inatsimmi ersarissumik

ersersinneqassasoq aalajangersakkat suut qaqugukkut atorneqarsinnaanersut aammalu tassunga ilanngullugu qanoq sivisutigisumik atorneqarsinnaanersut. Oqaaseqaatini nalunaarsorneqarpoq "aalajangersagaq § 5-mi atuuttumut assinguvoq", suna inatsit tassani pineqarpa?

Akissut: Ilanngunneqarpoq. Suliffissarsiortunut ikorsiissutinik pisartagaqarnissamut angerlartitaanermut peqqutigalugu tunisassiornerup unitsinneqarneranut peqqutaasut allanngortinneqarnissaat siunertaasimanngilaq.

§ 3 pillugu: Inatsimmi oqaasertami ersersinneqartariaqarpoq ikorsiissutit allat piffissami tassani siunertamilu tassani pineqartut. Malittarisassami tassani soorlu assersuutigalugu siusinaartumik pensioninut atatillugu inissisimava – akunnattumik aammalu appasinnerpaamik siusinaartumik pensionisiaqarnermi?

Akissut: Ilanngunneqanngilaq. Inuk siusinaartumik pensionisiaqalertussaq inatsisip § 1-aningiallortaanik allassimasutut sulilernissamut piareersimasutut isigineqarsinnaanngilaq.

§ 4, imm. 1 pillugu: Normulersuineq peerneqartariaqarpoq. "Silamik peqquteqarneq" nassuaasissallugu pisariaqartitsisoqarunannngimmat?

Akissut: Ilaatigut ilanngunneqarpoq nr. 2-tut inissillugu, taamaattoq "silamik peqquteqarneq" nassuaatigissallugu pisariaqanngilaq.

§ 5 pillugu: Sumi najugaqartutut nalunaarsorsimaneq pillugu inatsimmi (Qitiusumik Inuit Allattorsimaffiat pillugu Inatsisitigut nalunaarut nr. 1297, 3. september 2020-imeersumiugunarpoq) naapertuunnersoq qulakkeerneqartariaqarpoq.

Akissut: Tusarniaanermi akissummi suna isumagineqarnersoq ersernerluppoq.

§ 6, imm. 1 pillugu: Inatsisip oqaasertaani piffissamik killiliisoqanngilaq qaqugukkut suliffissamik innersuunneqartumik tigusisoqassanersoq, suliffeqalernissamut sungiusaasarnernut neqeroorutigineqartartunut peqataasartussaanersoq, allamik ilinniagaqartinneqarsinnaanersoq imaluunniit innersuunneqartumik pikkorissaqqinnermik tigusisussaanersoq. § 8, imm. 2-mi allassimavoq suliffissami innersuunneqartumi sulilernissamut ullormik ataatsimik siumut nalunaarfigineqarnikkut pisussaasoq. Suliffeqalernissamut sungiusaasarnermut, allamik ilinniagaqartinneqarsinnaaneq imaluunniit innersuunneqartumi sulilernissamut ulloq ataaseq piffissarititaappat, taava taanna pillugu oqaaseqaatini pineqartut § 8-mut nuutinneqartariaqarput.

Akissut: Ilanngunneqanngilaq. Suliffissarsiortutut ikorsiissutinik pisartagaqalerniartunut ersarippoq ullormik ataatsimik siumut nalunaarfigineqarnikkut pisussaaffeqartussaaneq.

§ 6, imm. 2 aamma § 7, imm. 1 pillugu. "Suliffissarsiortunut ikorsiissutinik pisartagaqartut Majoriami suliffissarsiortutut nalunaarsorsimassapput" aamma "pisussaapput equeersimaartutut suliffissarsiortutut nalunaarsorsimanissamut www.suli.gl-imi"; nalunaarsuinerit taakku assigiinngitsut marluuppat/ nalunaarsuinerit marluusussaappat? IT-systemit akornanni nalunaarsuinerit namminerisamik (automatiskimik) ilaatigut nuutinneqarsinnaappat?

Akissut: Suliffissarsiortoq Majoriamut nalunaartussaavoq suliffissarsiortluni, aamma suliffim-mik ujaasisussaavoq. Taakku assigiinngitsut marluupput.

§ 7 pillugu: Pissutsit immikkut illuinnartut peqqutigalugit www.suli.gl aqqutigalugu nalunaarsortinnginnissamut periarfissaqartoqartariaqarpoq. Oqaaseqaatini erserpoq "Suliffissarsiornermi ikorsiissutinik pisartagaqartup suliffissarsiornermik nalunaarsuineq nutartinngippagu pineqartup piareersimasussaanermik pisussaaffeqarneq eqqortissanngilaa killilersuiffigineqassallunilu." Tamanna inatsimmi aalajangersakkami ilanngullugu ersersinneqartariaqarpoq.

Akissut: Ilanngunneqanngilaq. Killilersuiffigineqalernermut malittarisassani § 17-mi taman-na erserpoq.

§ 8, imm. 1 pillugu: "...suliffissanut inuttaqanngitsunut suliffigissallugu periarfissaqarfigisamnnut qinnuteqartarnissamik pisussaaffeqarput" ersarissarneqartariaqarpoq, soorlu assersuu-tigalugu qaqugumut killeqarneranik aammalu sumi suliffiit inuttaqanngitsut inuttassarsiuunneqartut, suliffissarsiortutut ikorsiissutinik pisartagaqartup qinnuteqarfigisinnaanerai? Najukkami suliffiit inuttassarsiorneqartut kisimik pineqarpat? Oqaaseqaatini tusagassiivit assigiinngitsut, atorfinnik inuttassarsiornermut atorneqarsinnaasut, oqaatigineqarput. "Najukkami nivinngaavit allat" aamma ilanngunneqartariaqarput, tassanilu najukkami aviisit kisimik pineqanngillat. Oqaaseqaatini erserpoq "Suliffissarsiornermi ikorsiissutinik pisartagaqartoq atorfinnik inuttaqanngitsunik sulisinnaassutsiminut naleqquttunik qinnuteqanngikkuni pineqartup suliffeqarfinnut piareersimasussaanermik pisussaaffik eqqortissanngilaa." Tamanna aamma inatsimmi aalajangersakkami ersetariaqarpoq.

Akissut: Ilanngunneqanngilaq. Kommunalbestyrelsip inuk pineqartoq illoqarfimmut allamut nuutissinnaanngippagu, taava pineqartoq aamma illoqarfimmi allami sulilernissaanut pisus-saaffilerneqarsinnaanngilaq.

§ 8, imm. 2 pillugu: Oqaaseqaatini erserpoq "Suliffissarsiornermi ikorsiissutinik pisartaga-qartup atorfik pineqartoq sulisinnaassusianut nalequttoq innersuunneqartoq neqeroorutigineqartorluunniit suliffigilinngippagu (taava, red.) pineqartup piareersimasussaanermik pisussaaffini eqqortissanngilaa." Tamanna aamma inatsimmi aalajangersakkami ersetariaqarpoq.

Akissut: Ilanngunneqanngilaq. § 17 innersuussutigineqarpoq.

§ 9 pillugu: Erservoq "Sapaatip akunneranut annikinnerpaamik akunnerni 20-ni qinnuteqartoq nalinginnaasumik sulisinnaassanersoq kommunalbestyrelsip qinnuteqartoq suleqatigalugu tamakkiisumik nalilersussavaa....." Ersernerluppoq suut kingusinerisinnaanerai kommunalbestyrelsip qinnuteqartullu, qinnuteqartup qanoq piginnaasaqarnera pillugu assigiinngitsumik isumaqartoqassappat.

Akissut: Ilanngunneqanngilaq. Sapinngisamik isumaqatigiissut aallaavigineqartussaavoq aamma kommunalbestyrelsip sapinngisamik annertunerpaamik pisartagaqartoq akulerutsit-tussavaa iliuusissatut pilersaarutip suliarineqarnerani. Taamaattoq naggataatigut kommu-nalbestyrelse taannaavoq iliuusissatut pilersaarummik aalajangiisussaq.

§ 10, imm. 2 pillugu: "Iliuusissatut pilersaarummi piviusorsiortunik anguniakkanik iliuusisanillu pilersitsisoqassaaq". Oqaaseq "iliuuseqarneq" aalajangersakkanut atatillugu oqaaseqaatini atorneqarpoq. Inatsisisatut siunnersuummi arlalinni oqaaseq "ingerlatat" atorneqarpoq, aammalu oqaaseqaatini "iliuuseqarneq" atorneqarluni. Oqaatsit atorneqartut assigiittariaqarput. Siunnersuutip § 10 imm. 2-ni ingerlatat assigiinngitsut taagorneqarput, "qinnuteqartup sulisoqarnermut attuumassuteqarnera pitsanngorsarniarlugu nukittorsarniarlugulu, tassa taakkusut sulisoqarnermut ilinniarnermullu suliat attuumassuteqartut. Soorlu oqaaseqaatini oqaatigineqareersutut illoqarfimmiit illoqarfimmut kiisalu nunaqarfimmiit nunaqarfimmut neqeroorutit periarfissallu assigiinngitsorujussuusinnaapput. Taamatuttaaq ingerlatat soorlu assersuutigalugu qinnuteqarnissamut piffissarititaasoq, piginnaanngorsaanermut pikkorissarnerit, ilinniarti-taanikkut piginnaanngornikkullu sammisaqarnerit piffissap aalajangersimasup iluani naam-massillugit ingerlanneqartussaasarput. Taamaattumik unamminartorujussuussaaq iliuusissatut pilersaarummi ingerlatat aalajangersimasut nalunaarsorneqarsimasut piviusunngortinniarnissaat, aammalu ilumut kommunip qinnuteqartullu sunniuteqarfigisinnaanngisai imaluunniit annikitsuaqqamik sunniuteqarfigisinnaasai, soorlu assersuutigalugu piffissarititaasoq aammalu piginnaanngorsarnermi pikkorissarneq, "suliamut ilinniagaqarsimangngitsunut" pingarnertut sammineqartoq.

Akissut: Ilanngunneqanngilaq.

§ 11 pillugu: Aalajangersakkami erservoq "Kommunalbestyrelsip iliuusissatut pilersaarutip ilaatut qinnuteqartoq pisussaaffilissavaa..." Aalajangersakkamut oqaaseqaatini erservoq taa-matut pisussaaffiliineq aalajangiinerusoq. Tamanna aalajangersakkami ersarissumik nalunaarsorneqartariaqarpoq.

Akissut: Ilanngunneqarpoq.

§ 12 aamma § 15 pillugu. Inuit, suliffissarsiortutut ikorsiissutinik pisartagaqartut napparsi-manneranni, iliuusissatut pilersaarusiortoqartartussaanngilaq ilaa? Imatut pisoqarsinnaavoq iliuuseqarnissamut pilersaarusiornissaq pisariaaruttarluni, soorlu assersuutigalugu nissumik imaluunniit talermik napisisoqarsimappat. Taamatut aamma pisoqarsinnaavoq ataatsimut isiginnilluni iliuuseqarnissamut pilersaarusiortoqartariaqalerluni, soorlu assersuutigalugu piffissami sivisuumi napparsimanermi ilaatigut killilimmik sulisinnaassuseqarallalernermik kinguneqartumik. Pissutsit tamakkua inatsimmi oqaaseqaatinilu ilanngullugu ilanngunneqartariaqarput.

Akissut: Ilanngunneqanngilaq. Iliuuseqarnissamut pilersaarusiortarnermut siunertaavoq pisartagaqartup killiffia allannguuteqarpat aammalu taassuma saniatigut minnerpaamik qaammatit pingasukkaarlugit. Qulakkeerneqassaaq inuit sulilernissamut piareersimasut napparsimaneranni "puigugaannginnissaat", taamaattumik kommunalbestyrelsip ingerlaavartumik aammalu minnerpaamik qaammatit pingasukkaarlugit sulilernissamut piareersimasup killiffia nalilersortassallugu, aammalu sunik iliuuseqarluni suliffimmik ataavartumik taanna pissarsissunneqarsinnaanersoq.

§ 12, imm. 4 pillugu: "Innuttaasut suliffeqanngitsut assigiissuteqarnermut atatillugu attaatsimoortiternerannut atatillugu Naalakkersuisut aalajangersagaliorsinnaapput". Taamatut aalajangersaaneq pipallataarpasippoq. Aalajangersagaq nassuaaserneqartariaqarpoq imalerlugulu. Taamatuttaaq taaguut "inuit suliffeqanngitsut" ersernerluppallaarpoq; eqimattat suut taamatut oqaatsimi pineqarpat: suliffissarsiortutut ikorsiissutinik qinnuteqartunut pisartagaqartunullu kisimi tamanna atuutissava? Imaluunniit suliffissaaleqisut, pisortaniit ikorsiissutinik pisartagaqartunut aamma tamanna atuutissava?

Akissut: § 12, imm. 4 nuutinneqarpoq § 1, imm. 4-nngortillugu.

§ 13, imm. 1, aamma imm. 2 pillugu: Taamatut pisussaaffiliinermi allatut iliuuseqarsinnaaneq periarfissaasariaqarpoq, imm. 4-mi taaneqartutut immikkut illuinnartumik pisoqartillugu, soorlu assersuutigalugu aapparisaq nuunnerup kingorna suliffimmik innersuunneqarsinnaanngippat imaluunniit ilaquaasooq innarluuteqarsimappat imaluunniit immikkut pisariaqartitsisuusimappat, najukkami, suliffimmi innersuussiviusumi, taamatut neqeroorfigineqarsinnaanngippat.

Akissut: § 13, kommunalbestyrelsip innersuussinissaanut periarfissaavoq, taamaattumik kommunalbestyrelsip allatut iliuuseqarsinnaaneranik aalajangersaanissaq pisariaqanngilaq.

§ 14, imm. 3 pillugu: § 7-mut oqaaseqaatit takukkit. Taamatuttaaq atuutitsinnginnej tassani pineqarpoq.

Akissut: Ilanngunneqanngilaq.

§ 15, imm. 3 pillugu: "... piffissap qaammatinik 3-nik sivisussuseqartup iluani" allanngortinneqartariaqarpoq imaalerlugu "... qaammatit pingasut ilassutaasut iluanni."

§ 15, imm. 3-mut oqaaseqaatini erserpoq: "Suliffissarsiornermi ikorsiissutinik pisartagaqarsinnaatitaaneq annaaneqassanersoq pigiinnartinneqassanersorluunniit siusinnerpaamik piffissap qaammatit arfinillit naaneranni aalajangerneqarsinnaavoq." Qinnuteqartup sunngitsuvilernissaa pinngitsoortinniarlugu aalajangiineq qaammatit arfinillit naanissaat sioqqullugu pisariaqaraluarpoq. Tamanna aamma inatsisip oqaasertaani ilaasariaqaraluarpoq.

Akissut: Ilanngunneqanngilaq.

§ 17, imm. 1 pillugu: Aalajangersakkamut oqaaseqaatini erserpoq "Suliffissarsiornermi ikiorsiissutinik pisartagaqartup suliffimminit soraarniuteqarneranut, sulinngitsoorneranut atorfimminillunniit qimatsineranut pissutaasut pingaartinneqanngillat. Nammineerluni soraarniuteqarneq tassunga ilanngullugit sulinngitsoornermut peersitaanermullu tunngaviusut apeqqutaatinnagit killilersuisoqalissaq." Tassani qinnuteqartoq ilungersunartumik naapertuilluanngitsumik killiffeqalissaq, qinnuteqartoq/sulisartoq amerlanertigut sulisitsisumut sanilliullugu sanngiinnerujussuummat. Kommunimut periaarfissaasariaqarpoq nalilersussallugu suna tunuliaqutaanersoq aammalu killilersuisoqalernera pinngitsoortissinnaatillugu. Taamaassappat qinnuteqartup, suliffik peqqiilliuteqalernini peqqutigalugu soraarniuteqarfigisimappagu, tamanna periaarfissaasariaqarpoq.

Aamma imatut pisoqarsinnaavoq inuk suliffimminiit soraartariaqalersimappat, killilersuisoqarnissaanik kinguneqartariaqanngitsumik. Soorlu assersuutigalugu pilersuisup kisermaap mikisunik meerallip piffissani nikerartuni unnukkut sapaatillu akunnerisa naanerini unnukkorsiortariaqarluni sulisimappat. Imaluunniit suliffimmi assersuutigalugu oqimaatsumik kivitsisarneq, inuup sapilersimappagu. Imaluunniit suliffimmi akuutissat/atortut, inuup sapigaanik akoqarpata. Tamakku aalajangersakkami ersittariaqarpoq, qaqugukkut killilersuisoqarsinnaanera, taakku ingerlatsinermi inatsisit malillugit aalajangiiffigineqartussaammata.

Inatsisisstatut siunnersuutip maannakkutut oqaasertai aallaavigalugit akerlianik aalajangiisoqassagaluarpat, tamanna kommunip/Majoriap aalajangiiniarneranut ajornanngippallaassaaq, taava taamatut aalajangiinerup amerlanertigut kingunerisartussaavaa pisortanit ikorsiissutinik imaluunniit immaqa ikorsiissutinik allanik qinnuteqarneq, taamaasilluni kommunimut annertunerujussuarmik suliassanik malitseqalerluni.

Akissut: Ilanngunneqarpoq. Imatut pisoqarsinnaavoq sulisitsisup atorfekartitsinermut pissutsinik annertuumik unioqqutitsineratigut soraarsitsineq killilersuisoqarnissaanik

kinguneqartinneqarnani. Tamanna assersuutigalugu pisinnaavoq sulisitsisoq piumaffigineqaraluarluni aningaasarsitisimannngippat, Kalaallit Nunaanni sullivinni avatangiisit pillugit inatsimmi § 12 a naapertorlugu sulisoq annertuumik tassanngaannartumillu ulorianartorsiulernini pissutigalugu suliffimminik qimaguttariaqarsimappat, aammalu sulisitsisup killiffiup pitsaanerulernissaa anguniarlugu iliuuseqarsimanngippat. Immikkut ingasalluinnartumik pisoqartillugu nam-mineq soraartoqarsimappat tamanna killilersuisoqarneranik kinguneqartinneqarnavianngilaq. Tusarniaanermi peqqutit taamatut pisoqarnerani atorneqarsinnaanavianngillat.

Killilersuisoqarnera aalajangiineruvoq, tamannalu aalajangersakkami ilaasariaqanngilaq.

§ 20, imm. 1 pillugu: Inatsisit malitsigitinneqartut suunerat, qanoq kinguneqartitsisoqassannersoq, suliffissarsiortup ikorsiissutinik pisartagaasa aningaasartaannut qanoq sunniuteqassanersoq, apeqquaassaaq piffissami katersuiffiusumi SIK-p minnerpaaffiatut akissarsiarititai nalimmassarneqarsimappata. Inatsisissatut siunnersuutip § 21-ia ilaatigut nalimmassarneqarpa?

Akissut: Ilanngunneqanngilaq.

§ 20 imm. 3 pillugu: Tamanna inatsimmi malitseqartitsinermi ersersinneqartariaqarpoq, qanoq kinguneqartitsisoqassanersoq, suliffissarsiortup ikorsiissutinik pisartagaasa aningaasartaannut tamanna qanoq sunniuteqassanersoq, qinnuteqartoq piffissami katersuiffiusumi 30-ileereersimappat. Tamanna inatsisissatut siunnersuutip § 21-iani nalimmassarneqarpa?

Akissut: Ilanngunneqanngilaq, inuk 30-ileereersimappat imm. 4-mi tamanna ilanngullugu aalajangersarneqartussaammat.

§ 22 pillugu: Tamanna inatsimmi malitseqartitsinermi ersersinneqartariaqarpoq, qanoq kinguneqartitsisoqassanersoq, suliffissarsiortup ikorsiissutinik pisartagaasa aningaasartaanni, qinnuteqartup akunnermusiaani, sapaatip akunnerini 13-ini ullut nalliuuttut amerlanerusimappata, imaluunniit pissutsit immikkut ittut atuuessimappata.

Akissut: Ilanngunneqassaaq, naatsorsuinermi toqqammaavit qanoq suliarinissai sukumiinerujumaarput .

§ 24 pillugu: Oqaasertat ”..akunnerni taakkunani akissarsiaqalernissami.” Allanngortinneqassaaq uunga:” akunnerni taakkunani akissarsiassanik katersarisimasani. Akissut: Ilanngunneqassaaq.

§ 25 pillugu: Inatsisissatut siunnersummi akiliuteqartarnissaq taaneqarpoq ”kingumoortumik qaammatip ulluisa 15-iani aammalu qaammatip ulluisa kingullersaanni pisassasoq”. Taamatut akiliuteqartarneq **kommunimut pitsaanngilluinnarpoq**.

Suliffissarsiortutut ikorsiissutinik akiliuteqartarneq kommunip nalinginnaasumik ullunut 14-ikkaarlugit akissarsitsineranut naapertuuttunngorlugit pisariaqarpoq. Aalajangersagaq inatsisissap oqaasertaanut taakkununngalu oqaaseqaatinut naapertuutinngilaq. Inatsisissatut siunnersuummi allassimavoq "...ikorsiissutit ullunut 14-ikkaarlugit akissarsialinnut akissarsianit isertitatut nalinginnaasutut akilerneqartariaqarput".

Akissut: Ilanngunneqarpoq. Takuuk tusarniaanermut akissut siulaniittoq, ullunut 14-ikkaar-tunngortillugu allangortinneqassaaq.

§ 26, imm. 3 pillugu: Taamatut aalajangersagaq aqqutigalugu allatut qinnuteqartoqarsinna-nera periarfissaasariaqarluarpoq.

Akissut: Ilanngunneqanngilaq.

§ 27 pillugu: Taamatut aalajangersakkap itisilerneqarnissaa pisariaqarpoq, ilaatigut malitsigisaanik inatsisiliornermi.

Akissut: Ilanngunneqanngilaq, inuup atugaasa allannguuteqarneranni kommunimut nalunaartoqarnissaa ersarissumik piumasaqaataavoq.

§ 28, imm. 2 pillugu:

Suliffissarsiortutut ikorsiissutinik qinnuteqarnermut atatillugu akuersinerup nalunaarutiginera tamatigut allakkatigut pisariaqarpoq aammalu paasissutissat pisariaqartinneqartut kisiisa tunniunneqartussanngorlugit. Oqaaseq "oqaasertaqanngitsumik" akuersissuteqartarneq taamaattumik peerlugu, "allakkatigut" akuersineq pisartussanngorlugu allangortinneqartariaqarpoq.

Akissut: Ilanngunneqarpoq.

§ 29 pillugu: Oqaatsit "...eqqunngitsumik tunngaveqartunik ikorsiissutinik tunniussisoqarsi-manerani..." imaalillugu allangortinneqartariaqarpoq "...eqqunngitsumik tunngaveqartunik ikorsiissutinik tunniussisoqarsimanerani..." (imaluunniit ilaatigut "...eqqunngitsumik tunngaveqartunik ikorsiissutinik tigusaqarsimanermi...")

Akissut: Ilanngunneqarpoq.

§ 30 pillugu: Naalakkersuisut kommunimut suliamik ingerlatsisinnaanerannik piginnaatitsi-sinnaaneq periarfissiissutigineqartariaqarpoq.

Akissut: Ilanngunneqarpoq. Oqartussanut, soorlu assersuutigalugu innuttaasunut siunnersui-soqatigiinnut.

§ 31, imm. 2 pillugu: Kommunimit nuuffigineqartumeersut iliuuseqarnissamut pilersaarutit aatsaat pissarsiariniarneqarsinnaasariaqarput suliffissarsiortutut ikorsiissutinik pisartagaqlerniarluni qinnuteqartup ilisimatinneqareerluni akuersinerata aatsaat kingorna. Tamanna

aamma inatsisini kalluarneqartuni aamma ersittariaqarpoq, taamatullu ilaatigut
akuersinnginneq qanoq kinguneqartinneqarsinnaanersoq nalunaarutigineqarluni.

Akissut: Ilanngunneqanngilaq, kommunimut nuuffigineqartumut paasissutissaq pingaarute-qarpoq pisartagaqartup kommunimut nuunnginnermini suna aqqusaarsimaneraa ilisimassa-llugu, tamannalu taamaattumik § 28-mi ilanngunneqassaaq.

§ 32 pillugu: Tusarniaanermi akissuteqaammi matumani aallarniuteqarnermi nalinginnaasumik oqaaseqaatit takukkit.

Akissut: Ilanngunneqanngilaq. Qarasaasiakkut aqutsissutinut ataatsimoortitsilernikkut innuttaasunut pitsaasumik aammalu kommunit sullissinerannut oqilsaataanissaa suli siunertaamat. Qarasaasiatigut aqutsissutit suli piareerlugit inerisarneqanngillat.

§ 34 pillugu: § 34-mut oqaaseqaatit aalajangersakkami tassani takuneqarsinnaanngillat (2022/2023).

Akissut: Ilanngunneqarpoq. Oqaaseqaatit iluarsineqarput.

6. Atuisartoqarnermut Unammilleqatigiinnermullu Aqutsisoqarfik

§ 1 pillugu: Suliffissarsiortunut ikorsiissutit pillugit inatsisisstatut siunnersuummi nalinginnaasumik sulinermut atatillugu minnerpaamik nalunaaquattap akunnerini 20-ni sulisimanissaq atorneqarpoq. Pisortat ikorsiissutaat pillugit inatsisisstatut siunnersuummi nalinginnaasumik sulinermi nalunaaquattap akunneri minnerpaamik 22-nut inissinneqarpoq, kiisalu sulitilluni ajoqusernermut sillimmaserneq pillugu inatsimmi ullormusiat minnerpaamik nalunaaquattap akunnerini 20-inut naatsorsorneqartarlutik. Inatsisit imminnut atanerat eqqarsaatigalugu isumaliutigineqartariaqarpoq nalunaaquattap akunnerisa amerlassusaat assigiit inatsisit akimorlugit atorneqarnissaat isumaliutigineqartariaqarpoq.
Akissut: Ilanngunneqassaaq. Pisortanit ikorsiissutit pillugit Inatsisartut inatsisisstaattut siunnersuummi allannguisoqassaaq, taamalu siunnersuutit arlariillutik isiginnissallutik qinnuteqartup nalinginnaasumik suliffiusussaq akunnernut 20-inut naammassisinnaaneraa imaluunniit naammassisinnaannginneraa.

§ 3 pillugu: § 24-mi erserpoq suliffissarsiortunut ikorsiissutit annikillisinneqarsinnaasut, taamaattoq § 3 malillugu ikorsiissutisinissamut pisinnaatitaaneq aatsaat atorunnaarsinnaalluni. Taamaattumik siunnersuutigineqarpoq § 3-p oqaasertai imatut allanngortinneqassasut: "ikior-siissutit annikillisinneqarsinnaasut imaluunniit atorunnaarsinneqarsinnaasut, aningaasarsianut taarsiullugu isertitat allatut matussuserneqartarpata..."

Akissut: Ilanngunneqanngilaq. Pisut assigiinngitsut marluupput, suliffimmik annaasaqarneq aammalu suliffissarsiortunut ikorsiissutinik pisartagaqarluni sulineq.

§ 9 pillugu: § 1-mut oqaasertat takukkit.

Akissut: Ilanngunneqassaaq. Takuuk § 1-imut akissut. Pisortanit ikorsiissutit pillugit Inatsisartut inatsisisaattut siunnersuummi allannguisoqassaaq, taamalu siunnersuutit arlariillutik isiginnissallutik qinnuteqartup nalinginnaasumik suliffusussaq akunnernut 20-inut naammassisinnaaneraa imaluunniit naammassisinnaannginneraa.

§ 10 pillugu: Aalajangersakkami tassani erserpoq inuuusuttut 18-iniit 29-inut ukiullit pineqartut. Pisortat ikorsiissuteqartarnerat pillugu inatsisisatut siunnersuummi inuuusuttut 18-niit 30-nut ukiullit pineqarput. Inatsisit imminnut atanerat peqqutigalugu ukiut agguataarsimanerisa assigiit aallaavigalugit inatsisini akimorlugit atorneqarnissaat siunnersuutigineqarpoq.

Akissut: Inatsimmut matumunnga ilanngunneqanngilaq.

§ 12 pillugu: Aalajangersakkami matumani erserpoq iliuusissatut pilersaarutit qaammatit piengasukkaarlugit nalilersoqqinneqartassasut, taamaattoq pisortat ikorsiisarnerat pillugu inatsisisatut siunnersuummi erserpoq nalilersueqqinneq pisassasoq qaammatit arfinilikkaarlugit. Inatsisit imminnut atanerat peqqutigalugu isumaliutigineqarsinnaavoq piffissaliunneqartut inatsisit akimorlugit assigimmik atuisoqarnissaa.

Akissut: Ilanngunneqanngilaq. Sulilernissamut piareersimaneq annertunerusumik sammineqassaaq, aammalu ataavartumik sulilernissaq anguniarlugu sulisoqarluni.

§ 13 pillugu: § 10-mut tunngatillugu oqaaseqaatit takukkit.

Akissut: Ilanngunneqanngilaq, § 10-mut atatillugu akissuteqaat takuuk.

§ 22 pillugu: § 1-imut tunngatillugu oqaaseqaatit takukkit.

Akissut: Ilanngunneqanngilaq. Assigiinngitsuupput sulisinnaanerup nalilersuivigineqarnera aamma akunnermusiassamik naatsorsuineq.

§ 25 pillugu: Malugineqarpoq aalajangersagaq una malillugu ilaatigut qaammammi 15-ianikingumoortumik ikorsiissutit akiliutigineqartassasut. Allaaserineqanngilaq akiliuteqarneq qaqugukkut pisassanersoq, 15-iat arfininngorneruppat, sapaataappat imaluunniit nalliuutuuppat.

Pisortat Kalaallit Nunaanni aningaasarsianik allanillu ikorsiissutinik aallaaviattut ullut 14-ikkaarlugit akiliuteqartarput. Pissutsit imminnut atanerat aammalu naatsorsuisarnermi kiisalu qarasaasiatigut teknikkikkuq qaangerniagassat eqqarsaatigalugu pitsaanerpajussannginnersoq aningaasatigullu peqquteqarsinnaannginnersoq, ullut 14-ikkaarlugit kommunit aammalu Namminersorlutik Oqartussat atuutilersimasaat assigalugit akiliuteqartarneq atorneqarsinnaannginnersoq.

Akissut: Ilanngunneqarpoq. Ullut 14-ikkaarlugit pisalissaq.

§ 28, imm. 2 pillugu: Aalajangersakkami tassani erserpoq ikorsiissutinik qinnuteqaatip suliarinissaanut piumasaqaataasooq oqaasertaqanngitsumik akuersineq. Aalajangersagaq peerneqartariaqarpoq, tassami § 28, imm. 1 paassisutissanik pissarsiniarnissamut piginnaatitsisummik imaqareerpoq. Ilanngullugu oqaatigineqassaaq oqaaseqaatini aalajangersakkamilu oqaasertat imminnut tamakkiisumik naapertuitinngimmata.

Akissut: Ilanngunneqarpoq, § 28-mut atatillugu akissuteqaat takuuk.

§ 33 pillugu: Inatsisissatut siunnersuummi uani maalaaruteqarsinnaanermut aalajangersakkap aammalu pisortat ikorsiissuteqartarnerat pillugu inatsisissatut siunnersuummi oqaasertat imminnut naapertuitinngillat. Siunnersuutigineqarpoq maalaaruteqarsinnaaneq pillugu aalajangersagaq imatut oqaasertalerneqassasoq: "Inatsisartut inatsisaat una naapertorlugu kommunalbestyrelsip aammalu Naalakkersuisut aalajangiineri suliassanngortinneqarsinnaapput Isumaginninnikkut Maalaaruteqartarfimmut, Isumaginnittooqarfiup aqunneqarnera aaqqissuussaaneralu pillugit Inatsisartut peqqussutaanni aalajangersakkat naapertorlugit.

Akissut: Ilanngunneqanngilaq.

7. Sulinerlik Inuussutissarsiuteqartut Kattuffiat (SIK)

§ 1:

§ 1, imm. 2-mi erserpoq sulilernissamut piareersimasutut isigineqartartut, nalinginnaasumik sulineq sapaatip akunneranut minnerpaamik nalunaaquattap akunnerini 20-ni sivisussuseqartarsimappat. Sooq nalunaaquattap akunneri 20-iuppat aammalu nalunaaquattap akunneri 22-iunatik, tassami nalunaaquattap akunneri 22-it pisortat ikorsiissuteqartarnerat pillugu Inatsisartut inatsisissaatut siunnersuummi nutaami, maannakkut tusarniaassutigineqartumi, kisitsisit atorneqarmata.

Akissut: Ilanngunneqassaaq. Siusinnerusukkut akissuteqaat takuuk. Pisortanit ikorsiissutit pillugit Inatsisartut inatsisissaattut siunnersuummi allannguisoqassaaq, taamalu siunnersuutit arlariillutik isiginnissallutik qinnuteqartup nalinginnaasumik suliffiusussaq akunnernut 20-inut naammassisinnaaneraa imaluunniit naammassisinnaannginneraa.

§ 1, imm. 3-mi erserpoq suliffissarsiortunut ikorsiissutinik pisartagaqarneq nammineq pisuussutiginngisamik suliffeerunneq, tassungalu ilaalluni sulisitsisumiit soraarsitaaneq ilanngullugu, peqqutigalugu aningaasarsiatigut isertitaqannginnermut taarsiullugu pisartagaasoq. Tamanna imatut taava paasineqartariaqarpoq inuk naliginnaasumik ilimasaarneqarluni soraarsitaasimaguni suliffissarsiortunut ikorsiissutisisinnaasoq. Siunnersuutip § 17, imm. 1-ani aammalu inatsisissatut siunnersuutip oqaasertaani muminganik imatut paasineqarsinnaavoq nammineq pisuussutiginngisamik suliffeerunneq, suliffigisamiit peersitaasimagaanni (ullormiit ullormut peersitaalluni aammalu suliunnaarsinnejarnissamut ilimasaarneqarnani).

Suna tamarmi ajunngilluinnartumi taamatut, sapaatip akunnerini sisamani killilersuiffigisaa-lernermut, malittarisassaqarneq ajunngitsutut isikkoqarsinnaavoq, nammineq pisuussutigisamik suliffimmiit peersitaasimagaanni. Kisianni suliffeqarnermi ajoraluartumik suut tamarmik ajunngilluinnartutut isigineqarsinnaanngillat pissutsit, tassami SIK-miit akulikitsumik takusarparput suliffimmiit, ilimasaaruteqaqqaarluni soraarsitsinissaagaluamut taarsiullugu, peersitsisoqartarnera, imaluunniit tunngavissaqanngitsumik ilimasaaruteqarnani soraarsitsiinnartarneq. SIK-p tassunga atatillugu eqqummaariffigaa inatsisisstatut siunnersummut oqaaseqaatini erserma, soraarsitsineq sulisitsisumik oqaloqateqareernerup kingorna imaluunniit eqqartuussivimmiit allannguisoqarnerata kingorna peersitsineq allanngortinneqarpat, taava killilersuiffigisaalernermi ikorsiissutit ikilisinneqarsimasut utertillugit akiliutigineqartussaasut. Tamanna tusaannarlugu ajunngilluinnarpoq, kisianni amerlasuutigut oqaannarluni ajornartarpoq, tassami ilaatigut piffissaq sivisoorujussuaq assersuutigalugu eqqartuussivimmi suliaq ingerlanneqartarpoq, aammalu taanna sulihamillu taamaattumik suliassanngortitsinermut aningaasartuutit, tamanut killiliisussaammata peersitsinerup misilinnejarnissaanut periarfissatuap atornissaanut.

Akissut: Ilanngunneqanngilaq. Pineqartoq tunngavissaqanngitsumik suliffimminniit peersitaasimappat, taava inuup taamatut peersitaaneq mumisinniassavaa/allanngortinniassavaa, inuk tassani taarsiiffigineqarnissaminut taamaasilluni pisinnaatitaaffeqarpoq (piffissap soraarsitsinissamut ilimasaaruteqarfiusup minnerpaamik sivisoqataanik) taarsiiffigitinnissaminut, imaassanngilarmi suliffissarsiortunut ikorsiissutinik pisartagaqarnermi inuit tunngavissaqanngitsumik suliffimminniit peersitaasimasut suliamic ingerlatsisinaanerannut mattussisoqassasoq.

§ 4:

Aalajangersakkami tassani erserpoq "Angerlartitsinertut isigineqassaaq sulisitsisup atorfegartitsinermik atorunnaarsitsigallarnerat ullut 14-it angullugit sivisussusilimmik, nioqqtissiornerup uninnerani, nioqqtissiassaarunnermik imaluuniit silamik peqquteqartunik".

SIK-p inatsisisstatut siunnersuut imatut paasivaa, suliffissarsiortunut ikorsiissummik tunnusisoqarsinnaanngitsoq sulisoq, ullut 14-it sinnerlugit sivisussuseqartumik angerlartitaasimappat. Taamatut paasinninneq eqqortuusimappat, taava siunnersuut naammaginanngilaq, aam-malu suliffeerukkallarnermi ikorsiissutit pillugit maannakkumut malittarisassanut sanilliullugit ajorseriarnerulluni.

Tassunga atatillugu SIK-miit piumasarineqassaaq apeqqutit makku akineqassasut: Angerlartitsineq ullut 14-it sinnerlugit sivisussuseqarpat, taava angerlartitaasoq qanoq ikorneqarsinnaassava?

SIK-miit akulikitsumik misigineqartarpoq taamatut angerlartitsinerit ullaat 14-it sinningaatsiar-lugit sivisussuseqartartut, soorlu assersuutigalugu aalisakkerivinni, aammalu sulisoq nammi-neq pisuussutiginngisaminik piffissami sivisunerusumi aningaasarsiaqarnani inuulertarluni, naak suli sulilernissamut piareersimagaluarluni atorfimmi angerlartitaaffigisimasaminiit, tas-sami atorfeqarneq suli atuummat. SIK-p taamaattumik siunnersuuteqartumut kaammattuutigissavaa siunnersuutip taannartaa isumaliutigeqqeqqullugu, taamaasilluni sulisut ullaat 14-init sivisunerusumik angerlartitaasut pisariaqanngitsumik pineqaatissinneqannginniassammata.

Akissut: Ilangunneqanngilaq. § 4-mi siunertaanngilaq § 1, imm. 3 malillugu inuup suliffis-sarsiortunut ikorsiissutinik qanoq sivisutigisumik pisartagaqarnissaata killilerneqarnissaa. § 4 qaqugukkut iliuusissanik pilersaarutip naammassineqarnissaanut § 12, imm. 2 malillugu pisussaaffeqarneq siunniunneqarmat.

§§6-8:

SIK-p suliffissarsiortunut ikorsiissutinik pisartagaqartunut piumasaqaatitut saqqummiunne-qartut tapersorsorsinnaavai, tassunga ilanngullugu suliffimmik innersuussutigineqartumik ima-luunniit sulilernissamut sungiusarluni neqerooruteqarnermut peqataasussaatitaanermik pisussaaffiliineq.

Akissut: Tusaatissatut tiguneqarpoq.

§ 10

SIK-p pitsasutut isigaa kommunit inuit ataasiakkaat, suliffissarsiortutut nalunaarsorneqarnerminniit, iliuusissaannik pilersaarutinik sapaatip akunnerisa sisamat iluanni suliaqartussaanerat. SIK-miit neriuutigineqarpoq iliuusissatut pilersaarutit tamakku pitsasumik sunniuteqassasut, taamaasillutik amerlanerusut sulilissapput suliffissarsiortunut ikorsiissutinik pisartagaqaannarnatik.

Akissut: Tusaatissatut tiguneqarpoq.

§13:

Aalajangersagaq taanna qularnanngitsumik tupallannarlunnartuuvoq, kisianni SIK isumaqa-taavoq siunnersuummi siunertarineqartumut, tassalu suliffissarsiortunut ikorsiissutinik piffissami sivisuumi pisartagaqarsimagaanni, taava inuiaqatigiinniit piumasarineqarsinnaasoq angerlarsimaffik qimallugu suliffimmik neqerooruteqartumik tigunissaq pisussaaffigitinneqarsinnaammat. Akerlianik immaqa naatsorsuutigissallugu ilumoorsaarpallaarneruvoq isumaqaraanni aaqqissuussineq imaattoq pinngitsaaliissutigineqarsinnaasoq, inuit taakku namminerisaminnik angerlarsimaffigisartik qimallugu sulilernissartik pisussaaffigigaat, tassami amerlasuunik peqquteqartumik illoqarfigisaq imaluunniit nunaqarfigisaq qimakkusunneqarneq ajormat.

SIK-p maluginiarpaa § 13, imm. 3-4-mi ersermat, illoqarfimmi allami aalajangersimasumi inissamik naammaginartumik pissarsisoqarsinnaanngippat, taava angerlarsimaffik qimallugu suliffimmik innersuussaqartoqarnera malissallugu imaluunniit tigussallugu pisussaaffeqanngilaq.

Akissut: Tusaatissatut tiguneqarpoq.

§17:

Aalajangersakkami tessani erserpoq suliffissarsiortunut ikorsiissutinik pisartagaqartoq sulilernissamut piareersimanngitsoq, imaluunniit inuit atorfimminniit soraarsimasut, imaluunniit atorfimminniit peersitaasimasut, ulluni 14-ini killilersuiffigisaalertartut, taamaasilluni imm. 2 malillugu piffissami killilersuiffigisaanerup nalaani ikorsiissutit, naliginnaasumik pisinnaasaasa, 50 %-ianik pisartagaqartinneqalerlutik. Soorlu siusinnerusukkut oqaatigineqartutuut pitsaasorujussuartut isigineqarsinnaavoq suliffimmuit peersitaaneq kinguneqartinneqassappat, kisianni pivusumi assersuutissarpassuarnik peqarpoq taamatut suliffimmuit peqqutissaqanngitsumik peersitsinerit pisartut, imatullu paasineqartariaqarluni sulisitsisup ilimasaaruteqaqqaarnani soraarsitsineratut, naak ilimasaarisussaagaluarluni.

Akissut: Ilanngunneqanngilaq. § 1, imm. 3-mut akissuteqaat innersuussutigineqarpoq.

§ 19:

SIK-p tapersorsorpaa inuit aningaasarsiaqarlutik sulereersimanngikkaluarlutik suliffissarsiortunut ikorsiissutinik pisartagaqarsinnaanerat, kommunimut suliffissarsiortutut nalunaarnerup kingorna sapaatip akunneri marluk qaangiunneranni. Tamanna aamma isigineqartariaqarpoq kommunip pineqartoq sulilernissamut piareersimasutut nalilersimappagu, taanna ikorsiissutinik pisartagaqarsinnaalissammat.

Akissut: Tusaatissatut tiguneqarpoq.

§20:

Siunnersummi suliffissarsiortutut ikorsiissutit procentinngorlugit aningaasartalerneqarneri SIK-miit tusaatissatut tiguneqarpoq.

Akissut: Tusaatissatut tiguneqarpoq.

§23:

SIK-p pitsasutut isigaa piffissap ilaani sulinermut atatillugu qinnuteqaqqaanngikkaluarluni suliffissarsiortunut ikorsiissutinut tapiliussisoqarsinnaanera. Taamaattoq SIK-p siunnersuutigaa qaammatit arfinillit iluanni sivisunerpaamik sapaatip akunnerini sisamani aalajangersagaq, qaammatit arfinillit iluanni sapaatip akunnerinut arfineq-pingasunut sivitsorneqassasoq.

Akissut: Ilanngunneqanngilaq, sapaatip akunneri sisamat naammaginartutut naliligaapput.

8. Sulisitsisut

§ 4, imm. 1 pillugu

Sulisitsisut inassutigissavaa tunisassiassaaleqineq peqqutigalugu nioqqutissiornerup unitsinneqarnerani inuussutissarsiutit allat aalisakkerinerup saniatigut ilanngunneqarnissaat, taamaasilluni assersuutigalugu sanaartorneq/sanaartornermi sulisut, piffissaq eqqorlugu atortussat tikissimannngippata sanaartornermi eqqugaasoqarsinnaanera.

Akissut: Ilanngunneqarpoq, siuliani akissuteqaat takuuk. Taamaattoq matumani maluginiar-neqassaaq sanaartornermi atortunik amigaateqarneq Inatsisartut inatsisaanni uani nammineq pisuussutigineqartutut isigineqarmat.

§ 5, imm. 1, nr. 1 pillugu

Sulisitsisuniit nalornissutigineqarpoq danskisut innuttaassuseqarnissamik piumasaqaat innuttaasunut, ukiorpassuarni nunami najugaqarsimasunut, kisiannili danskisut innuttaassuseqanngitsunut, tamanna ajornartorsiutinik nassataqarsinnaanersoq.

Sulisitsisut naatsorsuutigaa nunani avannarlermiutut innuttaassuseqartut nunani avannarlerni isumaqatigiissutit iluanni pineqartussaammata, taamaattumik suliffissarsiortunut ikorsiissutinik pisartagaqarnissamut pisinnaatitaallutik, kisianni nunani allani innuttaassuseqartut allat ajornartorsiulersinnaapput aammalu suliffissarsiortunut ikorsiissutinik pisartagaqarsinnaanatik.

Sulisitsisuniit nalilerneqarsinnaanngilaq qanoq aningaasatigut sunniuteqassanersoq, innuttaasut assersuutigalugu ukiuni tallimani arfinilinni nunami maani sulisimappata aalajangersagaq taakkununnga aamma atuutilissagaluarpat.

Sulisitsisut kaammattuutigaa tamanna misissorneqassasoq.

Akissut: Ilanngunneqarpoq. Assigiinngisitsinissaq siunertaanngilaq.

§ 15 pillugu

Aalajangersakkami erserpoq inuk suliffissarsiortunut ikorsiissutinut ilassusikkanik ikorsiissutisiaqarsinnaasoq napparsimanerup nalaani sulinermut piginnaasat appariaateqarpata.

Imm. 2-mi erserpoq sulilernissamut piareersisussaatitaaneq aalajangiusimeqassasoq suliffissarsiortunut ikorsiissutit ilassuserneqarpata.

Oqaaseqaatini erserpoq kommunalbestyrelsip sulifissarsiortunut ikorsiissutit ilassuserneqarnissaannut atatillugu sulilernissamut pisussaaffik isummerfigisussaagaa. Inatsisip oqaasertaa oqaaseqaatillu imminnut naapertuutinngillat.

Akissut: Ilanngunneqarpoq. Taassuma saniatigut "kapitali 3" "kapitali 4"-nngorpoq, ilaatigut napparsimasoq sulilernissamut pisussaaffiarneqarallarsinnaavoq.

§ 25 pillugu

Inatsisip oqaasertaani erserpoq suliffissarsiortutut ikorsiissutit qaammatip ulluisa 15-iani aamma qaammatip ulluinnaani kingullermi akiliutigineqartassasut.

Aalajangersakkamut oqaaseqaatini erserpoq suliffissarsiortutut ikorsiissutit akiliutigineqartassasut ulla 14-ikkaarlugit imaluunniit akiliutigineqartariaqaraluartut ulla 14-ikkaarlugit.

Inatsisip oqaasertai oqaaseqaatillu imminnut naapertuitinngillat.

Qaammat ataaseq agguaqatigiisillugu sapaatip akunneri 4,3-upput.

15-iani kisimi akiliuteqartoqartassappat aammalu akiliuteqarfissaq kingulleq ulluinnaalluni, taava ulla 14-it sinnerneqassapput.

Oqaasertat inatsisillu akornanni naapertuttoqartariaqarpoq.

Akissut: Ilanngunneqarpoq. Ullunut 14-ikkaartungortillugu allanngortinneqarpoq.

9. Tilioq – Innarluutillit Illersuisuat

Kapitali 7: Killilersuiffigineqarsinnaaneq pillugu

Tiliuumiit immikkut aarlerinartutut isigineqarpoq inatsisissatut missingiummi pisartakkat anni-killisinniarneqarmata killilersuinerup nalaani aningaasatigut pillaneq periafissinniarneqarmat, innuttaasoq sulilernissamut piareersimanngippat, takukkit §§ 6-13. Inuit innarluuteqartut immikkut tatineqarluinnarsinnaapput, iliuusissatut pilersaarusiornerni aammalu sammisaqartitsinerni immikkut illuinnartumik pisariaqartitsisoqarnera eqqummaariffigineqarsimanninnerata kingunerisaanik, inatsimmi pineqaatissiinissaq periafissiissutigineqarpat.

Assersuutigineqarsinnaavoq inuk innarluuteqartoq suliffimmi sungiusarnissamut neqerooru-taasumukarpat imaluunniit atorfimmut immikkut illuinnartumik pisariaqartitsisoqarnera eq-qummaariffigineqarsimanani, suliartortinneqarsimappat. Inuup peqataannginneranut neqeroorut tulluartuuusimanngippat, killilersuiffigineqarsinnaaneq aningaasatigut pineqaatissiinikkut pissaaq. Assersuut alla unaasinnaavoq inuk innarluuteqartoq pineqaatissiinerniit pitsaanngilluinnartumik sunnerneqarsinnaavoq, naak inuk innarluuteqartoq sulilernissaminut piareersimaluarluni, piffissap ilaani ima ajortitsigisinnavaoq, allaat sulilernissamut piumasaqaatinut equuutsitsisinnaanani. Pisut taakku tamarmik takutippaat innarluuteqarneq pissutigalugu pineqaatissiisoqarsinnaasoq, kommuni sulianut eqqortumik piginnaasaqartunik sulisoqarsimannngippat.

Taamaasilluni Tiliuumiit kaammattutigineqarpoq aningaasatigut, suliffissarsiortutut ikorsiissutinik pisartakkaminik killilersuiffigineqarnerup nalaani ikilisaaffigalugu, pineqaatissiisarneq atorunnaarsinneqassasoq.

Akissut: Tusaatissatut tiguneqarpoq, ilanngunneqanngilaq.